

前臺灣民主國義軍大將軍

倉海先生丘公逢甲詩選

商務印書館發行

前臺灣民主國義軍大將軍

倉海先生丘公逢甲詩選

商務印書館發行

附 誌

---

琮學識淺見聞寡所選必多

錯誤遺漏敬懇

諸先輩諸大雅勿吝指正以

備重刊時修訂

丘琮謹白

32985

# 目次

## 一 圖像

丘公遺像 臺灣民主國國旗圖  
丘公遺墨 臺灣民主國疆域圖

## 二 詩選

第一 乙未丙申集

第二 丁酉戊戌集

第三 己亥集

第四 庚子集

第五 辛丑壬寅癸卯甲辰集

第六 乙巳丙午丁未戊申集

第七 己酉庚戌辛亥集

## 三 附錄

## 四 跋

目次

一

一九

三五

五七

七一

七九

九三

倉海先生遺像



四十七歲攝

秋懷再次右韵

三十登壇往事過  
菜根兒女兩饒


臨他鄉白髮愁邊滿  
故國青山

夢裏身多未  
故文章龍起陸孤

星漢涼鵲填河  
衣錦拆林魂泣

休唱尊前舊楚歌

臺 灣 民 主 國 國 旗







臺灣民主國  
義軍大將軍  
倉海先生丘公逢甲詩選目錄

第一 乙未丙申集 (辭臺歸粵期)

自一一一八

離臺詩(六首).....	一
潮州舟次.....	二
客愁.....	二
有書時事者爲贅其卷端(四首).....	二
中秋夕烏石岡眺月同三弟崧甫作.....	三
重陽前數日風雨忽集慨然有悲秋之感.....	三
重九日遊長潭(六之四).....	三
讀史書感.....	四
菊枕詩(二首).....	四
天涯.....	五
景忠祠弔故明孝廉林丹九先生一桂(二首).....	六
當歌.....	六

村居書感次崧甫韻(二首).....七

以上乙未作

山居詩(五之四).....七

雜詩(三之二).....八

陳孝廉庭鳳見訪山中賦贈.....八

愁雲.....八

送頌臣之臺灣(八之五六七三首).....九

重送頌臣.....九

春愁.....一〇

鐵漢樓懷古.....一一

凌風樓懷古.....一一

金山弔宋安撫使權鋒寨正將馬登墓.....一二

往事.....一二

去歲秋初抵鮑江今仍客遊至此思之慨然(二首).....一二

香港書感(二首).....一二

續海樓(二首).....一三

答陳頤山見贈.....一三

長句贈許仙屏中丞并乞書心太平草履額時將歸潮州.....一四

許仙屏中丞見和前詩感事述懷疊韻奉答(三之一).....一五

羊城中秋(三之二).....一五

廣州晤劉葆貞編修可毅.....一五

贈梁詩五孝廉(二首).....一六

秋懷(八首).....一六

以上丙申作

### 第二 丁酉戊戌集 (潮州課士期)

自一九一三

海軍衙門歌.....一九

寄家菽園孝廉新嘉坡(二首).....二〇

聞膠州事書感.....二〇

歲暮雜感(十首).....二一

除夕詩(三首).....二三

以上丁酉作

戊戌元旦試筆·····	二四
答鑿中友人(三首)·····	二四
元夕無月(五首)·····	二五
說潮(五古十七之二十四)·····	二五
聞海客談澎湖事·····	二七
得頌臣臺灣書卻寄·····	二七
寄懷滄海師桂林(八之七)·····	二七
次韻答陶生·····	二九
潮陽東山張許二公祠爲文丞相題沁園春詞處旁卽丞相祠也秋日過謁敬賦二律·····	二九
對月書感(二首)·····	三〇
答王曉滄廣文·····	三〇
十四夜月·····	三〇
憶舊迹今答曉滄見贈十絕句·····	三一
贈馬總戎(四之二四共二首)·····	三一

題康步崖中翰詠出秦集(七之二三六共三首).....三二

題畫竹(四之一).....三三

以上戊戌作

### 第三 己亥集 (倡導新學期)

自三五—五五

和平里行.....三五

和曉滄買犢.....三八

西園重見詩畸刻本爲之黯然.....三九

鄉間人有誤以予爲武進士者戲紀以詩.....三九

答潘尚史丘菽園.....三九

鮑浦喜晤蕭伯瑤夜話.....四〇

風雨中與季平游東山謁雙忠大忠祠兼尋水簾亭紫雲巖諸勝.....四〇

柳汀贈詩述及塞事答之.....四一

祝文信國公生日日得伯瑤風雨中見懷詩答寄(二首).....四一

答夏季平(二首).....四二

韓祠歌.....四二

乞夏季平重書文信國沁園春詞並拙作雙忠廟聯語(二首).....	四三
棉雪歌.....	四四
夏夜與季平蕭氏壺聽瀟道話舊事作.....	四五
謝詔安林呈材游戎惠畫(二首).....	四五
送季平之澳門兼訂來約(二首).....	四六
春感(十首選一至八首).....	四六
己亥五月二日東山大忠祠祝文信國公生日(五之一三五共三首).....	四八
東山酒樓放歌.....	五〇
饒平雜詩(十六首之一).....	五一
百丈墳爲宋張丞相世傑夫人許氏大戰元兵殉節處奮有祠廢久矣子惠署縣爲商復烈蹟.....	五一
東山感秋詞.....	五一
題菽園看雲圖.....	五二
劉露君廿年舊友曾從余義軍內渡寓漳來潮見訪賦贈.....	五三
朱梅農以蘭史書至回寄蘭史.....	五三
寄題永井完久夢哉空也樓新竹.....	五四

沈艾孫爲刻石章三賦此爲謝(二首).....五四

客窗夜話同王曉滄作.....五五

有感書扇義軍舊書記(四首).....五五

### 第四 庚子集 (南遊策進期)

自五七—七〇

早春有懷陶史用高常侍人日寄杜拾遺韻.....五七

林驚雲郎中寄題嶽忠蹟詩冊追憶舊事次韻遙答(八首選五首).....五七

將之南洋留別親友(八首).....五八

詠史四絕句.....五九

哭李芷汀.....六〇

澳門雜詩(十五選四首).....六〇

答陸敬南.....六一

答敬甫見贈(四首).....六一

飲香江酒樓卽席作(四首).....六二

九龍有感.....六三

西貢雜詩(十首選一).....六三

星洲喜晤容純甫副使即送西行(三首).....六三

病中贈王桂山.....六四

自題南洋行教圖(二首).....六四

留別曉滄.....六四

客樓夕感.....六五

南還抵汕頭埠聞琰兒球兒殤耗哀感書此(六首).....六五

南漢敬州修慧寺千佛鐵塔歌.....六五

重晤梁輯五光祿話舊(二首).....六八

答人境廬主見和之作(二首).....六八

再答人境廬主(二首).....六九

再答人境廬主(二首).....六九

重游清涼洞呈鍾藕華(二首).....七〇

寄園黃公度(二首).....七〇

第五 辛丑壬寅癸卯甲辰集 (嶺東建校期)

自七一—七八

晨起書所見.....七一



述哀……………七一

汕頭海關歌……………七二

天地……………七四

王曉滄將之官閩中賦別(六之二五兩首)……………七四

再答賓甫兼寄陳伯嚴(四之一)……………七五

與頌臣話藝事……………七五

送謝四京歸……………七五

題陳撰芬女士女學報……………七六

答維翰節(二首)……………七六

題閩史羅淨紀游圖……………七六

以上辛丑壬寅作

答友人(四首)……………七八

題閩史香海填詞圖(二首)……………七八

以上癸卯甲辰作

第六 乙巳丙午丁未戊申集 (掌教廣州期)

自七九—九二

陳伯潛學士以路事來粵相晤感賦(二首).....	七九
題滄海遺民塞陽詩話.....	七九
送夏同甫還浙兼訊湯盤仙.....	八〇
秋懷(八首).....	八〇
秋懷再疊前韻(八之六一首).....	八一
短歌贈陳伯瀾.....	八二
以上乙巳丙午丁未作	
席上作.....	八二
題松甫弟遺像.....	八二
鎮海樓送王豹君方伯之蜀次壁間彭剛直韻(選四首).....	八四
戊申廣州五月五日作.....	八五
寄贈國學保存會諸子.....	八七
重陽夕作.....	八七
濟良所.....	八七
蟲豸詩(八之二五兩首).....	八八

擬杜詩將五首用原韻……………八八

晴皋以平蠻三將題名及元祐黨籍碑揚見贈並先以詩賦此答謝……………八九

秋興(八首選六)……………八九

白馬鄉有國明義士賴若夫先生……………九一

以上戊申作

附 丁未詩餘 滿江紅詞(一首)……………九二

### 第七 己酉庚戌辛亥集 (政教兼預期)

自九三—九八

以攝影心火平草廬圖移寫紙本(五之一首)……………九三

題張生所編東莞英雄遺集……………九三

秋懷(八之一)……………九五

以上己酉作

與楚僧千仞開歌作……………九五

清明日游白雲山(二之一)……………九五

再柬雲仙(二之一)……………九六

自題三十登壇照片……………九六

丘倉先生丘公逢甲詩選 目錄

枚伯以長句國羅浮游草次韻答之……………九六

新寧劉小芸將爲大江南北之游介孝方索詩壯行爲賦四絕句……………九七

以上庚戌作

謁明孝陵(四首之一)……………九八

以上辛亥作

(附註凡例)

一、各詩每句下小註爲 倉海公原註

一、各詩每首後小註乃編者加選之註以關於特有之人地時者爲多普遍之典實不註

# 丘倉海詩選

## 第一 乙未丙申集 (辭臺歸粵期)

### 離臺詩首六

將行矣。草此數章。聊寫積憤。妹倩張君。請珍藏之。十年之後。有心人重若拱璧矣。海東遺民草。  
宰相有權能割地。孤臣無力可回天。扁舟去作鷗夷子。回首河山意黯然。  
虎韜豹略且收藏。休說承明執戟郎。至竟虬髯成底事。宮中一炬類咸陽。  
捲土重來未可知。江山亦要偉人持。成名豎子知多少。海上誰來建義旂。  
從此中原恐陸沉。東周積弱又於今。入山冷眼觀時局。荊棘銅駝感慨深。  
英雄退步卽神仙。火氣消除道德編。我不神仙聊劍俠。仇頭斬盡再昇天。



亂世團圓骨肉難。弟兄離別正心酸。奉親且作漁樵隱。到處名山可掛單。

此詩乃公於乙未夏將乘舟離臺時倚裝忽忽所作民國十四年八月琮遊臺錄得者原稿尙存

親友家

### 潮州舟次

抱江城郭夕陽紅。百口初還五嶺東。關吏釣鼇疑海客。舟人驅鱷話文公。九秋急警傳風鶴。萬里愁痕過雪鴻。獨倚柁樓無限恨。故山回首亂雲中。

此由閩歸粵抵潮州乘舟赴鎮平時作也

### 客愁

烽火天涯夢。琴尊劫外身。新亭空灑淚。故國莽懷人。文字窮愁賤。交情患難真。客愁無遺處。滄海尙揚塵。

### 有書時事者爲贅其卷端

首四

化碧二年血有痕。當年哀感滿乾坤。鶉維剪後天方醉。無路排雲叫九閭。

此局全輸莫認真。東南風急海揚塵。世間儻有虬髯客。未必扶餘別屬人。  
殘山剩水冷斜暉。獨向西風淚滿衣。阜帽藜牀成底事。全家遼海管寧歸。  
人間成敗論英雄。野史荒唐恐未公。古柳斜陽圍坐聽。一時談笑付盲翁。

### 中秋夕烏石岡眺月同三弟崧甫作

秋風送暑夜光寒。高會依然似子桓。彈指仙凡相隔易。岡爲揚子仙師舊遊地稱心人月並圓難。樺香客裏新詩卷。潮滿天涯舊將壇。猶有山河留影在。不妨千里且同看。

烏石岡在今蕉嶺城東南四里東山楊子仙師廟側

### 重陽前數日風雨忽集慨然有悲秋之感

四山風緊溼雲流。落葉聲中客倚樓。蕙怨蘭啼千里夢。蛩煙鴈雨一城秋。伯龍鬼笑謀何拙。洗馬人言意始愁。叢菊空留他日淚。故園烽火未曾收。

### 重九日遊長潭

六之四

巖翠冷欲滴。泉飛破秋煙。中有碧血痕。終古長涓涓。九州已無地。一線猶有天。  
一線天爲明孝廉林鍊石思補之。天平俄已傾。亦欲一葉舟。奉母終天年。吁嗟丹九先生殉節處。  
厄陽九。不死胡能賢。人生祇一死。死況忠孝全。峨峨故衣冠。寒潭寫蒼顏。山靈鑒孤貞。寧須史官編。荒祠清溪曲。遺蛻空山巔。采菊再拜薦。酌之以寒泉。

長潭在蕉嶺城西十五里石窟溪之北口也

### 讀史書感

袞袞羣公翊廟謨。匡時偉略未全無。珠厓地棄完籌海。玉壘天迴罷徙都。萬國冠裳嗟倒置。九州貨貝慨中枯。空山獨抱遺書哭。牢落乾坤一腐儒。

### 菊枕詩

二首

繫余昔齟齬。嬉戲慈母旁。開園種秋菊。寒花映書堂。殷勤慈母心。采菊縫枕囊。祝兒蠲宿疴。祝兒好容光。垂垂手中線。宛宛生清香。人生嬉戲時。此境安可常。堂北萱草花。萎謝驚秋霜。峨峨大宛山。阡表齊瀧岡。前年菊花時。登高作重陽。



墓門一瞻拜。宰木寒煙蒼。去年菊花時。奔走爲戎裝。枕戈待旦心。力籌保鯤洋。今年菊花時。故園成戰場。不及哭墓行。寸草心徒傷。空山此高臥。哀淚沾秋裳。昔游淨翠園。同賦菊枕詩。維時灌陽公。初出爲監司。兩遷遂持節。風雅照海湄。從容軍政暇。壇坫迭鼓旗。客並富才俊。主更雄文詞。秋光剪入卷。哀集名詩畸。苦心極鐫刻。謂可千秋垂。夷氛海上來。倚枕聞驚鼙。是時菊正花。黃金甲紛披。秋風一場戰。應保危臺危。朱厓地遽棄。百計不得施。餘生脫虎口。寤寐空相思。昔爲稱意花。今作斷腸枝。兵火萬卷盡。梨棗災可知。蠹篇縱幸存。零落生蛛絲。安知秋齋中。清芬猶昔時。寒宵有遠夢。相覓應天涯。

公母陳夫人葬臺灣臺中大宛山 臺灣安平縣外海有七鯤身小嶼嘉義縣外海有南北鯤身

青鯤身等小嶼故臺海曰鯤洋 公師唐景崧廣西灌陽人

## 天涯

天涯斷雁少書還。夢入虛無縹渺間。兵火餘生心易碎。愁人未老鬢先斑。沒番

親故淪滄海。歸漢郎官遯故山。已分生離同死別。不堪揮涕說臺灣。

景忠祠弔故明孝廉林丹九先生一桂首二

崖壁斑斑碧血痕。先生當日此成仁。三閩四廣支離局。一息千秋草莽臣。亂世科名娛老母。荒山鬚髮表完人。扁舟欲訪悲歌處。冷月空潭瀉古春。

三書卻聘至今傳。高節清風尚凜然。列傳補書宜國史。此邦議祀合鄉賢。鎮平崇禎

六年始設縣。今縣學鄉賢祠所祀多設縣。荒祠日冷雙門闕。遺寨雲封一線天。以前人若先生得祀則真鎮平縣人也

斷句零章待搜緝。蠹餘留續谷音編。先生遺作止存家書及與兵官某書一詩若續正氣歌戀貧賦予均未得見

鎮平縣民國四年更名蕉嶺縣 林丹九先生殉節處在縣西長潭有祠名景忠祀先生處 雙

門闕有先生祠一線天乃先生殉身處地皆在長潭

當歌

落落當歌槊自橫。九州無地着狂生。枯枰潦草棋收局。殘席喧呶酒罷兵。劫火餘灰騰謗燄。恨天遺石築愁城。淒涼法曲唐天寶。唱到關山入破聲。

村居書感次崧甫韻

首二

寥落田園隔虜塵。買山聊此息勞人。昔賢原少閒憂樂。吾道何曾繼賤貧。入傳  
且栽元亮柳。行歌肯負買臣薪。補天填海都無益。空灑東風淚滿巾。  
乾坤蒼莽正風塵。力挽狂瀾仗要人。豈有桃源堪避世。不妨蔬水且安貧。天閭  
遼阻愁呵壁。時局艱危痛錯薪。祇恐南陽難穩臥。中原戎馬待綸巾。

以上乙未作

山居詩

五之四

鴻雁春北歸。歸飛不失羣。天生此羽翼。大息此強分。我家深山中。聊用謝世紛。  
吾弟各異才。出作同習勤。荷鋤影相隨。伐木聲相聞。向晦入晏息。一燈夜論文。  
微言繹聖牒。奧語搜皇墳。琅琅金石聲。遙出山中雲。因之雖亂離。其樂仍欣欣。  
有兄獨遠出。蹤迹隔虜氛。東風萬里來。同念倉海君。

此初居淡定村時作 公兄先甲內渡後再冒險赴臺也

雜詩

三之二

共工觸天柱。西北遂傾墜。重煩五色石。復得天定位。神媧抑何心。補天不補地。東南大海中。遂令日生事。靈鼇實天遣。受釣誤貪餌。岱輿與員嶠。坐失神山二。蓬萊固無恙。左股復割棄。爲天謀者誰。敢道無遺議。諸仙各神通。坐視果何意。閒愁落萬古。茫茫渺難計。徒勞炎帝女。填海作精衛。

陳孝廉庭鳳見訪山中賦贈

隻手迴西日。都成志未申。相逢休涕淚。吾道惜風塵。松菊娛今是。山林閱古春。祝君無別語。珍重待時身。

陳孝廉字鶴雲鎮平金沙鄉人識時務有遠志與公安深

愁雲

愁雲極目晝成陰。飛鳥猶知戀故林。破碎河山收戰氣。飄零身世損春心。封侯未遂空投筆。結客無成枉散金。夢裏陳書仍痛哭。縱橫殘淚枕痕深。

送頌臣之臺灣

八之五六  
七共三首

殘壘過南嵌。孤城枕北江。鬼雄多死別。人士半生降。戰氣花間堞。夷歌柳外艣。傷痍猶滿目。愁煞倚篷窗。

親友如相問。吾廬榜念臺。全輸非定局。已溺有燃灰。棄地原非策。呼天儻見哀。十年如未死。捲土定重來。

王氣中原在。英雄識所歸。爲言鄉父老。須記漢官儀。故國空禾黍。殘山少薜薇。渡江論俊物。終屬舊烏衣。

頌臣謝姓名道隆臺灣廩生義軍壯字營統帶參帷幕事敗同內渡 南嵌北江均臺灣地名

重送頌臣

惻惻重惻惻。行人適異域。華夷忽易地。何處爲鄉國。車馬多離聲。川原帶行色。同來不同往。欲語涕沾臆。論交本世好。古誼吾所式。結髮論文字。廿載忘形迹。海氛忽東來。義憤不可抑。出君篋中符。時艱共戮力。書生忽戎裝。誓保臺南北。

當時好意氣。滅虜期可刻。何期漢公卿。師古多讓德。忽行割地議。志士氣爲塞。刺血三上書。呼天不得直。北垣遽中亂。滿地淆兵賊。此間非死所。能不變計亟。親在謀所安。況乃虜烽迫。乾坤已中變。萬怪競荒惑。人情易翻復。交舊成鬼蜮。君亦挈家來。航海期不忒。得君意中慰。歸粵途始卽。卜居家再遷。山中事稼穡。與君此偕隱。山水況奇特。君言暫歸視。尙有舊廬室。來如潮有期。信在期不失。聞君言未畢。哀淚弗能拭。翹首滄海東。蒼波渺無極。昔時乾淨土。卵育長鯨匿。吾兄去秋往。三春阻消息。因君速歸駕。異類安可憊。願君信如雁。勿竟誓成劓。歸途逼炎景。珍重慎眠食。到時常寄書。千里若門闕。書來君不來。累我長相憶。形影爲君單。語言爲君默。我欲從君往。天不假羽翼。時因西風夕。吹夢到君側。送君詩盈幅。難展腸結轡。詩成復自寫。不辨淚和墨。願君置懷袖。長鑒此悃悞。

交舊成鬼蜮指呂某叛降倭事

春愁

春愁難遣強看山。往事驚心淚欲潛。四百萬人同一哭。去年今日割臺灣。

臺灣人口合閩粵籍約四百萬人

### 鐵漢樓懷古

瘴雲飛不到城頭。庵祀樓荒客獨遊。並世已無真鐵漢。羣山猶繞古梅州。封章故國回天恨。夢寐中原割地愁。欲倚危欄酬杯酒。程江嗚咽正東流。

鐵漢樓在梅縣城北門宋時建以表劉元城之節者元城貶梅州不以險阻動心蘇軾以爲鐵漢也

### 凌風樓懷古

依舊危城隱霧中。麗譙殘榜署凌風。逃亡君相成行國。破碎河山失故宮。地似西臺宜痛哭。客歸南嶠愴孤忠。欲移卦竹栽千本。徧灑天涯血淚紅。

凌風樓在梅縣城南門紀念宋文天祥丞相者也文天祥過梅州詩有樓角凌風迥孤城隱霧深萬事隨轉燭秋光近青岑句明潮州知府郭子章建樓摘句爲樓名

金山弔宋安撫使摧鋒寨正將馬發墓

一州斗大負將軍。龍去厓門冷陣雲。並代汗青丞相節。全家葬碧使君墳。艱難殘局英雄淚。零落遺碑弔客文。千古韓江嗚咽水。鳳城東畔送斜曛。

金山在今潮安縣城北有南宋末摧鋒寨正將馬發祠墓

往事

往事何堪說。征衫血淚斑。龍歸天外雨。鼉沒海中山。銀燭鑿詩罷。牙旂校獵還。不知成異域。夜夜夢臺灣。

去歲初抵鮑江今仍客遊至此思之憮然

首二

琴劍蕭然尙客遊。海天容易又經秋。渡江人物消沉盡。誰識當時第一流。淪落天涯氣自豪。故山東望海雲高。西風一掬哀時淚。流向秋江作怒濤。

鮑江卽汕頭

香港書感

二首



海色不可極。西風吹鬢絲。中朝正全盛。此地已居夷。異服魚龍雜。高巢燕雀危。平生陸沉感。獨自發哀噫。玫瑰紛流劫。芙蓉此煽妖。效靈無海若。得志有天驕。奇麗開荒島。憑凌歎小朝。秋風散涼意。熱血苦難消。

### 鎮海樓

首二

獨上層樓唱越風。尉佗城郭夕陽中。九州南盡餘滄海。萬里秋高作寓公。旌節雄藩秦塞改。衣冠故國楚庭空。倚樓欲寫興亡感。依舊江山霸氣雄。高踞仙城最上頭。萬方多難此登樓。金湯空抱籌邊略。觴詠難消弔古愁。絕島風塵獅海暮。大江雲樹虎門秋。蒼茫自灑英雄淚。不爲憑闌憶故侯。

鎮海樓即今廣州市北五層樓附近有南越王趙佗古蹟

### 答陳頤山見贈

次韻

讀罷新詩淚滿巾。乾坤蒼莽正風塵。五洲消息紛傳線。萬里梯航競駕輪。朝議

朱厓傷棄地。邊烽遼海厄。歸人相逢莫。話流離感。未死終留報國身。

長句贈許仙屏中丞并乞書心太平草廬額時將歸潮州

江波不作河安流。春風嶺海建節樓。籌邊賴有重臣在。朝廷南顧今無憂。自從互市啓海禁。一衣帶水連五洲。驅雷策電馭水火。碎裂大地分全毳。恃其弔詭肆要挾。但有槃敦無共球。縱橫掉闔等戰國。勢將迫我爲宗周。況乃東粵本始釁。門庭伏寇森戈矛。邇來颺車欲西動。更虞瞰我從上游。威之不畏德不感。中樞術已窮懷柔。海南萬里得安堵。所恃元老能壯猷。方今議者利變法。我法不用寧非羞。況有治人無治法。若爲國計宜人求。惟公抗古獨持論。會當入告宣嘉謀。有客哀歌動天地。蹈海不死生猶偷。南來謁公辱庭見。五羊城郭方清秋。天涯淪落苦無著。荷公還我東揚州。賣文儻得買山價。草廬擬築山之幽。前身太華老道士。黃庭一卷供清修。以心太平署廬榜。乞公大筆千秋留。聞公課吏言所志。補義取我瓊山丘。

公課屬吏以大學術義補命題

太平無事儻有日。定許閒暇娛清游。此事難期此心在。乾坤浩蕩消邊愁。吁嗟乎丈夫生當爲八督州。取萬戶侯。不然儒冠世方厭。徑須學道尋羅浮。乞公之書爲公謳。狂奴之態公勿笑。江湖此去行扁舟。公致太平儻我覓。且看東南劍氣凌斗牛。

許仙屏名振煒時爲廣東巡撫爲公請旨回籍海陽

仙屏中丞見和前詩感事述懷疊韻奉答

一三之

黃塵遮斷海天春。劫外餘生倍愴神。國豈尙文方積弱。士爭橫議欲維新。陸沈應咎王夷甫。道隱思爲賀季真。鹿走鴻哀嗟滿目。更誰抗疏恤遺民。

羊城中秋

二三之

故鄉風景想依然。月滿東南半壁天。海外陰晴終有定。人間圓缺古難全。重完破碎山河影。與結光明世界緣。甲帳珠襦尋舊夢。不知今夕是何年。

廣州晤劉葆貞編修可毅

漠漠連天海氣昏。越王臺上望中原。何人更下新亭淚。有客同傾濁酒尊。月旦  
汝南逢許劭。謂許仙  
屏中丞人才江左數劉琨。與君欲作聞雞舞。夜半寒濤撼虎門。

虎門在珠江口

贈梁詩五孝廉

二首

五十不卿相。公才負黑頭。艱難困衣食。著述慰窮愁。天意方難測。人材世鮮求。  
誰知梁叔敬。生待取封侯。  
潦倒天南客。登臺弔尉佗。相逢劇如故。當哭有長歌。西日天方暝。東風海正波。  
何當奮雄略。拔劍斫蛟鼉。

梁詩五孝廉名居實嘉應州白土人時主講廣州應元菊坡等書院

秋懷

八首

如此乾坤付越吟。賸將詩卷遣光陰。鏡中白髮愁來早。衣上緇塵劫後深。半壁  
河山沉海氣。滿城風雨入秋心。留侯博浪椎無用。笑撫殘書酒獨斟。

古戍斜陽斷角哀。望鄉何處築高臺。沒番親故無消息。失路英雄有酒杯。入海  
江聲流夢去。抱城山色送秋來。天涯自灑看花淚。叢菊於今已兩開。  
策策西風吹晚涼。驚秋人送雁南翔。海山縹緲半煙霧。澤國蕭條初雨霜。誰許  
半千論古陣。且逢重九醉他鄉。莫嗟欲濟無舟楫。待起鼉鼉與架梁。  
箋天誰爲寫離憂。愁大翻憐隘九州。明鬼逕須從墨翟。望洋聊與說莊周。等身  
書卷供行路。故國山河入倚樓。怕向天涯舒倦眼。伏風闌雨不成秋。  
暫息邊烽強自寬。出門西笑說長安。金縉商保太平局。冰炭磨成清要官。南嶠  
流移傷百越。東藩淪陷痛三韓。驅車欲去仍留滯。風雪關河怯早寒。  
連天衰草悵蕭辰。顛顛秋風淚滿巾。果下近游思貫馬。蘆中小隱任呼人。渡江  
早慮胡分晉。蹈海終撓趙帝秦。收拾鈴韜付兒輩。乾坤潦倒腐儒身。  
莫笑談瀛膽氣羸。眼前時局古來無。未容樊噲誇功狗。終遣林宗歎屋烏。浮海  
已憐吾道廢。移山誰憫此公愚。江湖再作扁舟計。滿地秋容雪點蘆。

菊恨蘭悲。闕衆芬。天南半落。悵離羣。客愁竟夕。憐江月。鄉夢千重。隔嶺雲。長笛  
且吹新道調。短衣誰識故將軍。雄心消盡閒情在。四海無家獨賣文。

時由臺內渡已週歲 以上丙申作

第二 丁酉戊戌集 (潮州課士期)

海軍衙門歌

同溫慕柳  
年作

大東溝中礮聲死。旅順口外逃舟駛。劉公島上降旛起。中人痛哭東人喜。旁有西人競嗷訾。中國海軍竟如此。衙門主者伊何人。萬死何辭對天子。坐糜廿三行省萬萬之金錢。經營慘淡三十年。衙門循例保將領。翠翎鶴頂何翩翩。南軍北軍合操日。礮雲蒼起遮蒼天。羣輪輾海迷青煙。謂此足當長城堅。一東人耳且不敵。何況西人高掌遠蹠紛來前。我不能工召洋匠。我不能軍募洋將。衙門沈沈不可望。若有人兮坐武帳。早知隸也實不力。何事揮金置兵仗。戰守無能地能讓。百萬冤魂海中葬。購船購礮仍紛紛。再拼一擲振海軍。故將逃降出新將。得相從者皆風雲。風雲黯淡海無色。太有他人軒吾側。樓船又屬今將軍。會

須重鑄六州鐵。寶刀拜賜趨衙門。軍中豈知天子尊。斂縮海界張軍屯。海風晝  
嘯龍旗翻。天吳海若羣飛奔。陰符祕授鬼莫測。何取書生紙上空言。噫吁乎  
書生結舌慎勿言。衙門主者方市權。

溫慕柳名仲和嘉應州松口人已丑翰林

寄家菽園孝廉偉葵新嘉坡二首

韓蘇筆力不到處。石破天驚自著書。未悔居夷從鳳鳥。真看橫海掣鯨魚。河山  
煙點齊州外。文字雷屯草昧初。聞說雞林爭購集。百蠻齊拜孝廉車。  
中原有客正悲歌。事去曾揮指日戈。誰解聞鼙思將帥。誓將傾篋障江河。詩篇  
涕淚唐天寶。夢寐賢良漢特科。遙寄尺書滄海曲。古來義士島人多。

丘菽園名煒葵福建海澄人經商南洋

聞膠州事書感

漢家長策重和親。重譯傳經許大秦。祆廟屢聞生憤火。蓬山又見起邊塵。青州



酒斷愁難遣。黃海舟遲信未真。慷慨出門思弔古。田橫島上更何人。

德人因教士被殺強占膠州灣

### 歲暮雜感

首十

極日寒山落照遲。邊風臘臘捲牙旗。黃犀入貢非今日。白馬馱經異昔時。山海龍呼愁變夏。春秋麟泣戒書夷。千年妖火彌張燄。太息流傳景教碑。

電駭雷驚局屢新。夢中愁見海揚塵。九夷何地容嬉鳳。兩曜兼旬厄鬥麟。赤縣鴻流堙息壤。紫垣狼燄迫勾陳。鄒生漫詫談天口。吹律先回黍谷春。

雲中雞犬換流年。塵世訛聞劫火燃。玉斧全功收畫地。金輪餘燄起遮天。元王故國愁宮黍。白帝新都問岳蓮。終見神符興赤九。不應流淚到銅仙。

輪轉坤輿急景催。凍雲天末送愁來。棲殘彩鳳宮梧老。彩一作赤賣斷蘆龍塞草衰。

驛遠江南梅未落。園荒河北李仍開。月寒日暖憂煎壽。且勸飛光酒一杯。

崑崙餘幹走滄溟。考異須占極外星。殺運百年兵氣白。飛機萬里石雲青。熬沉

難定三神位。龍戰將移五岳形。塵穢海州談國勢。消寒閒檢赤靈經。  
一曲昇平淚萬行。風塵戎馬厄潛郎。民愁競造黃天說。歲熟如逢赤地荒。七貴  
五侯金穴富。白山黑水鐵車忙。老生苦記文忠語。多恐中原見鶩章。  
五洲雲擾角羣雄。幻出樓臺蜃氣中。環起殺機愁易宿。飮聞怪事嬾書空。八風  
裂竹乖倫律。九日爭桑拒羿弓。說佛不妨妨說鬼。飛燐早已逐韓公。  
牢落高陽舊酒徒。缶聲悽絕唱烏烏。極知王屋移非計。坐惜神叢借已枯。老驥  
負車鳴折坂。饑鷹驅雀下平蕪。人間剝復關天運。醉看梅花九九圖。  
寒宵讀史一燈深。眼底浮雲變古今。卒懦無狐篝楚火。士愚有狗鬥秦金。故應  
積氣天難墜。何致清談陸便沉。上界不知人事苦。但聞開讌奏元音。  
卜居何處是南村。說虎翻憐市語喧。銅鼓嶂高山雪盛。紅羅沙近海雲昏。大陰  
守歲愁兵氣。故國逢春愴夢痕。爛爛桃花過殘臘。人間無路訪仙源。

白山黑水鐵車忙指俄築中東鐵路事鶩章俄之國徽也

銅鼓嶂在嘉應州東南八十里周百

餘里與海陽大埔二縣接界 紅羅沙在臺灣西海岸

除夕詩三首

百年鼎鼎三去一。百事不能能執筆。規天撫地願未畢。坐廢一萬二千日。徒費精神了無益。手攜詩卷行天涯。百事不成成者詩。詩能窮爾爾不知。可憐除夕復祭之。有脯在俎酒在卮。梅花一笑回春姿。弄筆尙自吟南枝。

長蛇東來飢而貪。我欲斬之力不堪。坐令閭井歧商參。故居縹緲海色藍。羈棲復築山中庵。此身乃虱江城南。今夕何夕陳酒果。一家分照圍爐火。海闊山遙定思我。今夕不寐寐應可。東風吹夢雲萬朵。劍光入海長蛇墮。長嘯故山侍親坐。

歲何可守乃守歲。老大尙爲兒女事。歲去重關不能閉。歲何須餞乃餞歲。一尊甫陳萬感至。醒眼悶看司命醉。平生媚竈苦不工。坐令三十彌困窮。何人設祀黃羊豐。家擁金穴身三公。仰天愁睇青濛濛。但見斗柄春回東。

以上丁酉作

### 戊戌元旦試筆

麟筆書春後。將銘絕世功。馳書諭殊域。草檄下羣雄。滄海波全定。神州日再中。東西朔南暨。齊頌黑頭公。

### 答臺中友人

首三

極目風濤愴夢思。故山迢遞雁書遲。渡江文士成僮父。歸國降人謗義師。老淚縱橫同甫策。雄心消耗稼軒詞。月明海上勞相憶。悽絕天涯共此時。

抱石申屠劇可憐。

臺人有買於泉州者聞亂家亡投萬安橋下而死

一庵待死伴枯禪。

內渡後有諸生爲僧湛身

難訴遺民苦。殉義誰彰故部賢。

謂部下吳徐姜丘諸將領

碧血縱埋非漢土。赤心不死尙唐

年。臺中義士尙奉中國正朔扁舟但益飄零感。過海何曾便是仙。

歸來誰與話酸辛。滿目茫茫劫後塵。末俗囂凌欺客戶。長官尊重薄流民。本無曠土容安插。難恃高文濟困貧。冷守平生心迹在。朝衫零落泣孤臣。

元夕無月首五

滿城燈市蕩春煙。寶月沈沈隔海天。看到六鰲仙有淚。神山淪沒已三年。  
三年此夕月無光。明月多應在故鄉。欲向海天尋月去。五更飛夢渡鯤洋。  
鯤雲夢斷夜潮寒。佳節偏憐見月難。十二樓臺春寂寂。滿身花露倚闌干。  
倚闌癡待月華來。萬斛春愁酒一杯。恨煞蠻雲遮隔住。東風無力爲吹開。  
蠻雲黯黯海天昏。冷對春燈憶夢痕。今月縱明輸古月。更無人說奪崑崙。

乙未割臺至戊戌滿三年 鯤洋臺灣別名以臺有七鯤身海口也

說潮五古十七之  
二十四

鬱鬱金城山。上有千歲松。峩峩馬公墓。過者懷孤忠。全家碧血葬。遺碣蒼苔封。  
我來弔昔賢。林影斜陽紅。登山曠四矚。遙接滄海東。山石儼伏虎。銘者爲俞公。  
公當有明時。平倭著奇功。載觀沒羽字。如見揮戈雄。死者不復生。生者多庸庸。  
至今滄海上。日夜生夷風。

馬發海陽人南宋末德祐時爲摧鋒寨正將署州事元兵迫潮城守令懼走發獨慰勞將士堅守

不屈戰敗仰藥死全家殉之 金山在潮州城北一名金城山上有馬發墓祠及俞大猷立碑

陽明昔撫虔。且戰且講學。中離薛先生。舉家侍講幄。猶子方登朝。死諫節已卓。  
惜哉真鐵漢。一疏官復削。青衣拜節歸。京塵手親濯。中離溪湯湯。中離山嶽嶽。  
夜半聞鐘聲。誰歎實先覺。維時講良知。仁夫尤卓犖。建策平交南。持節鞏邊朔。  
斯誠陽明徒。邊材獨騰踔。竟忤仇嚴歸。風節更雄倬。滄海今揚塵。邊警喧鼓角。  
不能事兵戎。何以興禮樂。斯材不可得。令我思悠邈。斯材縱可得。欲出傷謠詠。  
河流自西來。頽波日以濁。三河河上墳。豐碑半殘駁。

薛侃字尚謙揭陽人明正德間進士叔姪舉家師王守仁結齋中離山自號中離以建儲事忤朝  
旨不屈人稱真鐵漢復上疏被削爲民講學羅浮而終 翁萬達揭陽人字仁夫明嘉靖進士平

安南廣西亂總督山西宣大保定軍務修築邊牆性忠孝剛勇任事善御將士喜王學卒謚襄毅

葬大埔縣西之三河

聞海客談澎湖事

絕島周星兩受兵。可憐蠻觸迭紛爭。春風血漲珊瑚海。夜月燐飛牡礪城。故帥拜泉留并記。孤臣掀案哭雷聲。不堪重話平臺事。西嶼殘霞愴客情。

西嶼澎湖三十六島之一 珊瑚牡礪皆澎湖海產

得頌臣臺灣書卻寄

故人消息隔鄉關。花發春城客思閒。一紙平安天外信。三年夢寐海中山。波濤道險魚難寄。城郭人非鶴未還。去日兒童今漸長。燈前都解問臺灣。

寄懷維卿師桂林八之七

極目蒼蒼八桂林。春風迢遞客愁深。峯迴獨秀孤雲遠。江入相離別夢沈。閱歲但增歸鶴感。窺天難測剪鴉心。刺船人去波濤急。悽絕成連海上琴。鼉憤龍愁戰氣昏。東來應有未招魂。平安梅嶠遲雙鯉。變幻桑田痛七鯤。珠蕙餘生安下澤。金甌全局哭中原。不曾竟落權奸手。歸養林泉是國恩。

百疏哀陳阻九閩。東南形勢繫鯤洋。留黔臣敢希莊蹻。守絳民思磔聶昌。計竭  
拒秦全上黨。力圖戴晉等前涼。千秋成敗憑誰論。回首臺山淚萬行。  
輪鐵南交走電駟。蒼梧西上又揚舩。河山破碎羊腸險。樓閣空濛蜃氣腥。百粵  
安危關互市。五洲消息迫重溟。謝公高臥應難穩。絲竹中年帶淚聽。  
消耗雄心強自寬。家園春讌正承歡。閒居境偶同潘岳。大事人終遜呂端。落日  
聞聲思上將。空山觀奕感長安。可能再爲蒼生出。莽莽神州海色寒。  
十年劍佩記追隨。鹿耳驚濤愴夢思。鐵馬金戈春教戰。錦袍銀燭夜談詩。荒山  
鏡影悲今日。殘月鐘聲異昔時。欲寫哀歌寄天末。紅棉飛遍越王祠。  
牙旂玉帳捲東風。絕島同歸患難中。故國愁春三月閏。遙天尋夢一星終。鐵衣  
繡雨蠻花碧。銅鼓椎潮劫火紅。袖手南洲觀戰局。山林未許老英雄。

一首 獨秀峯在桂林 相離廣西之江水名

二首 七崑身在臺南府



六首 鹿耳門在臺南府海口

次韻答陶生

名鵬保字賓南丹徒人  
改名鴻勳後改名遜

戴晉無王猛。亡秦有李斯。海魚容自化。山鬼漫前知。天道終難測。人心儻未離。  
中興由一旅。慎勿負心期。

潮陽東山張許二公祠爲文丞相題沁園春詞處旁卽丞相

祠也秋日過謁敬賦二律

夜半元旌出嶺東。文山曾此拜雙忠。百年胡運氣何惡。一旅王師氣尙雄。滄海  
夢寒天水碧。沁園歌斷夕陽紅。荒郊馬冢尋遺碣。秋草蕭蕭白露中。

石闕蒼荒一逕深。悲秋懷古此登臨。九州難畫華夷限。萬死思回天地心。安知地

心張也南客旅愁觀海大。東山雲氣壓城陰。斜陽照起英雄恨。枯木寒鴉淚滿襟。

東山張許二公祠一名雙忠祠文天祥曾在此題詞拜祭並葬焉 東山在潮陽縣東三里

對月書感 二首

明月出滄海。我家滄海東。獨憐今夜見。猶與故鄉同。喪亂山河改。流亡邑里空。相思祇垂淚。顧影愧歸鴻。把酒酌明月。客懷殊不歡。流光當此夕。照夢到長安。水落龍愁夜。山空鶴話寒。中天宮闕迴。孤對嶺梅看。

答王曉滄廣文 次韻

漫說曾驅十萬師。河湟收復竟無期。秋風老驥思千里。故國鷓鴣困一枝。醇酒悲涼公子淚。麻鞋奔走小臣詩。勞君尙記虬髯傳。心冷全輸此局棋。

王曉滄嘉應州鷓鴣凹人拔貢生

十四夜月

四萬八千戶。將完玉斧功。看成地球橢。攝起暮潮雄。勢已羣星避。光先四海同。山河終一統。留影大瀛東。

憶舊述今答曉滄見贈十絕句

次韻選  
八首

莽莽乾坤歲又周。尊前人滅舊風流。江山滿目都非昔。不待人言意始愁。  
哀絲豪竹負中年。棄甲南來異錦旋。十載風塵雙鬢雪。剪燈情話更悽然。  
涕淚何曾為酒悲。干戈滿地愴離思。流亡南渡誰收恤。愁說江淮唱義時。  
冠裳全異昔時觀。籌保東藩力已殫。海上貢貂稀閒使。詔書行不到三韓。

風雪關河有夢還。海天漠漠對孤鷗。暗香疏影寒溪月。萬樹梅花憶故山。  
寒溪在

海國詩壇舊主盟。登臺坐對玉山清。斐亭鐘絕風流散。落日寒蕪赤嵌城。  
在斐亭

海國詩壇舊主盟。登臺坐對玉山清。斐亭鐘絕風流散。落日寒蕪赤嵌城。  
在斐亭

海國詩壇舊主盟。登臺坐對玉山清。斐亭鐘絕風流散。落日寒蕪赤嵌城。  
在斐亭

熱血填胸鬱不涼。騎麟披髮走南荒。未酬戎馬書生志。依舊吾廬榜自強。  
自強

為予舊齋類今  
擬重書以自勵

行蹤曾為荔枝留。琴劍西風記昔游。獨上朝臺弔斜日。短衣匹馬過南州。

玉山在臺灣嘉義縣東北三峯並列人迹罕至終歲雪封為臺島最高山倭佔臺後更名新高山

赤嵌城在臺南安平縣荷蘭人所建 朝臺在廣州

贈馬總戎 四之二四  
共二首

戰氣不可極。黯然滄海東。九州誰健者。萬里靖邊戎。南海新除重。西林舊部雄。  
黃金印如斗。終待立奇功。  
我亦相時者。結交多偉人。平生好男子。不帝虎狼秦。入世心肝古。談兵天地春。  
相逢各珍重。八極正風塵。

馬總戎名維騏號介堂雲南哈迷州人

題康步厓中翰出塞集 七之二三  
六共三首

王大司空蓋虎牙。英雄故里客停車。漁陽突騎都非昔。惆悵雲臺說漢家。  
王梁安陽

人登延瀛陽地  
皆承德府地

尋秋獨上白狼山。涕淚思鄉客袖斑。匕首千金詩一卷。秋風匹馬入榆關。  
白狼山今

名布右圖山  
在建昌縣

九邊烽火迫金臺。客唱新添塞上哀。更築長城防不得。驚章南下老羌來。塞外

俄人曰  
老羌

康步厓福建上杭人

### 題畫竹四之一

拔地氣不撓。參天節何勁。平生觀物心。獨對秋篁影。

以上戊戌作



### 第三 己亥集 (倡導新學期)

#### 和平里行 有序

和平里三字碑、爲文丞相書、潮中志乘罕有載者、潮陽縣志云、景炎三年十月、文丞相率師駐潮陽之和平里、討叛將劉興、陳懿、懿敗去、擒興戮於和平之市、按此卽公集杜詩序所謂稍平羣盜人心翕然也、興懿故劇盜、歸正復叛降元者、故公詩序及史皆書曰盜、從其朔也、志曰叛將、定其後罪也、惟志以爲景炎三年十月則誤、應從史作祥興元年、是年五月已改元、十月不得復繫景炎、志蓋誤以明年方改元也、是役也、鄒瀛劉子俊兵皆會、潮中人士亦多効忠赴義者、故曰人心翕然也、逆懿已走、遂引元師襲公、於是五坡嶺之役、志云十二月二十日、與通鑑云閏十一月者不合、然事較詳、志云時公吞腦子不死、復還潮陽見張宏正於和平里、大罵求死、不得、越七日、始見張宏範、不屈、宏範客禮之、時爲歲除前三日、祥興二年春正月、公遂發潮陽、陳懿後爲其子

所殺云、謹按、公駐潮陽、於雙忠祠蓮花峯外、事蹟則在和平里爲多、里中今有文忠過化坊、卽爲公作者、其先後駐此當較久、宜其得爲里人作此書、縣志則永樂、景泰、成化、宏治、四志均佚、今志則云里舊名蠓墩、公始易今名、碑未載、又云公在軍常不寐、至此始安寢信宿、以地氣和平、故名之、則父老傳聞、恐非公當時意、此與里人所云、鑄公書於碑、樹之里門、蠓遂徙去者、意皆非事實、意介舊有今無者、亦事之常、蠓非鱷比、徒何爲者、但里人以此增重公書、與韓公文作比例、意亦良厚、可姑存其說耳、書法厚重奇偉、非公不能作、審爲真蹟、碑連龜趺約高九尺許、大字三、曰和平里、字每高二尺許、小字九、曰宋廬陵文山文天祥題、每字二寸許、碑陰亦有字、漫滅不可辨、光緒己亥春二月、逢甲來潮陽、過斯里、得拜觀焉、謹賦長句傳之、以告後人之憑弔忠節與志潮中

金石者、

蓮花峯頭望帝舟。雙忠祠前吟古愁。日星河岳浩然氣。大筆更向蠓墩留。里人敬忠寶遺字。未入南中金石志。我來下馬讀殘碑。弔古茫茫滿襟淚。三閩四廣何蒼黃。胡塵上掩天無光。力支殘局賴丞相。間關萬里來潮陽。雙髻峯高練江



曲。長橋小市駐行囊。破碎河山小補完。警枕中宵睡初熟。於時人心方翕然。盜  
魁擒馘尸軍前。四方響應大和會。祥輿天子平胡年。里改今名定斯義。豈爲南  
中好天氣。幕府流離半死生。可惜無人述公意。更取千秋名鎮名。軍中鳳叔爲  
留銘。千秋鎮銘。鄒鳳陽。作鎮舊屬潮陽。當時赤手扶天意。誓欲界勿東南傾。五坡嶺邊鼓聲死。丞  
相北行殘局已。復壁猶藏痛哭人。此邑民原多義士。五坡之敗。謝翱。匿潮陽民間。東山誰築  
丞相祠。英風如見提師時。手酌睢陽守臣酒。口吟杜陵野老詩。殘疆更祝和平  
福。自爲里人書此幅。墨瀋淋漓玉帶生。鐫上穹碑石痕綠。屢經劫火碑難燒。碑  
趺矗厲臨虹橋。虹橋今名和平橋。宣和間僧大峯築。江流橋下水碧。行客能言炎宋朝。大峯北  
宋公南宋。淒涼君國彌增慟。此橋曾過勤王師。斜日寒潮滿橋洞。魯戈迴日難  
中天。潮生潮落穹碑前。粵潮有信杭無信。空嗟三日簽降箋。南來未盡支天策。  
碧血丹心留片石。壯哉里門有此觀。大書三字碑七尺。字高二尺奇而雄。筆力  
直追顏魯公。旁書九字盧陵某。過者千古懷孤忠。碑陰何人識何語。詢之里人

不能舉。獨有公書永不磨。卓立四朝閱風雨。蠓何爲者避公書。帖然徙去如鱷魚。爾雖么膺識忠義。愧彼賣國降虜奴。安得石闌周四角。上復以亭備棖桷。公書縱道神物護。亦恐年深或斑剝。平生我忝忠義人。宋史詔收恤流散忠義人謂江淮來歸國者浪萍還剩浮沉身。壺盧墩畔思故里。壺盧墩在臺灣縣北近予故居義師散盡哀孤臣。凌風樓頭爲公弔。嘉應故梅州有凌風樓爲公作予丙申過此有用公詩振華樓頭夢公召。丁酉夏在韓山書院夢見公振華樓書院中樓也眼前突兀見公書。古道居然顏色照。斗牛下瞰風雲扶。願打千本歸臨摹。何時和平真慰願。五州一統胡塵無。

雙髻峯即會山在潮陽縣西二十里雙峯並峙 練江在潮陽縣南源出雲落山東入海

### 和曉滄買犢

平生慕馬援。邊郡事田牧。此志苦不成。牛後隨人逐。我家東海東。棄置委荒服。田間舊牛宮。羣夷酣食宿。誅求遍雞豚。何況牛大畜。田家苦此累。不令啻養犢。惟昔大牢公。實致維州覆。彼哉伊何人。得毋乃其族。遺民痛貽禍。恨欲食其肉。

至今亂未已。東望爲痛哭。何時得伏波。重使交趾復。我歸耕我田。漢書牛背讀。

### 西園重見詩畸刻本爲之黯然

斐亭鐘斷陣雲陰。杳杳相思入桂林。一卷琳琅才子語。維癸師昔贈詩有一十年不見丘才子句十

年鎖鑰老臣心。傳人妄計先災木。割地誰知竟賂金。重檢殘編春院夕。五更紅

燭淚痕深。

詩畸乃唐中丞在臺撫署時集門人幕客所作詩鐘也有公序文及作品 斐亭臺道署古跡

### 鄉間人有誤以予爲武進士者戲紀以詩

書生面目本槎牙。大息封侯念已差。漫說舊銜同武爵。頗聞外論比文蝦。內務府人

自侍衛曰蝦成同有翰林 出領兵者人證之曰文蝦老兵欲喚桓元子。故將誰知李左車。刁斗能銘矛

解用。丈夫何事愧劉巴。

### 答潘蘭史丘菽園用王曉滄韻

龍血元黃戰正酣。海山何處築詩龕。權書枉著蘇明允。心史空留鄭所南。斫地

有歌哀驥老。攀天無路阻鸞駝。蠻雲黯黯愁思闊。聊寫新詞當塵談。

潘蘭史番禺人孝廉善詞章

### 鮀浦喜晤蕭伯瑤夜話

驚風倒吹瘦蛟舞。海底鮫人泣珠雨。客樓一夕千秋語。幢幢燈影鬚眉古。天涯等是淪落人。筆花黯淡愁不春。不堪更訴蟲沙劫。九州舉目皆鯤身。長劍依天悲未遇。流布人間賸詩句。乾顛坤搖臥不穩。睡龍夜瞰風雲氣。

蕭伯瑤名馥常潮陽生員

### 風雨中與季平游東山謁雙忠大忠祠兼尋水簾亭紫雲巖

諸勝

疊與伯瑤  
夜話韻

萬石棒雲鬱飛舞。神龍出布狀元雨。寒鴉無語杜鵑語。心憫大忠來弔古。等是金鰲背上人。悲歌重寫沁園春。河山一統初破碎。繫余更屬浮萍身。零丁洋邊與君遇。靈威廟前誦遺句。同措遠日青山間。一髮中原夕陽氣。

夏季平名同和一字用卿貴州人狀元 靈威廟在潮陽東山麓卽雙忠祠祀張巡許遠 大忠

廟在靈威廟左祀文天祥

柳汀贈詩述及臺事答之登前韻

東海餓蛟作人舞。萬里礮雲挾槍雨。相公款關奉盟語。玉斧一揮恨終古。天南  
流落忠義人。披髮呼天天不春。臣軍請纓雲請劍。疏草劫燼餘吟身。傷心豈獨  
士不遇。涕淚花前吟贈句。婦人醇酒足此生。老天不喜英雄氣。

柳汀姓莊江蘇人孝廉

祝文信國公生日日得伯瑤風雨中見懷詩答寄二首登前韻

大忠祠前陳羽舞。閃閃雲旂降風雨。荒山夜出英靈語。如聞此會足千古。誰其  
尸者獅山人。季平自號獅山人萬里來話瓊林春。會者齊吳楚閩粵。來祝帶血啼鵲身。

馬何卿秀才生於齊莊柳汀孝廉是於吳馬翠飛  
孝廉生於楚予臺人臺故隸閩餘諸子皆粵人也

此會惜君未得遇。五日江風阻詩句。來函雨阻遲到西臺莫唱朱鳥吟。東山尙蟠冷龍

氣。

癡龍兀挾雲陣舞。海天十日九風雨。脈脈隔江不得語。冒雨尋僧禪趣古。與選日

平諸人遊  
遊東四岩

何期海上聽潮人。心花怒發天地春。豪吟杜陵洗兵馬。天涯慰我哀時身。開緘喜若與君遇。頓釋愁懷誦詩句。雲陰蔽天無斗牛。漫倚樓闌看劍氣。

### 答夏季平

二首用前  
遊西岩韻

舊恨新愁滿海天。封侯休說面如田。鳳饑何計翔千仞。龍蟄真憂到九泉。白馬潮來悲往事。紅羊劫換感流年。西山薇蕨無人問。且話蓮花六葉禪。

寥空雙鶴破蒼冥。睥睨千秋佛乞靈。霸國山川吟粵嶠。翰林風月憶柯亭。身經憂患先頭白。名著文章愧汗青。十萬軍聲來夜半。問潮泉畔且同聽。

### 韓祠歌

同夏季  
平作

前溪後溪海氣黃。東山西山山色蒼。臨崑邑徙新興鄉。誰歟主者韓侍郎。闢佛不得來南方。其年元和國號唐。八千里路嗟潮陽。嶺雲不熱關雪涼。泰山北斗

公文章安知天使文蠻疆。畀易椎結爲冠裳。止入閱月教澤長。風雷驅鱷宵奔亡。禱雨大湖歲乃穰。兩至相度溪山旁。乃移新邑居中央。先立學校登秀良。餘事更爲游山忙。去乃留衣老僧堂。公德在民民不忘。千年雄邑成金湯。祠公東山慰民望。青山碧海開堂皇。公衣冠坐清而剛。森森古木皆甘棠。官吏習禮交趨蹌。春秋薦馨如烝嘗。推公遺教道益彰。講院前關環書廊。後翼以樓奉文昌。祀朱子兼周程張。齋舍書聲夜琅琅。我歸黔突初不遑。前年韓山留瓣香。今年東山陳脩羊。爲趙天水何敢當。海南閒弄明月光。海水四立天蒼茫。山精白日爭披猖。安得巨刃摩天揚。手馘長鯨剗封狼。思公不見心徬徨。騎麟披髮下大荒。獅山山人何昂藏。萬里訪我浮海航。寶劍夜解千金裝。出示肝胆騰光芒。相與謁公神慨慷。誓繼公志迴瀾狂。骨蒸仇國無能強。磨蝎厄宮無能殃。手持芙蓉方南翔。中天霞擁雙鳳凰。前山龍首扶雲驤。南風吹雨聲浪浪。

乞夏季平重書文信國沁園春詞並拙作雙忠廟聯語

首二

枯木寒鴉夕照遲。大書深刻壁間詞。淋漓元氣千秋筆。儼雅堂前第二碑。  
輪囷肝胆定交初。同吊雙忠古憤摠。留與南疆談掌故。水曹楹帖狀元書。

文天祥謁東山雙忠廟沁園春詞 爲子死孝、爲臣死忠、死又何妨、自光岳氣分、士無全節、君臣

義缺、誰負剛腸、罵賊張巡、愛君許遠、留取聲名萬古香、後來者無二公之操、百鍊之鋼、嗟哉人

生翁歛云亡、好烈烈轟轟做一場、使當時賣國、甘心降虜、受人唾罵、安得流芳、古廟幽沈、遺容儼

雅、枯木寒鴉幾夕陽、郵亭下、有奸雄過此、仔細思量、

儼雅堂在雙忠廟

### 棉雪歌

紅棉飛絮、滿天如雪、此南荒奇景也、不可無詩、

南天珍木瑰奇絕。花作紅霞絮白雪。文章萬丈見光燄。誰意飄零更高潔。嶠南  
火維見雪稀。忽飄釵砌沾羅衣。初晴林雨苞全坼。微遇山風絮競飛。團似雪球



散雪氣海國遍尋遺種地。每苞散作百十球每球一子落地即生有飛越十里五里而一子生者炎荒得此大奇景。

赤日行天雪花墜。蘆花秋雪楊花春。入眼偏驚夏雪新。旁人莫妄疑輕薄。此花

肝胆原輪困。入時自作風流格。尙留清白人間說。偶教痼疾起煙霞。劫火不妨

燒雪魄。中鴉片烟毒者燒棉絮存性和茶子油飲之立起奇花曾爲吟春紅。長夏仍教住雪中。英雄心

性由來熱。待竟蒼生衣被功。

紅棉花別名英雄樹幹高花偉

### 夏夜與季平蕭氏臺聽濤追話舊事作

大海驚濤似昔時。高臺同聽不勝悲。五年鄉淚愁中制。半夜軍聲夢裏馳。鐵弩

何時開越國。素車終古走靈胥。如聞鹿耳鯤身畔。毅魄三更哭義旂。

鹿耳門七鯤身皆臺南府海口

### 謝詔安林呈材游戎天驥惠畫二首

廿載承恩玉殿前。丹青氣格老幽燕。南來話雨旌門裏。爲寫屏風繹海天。君舊官侍

石骨松心海鶴姿。將軍風格本權奇。何當揮灑驚人筆。畫出登壇拜將時。

送季平之澳門兼訂來約

二首

別我向何處。臨歧殊悵然。羣夷濠鏡宅。千里火輪船。互市開明代。飛機近百年。茫茫衆憂集。竟在有生前。

預計重逢日。歸途六月中。山川仍古越。人物幾英雄。把酒酌江月。卸帆談海風。行期早吾告。慎勿惜郵筒。

濠鏡卽澳門

春感

十首選一至八首  
次許蘊伯太令韻

一夜東風滿鳳城。春愁黯黯共愁生。新年鶯燕他鄉感。落日鯨鯢故國情。款局有人通秀吉。殘疆無計守延平。天涯何限哀時淚。灑向花前月不明。  
浮雲飛絮澹春前。夢憶蟣臣籲九天。照海旌旗忠義社。渡江帆楫永嘉年。遺殃

箕子明夷地。并割顏回負郭田。獨對東風倍惆悵。故山回首鬱愁煙。  
沉鬱雄心苦未灰。他年捲土儻重來。愁人斷句悲青坂。戰地殘槍臥綠苔。夢裏  
國讐慚越報。眼前兒戲感吳歎。故知塊壘澆難盡。且爲看花借酒杯。  
濛濛海氣遍東西。何日天戈許再提。華表空聞丁鶴語。亂萌先兆子規啼。飲河  
腹瀟千年濁。問道心驚七聖迷。五載傷春復傷別。懺除綺語未重題。  
誰遣風雷起螫龍。冥冥愁夜遞秋冬。夢回香國春三月。日極蓬山海萬重。置酒  
未聞平壽勃。奉書還見卓徵邕。欲將筆削修花史。墜溷飄茵聽所逢。  
九州無地不胡塵。難覓名山老此身。屢劃鴻溝開鬼國。更移犴獄避妖神。論交  
競鑿中央帝。搏土先愚上古人。莫向武陵尋舊夢。桃花零落不成春。  
動地春江走怒流。秀才心事慣先憂。越兵屢入靈胥眼。孔履同焚逆莽頭。白馬  
沸辱呼蹕至。青牛弭耳化胡游。最憐十萬橫磨劍。鍊作人間繞指柔。  
織素何必定歸胡。誰遣關中缺輓輪。獨客春心憐望帝。參軍蠻語歎媿隅。沉沉

大澤狐能語。黯黯鍾山鳥。自呼欲取奇。胘察時變。登臺先驗海星圖。

許蘊伯卽蘊白名南英臺灣人進士祖籍漳州

己亥五月二日東山大忠祠祝文信國公生日

五之一三五共三首

巖巖古潮陽。有山峙其東。下爲信國祠。額榜曰大忠。丹青半剝落。冠笏猶清雄。我來主此山。私淑懷愚衷。載稽登科記。降神緬維崧。是爲夏五月。萬樹榴花紅。令辰紀端二。致祝叩寢宮。憶公昔駐此。酌張許二公。祠碑儼在壁。馬冢荒原中。炎精忽不祀。支天難爲功。我今酌公酒。司令仍祝融。胡風西北來。邊愁浩無窮。河山易破碎。四顧憂心忡。何以邀公靈。海氣天濛濛。寒鴉幾夕陽。懷懷思英風。公生閱己亥。逮今十有二。公甫四齡時。頭角已頓異。屠維大淵獻。於時歲方次。念天生公心。畀出爲國瑞。安知國多難。飄萍感身世。艱難道路間。將相名空寄。當題詞東山。已表殉忠志。天傾不可柱。孔孟付仁義。溯題詞距今。六百廿一歲。三豕又渡河。來公駐師地。春水和平橋。讀公碑上字。東山拜公祠。紅棉晝飛絮。

一朵蓮花峯海風欲吹墜。落日望帝啼血灑。英雄淚宜振者人心。宜作者士氣。所願藉公靈。斯道成不匱。壽酒躋公堂。敬表希賢意。此意良無窮。種樹爲之記。桂蘊九天香。松鬱千年翠。夜望魁斗光。正照南離位。

蓮花峯在潮陽縣東南

庭蕉實方黃。荔子丹離離。擷之用薦馨。薄寄千秋思。有明蕭黃門。實肇爲斯祠。去今三百年。往烈誰攀追。蘭陵二生者。爲我陳牲犧。祝公自公義。繫我寧獨尸。佳客萬里來。新射策丹墀。與公天上名。俱書白玉碑。此來上公壽。香火緣可知。彬彬潮人士。登堂同觀儀。肅雍俎豆間。如見天人姿。左張而右陸。磊落雄鬚眉。東山富奇石。爲虎爲龍螭。石氣上爲星。寒燄生尾箕。睢陽兩忠臣。半夜來靈旂。比隣倘相呼。應訴君國悲。願公勿復悲。來歆此壽卮。同堂祝公者。願公爲之師。同持忠義心。以爲治平基。運會值大同。一統兼華夷。歲歲此祝公。清芬生鼎彝。勿誦炎午文。勿歌皋羽辭。淵淵金石聲。風雨方催詩。

蘭陵二生何人未詳 佳客萬里來指夏同和

### 東山酒樓放歌

丈夫生當爲祖豫州。渡江誓報祖國讎。中原不使羣胡留。不然當作李鄴侯。翩然衣白與帝游。天家骨肉畀無尤。胡爲祇學謫仙醉。到處吟詩題酒樓。今日何日東山陬。雲陰陰兮風颼颼。山中五月如清秋。補禊曲水觴可流。座中主客清且修。黃公後人今狀頭。裴中令裔新政優。蘭陵諸蕭才力適。人師我愧東家丘。儒書無能解國憂。乞乞食古心不休。飛蓬自轉落葉下。誰實作俑爲車舟。坐令機械生西歐。古制破裂不可收。天地日月驅作球。小儒咋舌大儒歎。逕欲問天窮所由。天公方醉了不酬。萬事變滅如浮漚。山川雖缺仍金甌。隴頭飛鳥入妖夢。夜半鳴狐思火篝。何如沉醉與天共。乞君太白爲我浮。浮之不盡羣客醉。何妨呼酌車前騶。自有此山數游者。昌黎文山皆吾儔。彼皆身取千古去。乃畀我任今日愁。海門西望海色幽。眼中一醉無五洲。

黃公後人今狀頭指夏同和。裴中令裔新政優指裴景福時爲潮陽令。蘭陵諸蕭才力逾指

蕭伯瑤。天家骨肉界無尤有暗指清慈禧太后囚德宗事。

### 饒平雜詩十六首之一

海雲南護六龍奔。悽絕辭郎酒滿尊。一曲平元萬行淚。紅螺洲上望厓門。紅螺洲即

辭郎洲爲邑人宋張都統達妻陳璧娘送夫奉義師勤王處平元曲璧娘作

百丈埔爲宋張丞相世傑夫人許氏大戰元兵殉節處舊有

祠廢久矣子惠署縣爲商復烈蹟

靈旂半夜偃胡風。百丈埔前戰血紅。異代雙忠更張許。男兒千古遜英雄。麻沙

故乘訛遺跡。舊志訛夫人爲尖人見明邑令丘金聲辨誤文禾黍秋原失寢宮。重表幽芳關廟貌。浮山

南望夕陽中。

黃子惠名恩時署饒平縣

東山感秋詞五首八月初六夜作次

痛哭秋風又一年。觚稜夢落練江天。拾遺冷作諸侯客。袍笏空山拜杜鵑。

天涯心逐白雲飛。瑟瑟秋蘆點客衣。回首大宛山上月。更無緘札問當歸。先母墓在

大宛山

斜日江聲走急灘。殘棋別墅局方難。後堂那有閒絲竹。陶寫東山老謝安。  
寒蛟海上趁人來。漠漠秋塵掃不開。滿目桑田清淺水。五雲樓閣失蓬萊。  
冷落山齋運甓身。天門八翼夢無因。西風吹起神州恨。塵尾清談太有人。

東山在潮陽縣東三里綿亘六十里 練江在潮陽縣南源出雲落山東入海

### 題菽園看雲圖

看雲不作狄梁公。屈身幾以牝朝終。看雲不作杜陵翁。許身稷契仍詩窮。男兒  
生果抱雄志。眼光到處古人避。我所思兮大海南。島上看雲有奇士。丹青貌形  
不貌神。茫茫四海誰寫真。直取乾坤萬古眼。寫入一氣相氤氳。陽雲出冬陰雲  
夏。魯馬趙牛物交化。置身雲外看雲中。雲之君兮紛來下。眼前所見雲非雲。中



有看者精神存。古今萬事雲變滅。嗟哉郁郁何紛紛。不見卿雲糺縵色。但見浮雲蔽西北。坐令下士懷百憂。高天無青日不白。平生長劍空倚天。未能劃斷雲連綿。亦知陰霾勢非久。其奈鬱勃當吾前。登高邱兮望遠海。八表停雲有人在。世間難得吉祥雲。望氣空憐成五彩。九淵沉沉蟄者龍。雲兮雖起當誰從。雷霆收聲電收影。眼見閉塞將成冬。天地心留畫圖裏。雲生海山吸海水。淋漓元氣大九洲。霖雨蒼生臥龍起。

丘菽園曾傾資助康梁維新保皇排擊慈禧故詩有不屈身牝朝語

劉慧君

少拔

廿年舊友曾從余。義軍內渡寓漳來。潮見訪賦贈

義旂風捲海東雲。零落登壇十萬軍。幕府昔曾驚杜牧。名場久已重劉蕡。青山故國餘哀涕。黃葉清秋下夕曛。閒煞鈴韜無用處。可憐尊酒更論文。

朱梅農以蘭史書至回寄蘭史

用梅農詩  
集題詞韻

五嶺蒼涼霸氣開。一書迢遞海天來。秋風試馬劉王埒。落日呼鷹趙尉臺。各抱

古愁觀世界。自攜新史數人才。何時同縱登高日。笑指滄溟水一杯。

朱梅農名爾田

寄題永井完久夢哉空也樓新竹

完久日本入厩乞菽園索題爲賦此寄之

新竹乃吾舊游地。滄桑轉眼餘哀淚。誰知更有能詩人。五指峯邊吟古春。丈夫讀書兼讀律。致君堯舜乃有術。君今挾律游諸侯。高築夢哉空也樓。十二萬年一夢耳。皇王帝霸誰長留。信知大空本無物。得者勿喜失勿憂。海風吹客高樓頭。戰場寂寂黃花秋。人民城郭縱非故。終見仙鶴歸來遊。

新竹縣在臺灣省臺北府

沈艾孫爲刻石章三賦此爲謝

首二

奏刀勞琢壽山雲。古色斑爛繆篆文。留與後賢珍印譜。便應傳是漢將軍。

印文曰義

帥軍舊

西風萬里客登臺。如斗黃金愧此才。睥睨千秋仗神筆。狼居胥石勒名來。

沈艾孫字保叔行三

### 客窗夜話同王曉滄作

通國正酣睡。憂時人獨醒。月憐今夕黑。天失古來青。閉塞窮冬運。光明海上星。荒雞聲滿野。倚劍此同聽。

### 有感書贈義軍舊書記

首四

拜將壇高卓義旗。五洲睽目屬雄師。當時力保危臺意。只有軍前壯士知。宰相有權能割地。孤臣無力可回天。劉臺舊句啼鴉喚起東都夢。沈鬱風雲已五年。鳳凰臺上望鄉關。地老天荒故將閒。自寫鄂王詞在壁。從頭整頓舊河山。誰能赤手斬長鯨。不愧英雄傳裏名。撐起東南天半壁。人間還有鄭延平。

鄭成功入臺灣立承天府號東都 以上己亥作



第四 庚子集 (南遊策進期)

早春有懷蘭史用高常侍人日寄杜拾遺韻

東風夜入說劍堂。引杯自醉梅花鄉。韓江有客遠相憶。江聲正攪愁人腸。聞雞欲舞誰相與。神州陸沉劇堪慮。祇今海上無仙山。縹緲飛樓寄何處。蟠桃花發天爲春。安知滄海方揚塵。與君行覓詠詩地。我亦蒼茫獨立人。

潘闢史別號獨立山人有說劍堂集

林篁雲郎中

鶴年

寄題蠓墩忠蹟詩冊追憶舊事次韻遙答

八首選  
五首

筆端浩氣滿乾坤。桑海歸來義憤存。破碎河山同感慨。更將忠蹟表蠓墩。

當時痛哭割臺灣。未肯金牌奉詔還。倉葛哀呼竟何補。全軍難保武巒山。

方某君

太僕團防軍事時予總統全臺各路義軍割臺之役太僕介卒內汝予獨抗議保臺卒乃轉戰支離無成而去武巒山在臺中

英雄愧說鄭延平。目斷殘山一角青。何日天戈竟東指。誓師海上更留銘。之保臺

日人平山氏比予爲鄭成功可愧也海上誓師朱子磨崖字或以爲鄭有臺戲云

黯黯歸雲擁海槎。浪紆籌策事量沙。島中義士依然在。伏臘年年奉漢家。  
尊酒東山拜大忠。浩歌人尙氣如虹。殘篇重檢王炎午。來祭盧陵信國公。

將之南洋留別親友

八首

一水茫茫絡五洲。此行心已遍全球。衣冠異代圖王會。書劍平生快壯遊。花幔俗探柔佛國。錦袍人上謫仙舟。要知吾道其南意。魯叟先言海可浮。

書生三十舊登壇。落拓防身劍氣寒。異國談瀛誇海客。中天列宿愧朝官。千年鶴爪書何苦。一卷虬髯傳未殘。獨上柁樓看象緯。東南風急送青翰。

五載金城客閉門。拍天海氣晝昏昏。九邊田牧思班壹。二帝遨遊笑馬援。地陷東南浮大島。天留豪傑救中原。撫髀漫下英雄淚。新野應容一旅屯。

破荒文字走風雷。草昧思從海外開。挾策九夷嬉鳳去。携竿三島釣鰲來。天迴

博望乘槎路。人陋相如諭蜀才。無限抱孫椎結輩。待教絕徼築朝臺。  
萬里南車過越裳。春風原不阻炎荒。虛無龍鼎訛黃帝。鄭重麟書拜素王。驃國  
樂來天酒醉。鮫人市罷海珠光。蠻花萬樹開如雪。難遣填胸熱血涼。  
極外占星計水程。天門殘夢攪濤聲。青牛道遠流沙阻。白馬經荒劫火生。看日  
果逢人北向。行雲如送客南征。亶洲洲上瞻尼父。海燕春風正滿城。  
驪歌聲裏卽天涯。胡越何妨竟一家。大海從新開世界。羣山依舊拱中華。貢金  
待鑄先朝史。碾玉教圖異域花。島國王侯看下拜。書生此念太豪奢。  
南溟從古是天池。笑看鯤鵬變化時。已遣少師先入海。可容箕子獨明夷。人來  
上國仍冠冕。詩出中原更鼓旗。篋有中朝新樂府。徧傳騎象戴花兒。

五載金城指丙申至庚子五年間居潮州

### 詠史四絕句

和曉滄

魯仲連

六國不帝秦。賴有布衣在。懷古獨登臺。斜陽滿東海。

田橫

有士五百人。島中猶可國。何事奉頭來。秋風落陽陌。

趙陀

終築朝漢臺。未預誅秦會。呂雉不能臣。偉哉南武帝。

錢鏐

十四方州富。三千戰弩強。平生愧昭諫。獨未討朱梁。

哭李芷汀

布衣牢落病兼貧。南徼驚聞噩耗真。四海名流同哭寢。千秋文苑此傳人。談兵  
慷慨曾前席。鈞黨紛紜竟潔身。地下鬼雄應問訊。中原如沸未維新。

李芷汀名東沅曾作彭玉麟幕府

澳門雜詩

十五選  
四首



五百年中局屢新。兩朝柔遠暢皇仁。自頒一紙蠲租詔。坐看江山換主人。牙葡人

居澳門自前明及本朝皆納地租光緒十三年始以地給之

遮天妙手蹙輿圖。誤盡蒼生一字租。前代名臣先鑄錯。莫將割地怨庸奴。以租漢

葡人由林富奏請林因前明名臣

覆路榕陰接海隄。望洋東轉望洋西。馬蛟石上看潮立。十萬軍聲戰水犀。東四望

望洋皆地名馬蛟石為觀海最勝處

誰報兇酋發塚窀。寶刀飲血月黃昏。要携十斛葡萄酒。來酌秋原壯士魂。葡有

遍發唐人墓者為某壯士所手刃

### 答陸敬南

登韻

亞雨歐風鬱不開。聞雞人正渡江來。篋留表餌平戎策。夢繞旌旂拜將臺。地盡中原逢大海。天當亂世出奇才。填胸塊壘澆難化。百尺樓高借酒杯。

### 答敬南見贈

四首次原韻

一石天下才。敢云獨八斗。鬱鬱信陵君。平生付醇酒。  
名士劉景升。世家袁公路。把酒論英雄。彼哉何足數。  
世無倉海君。誰發誅秦意。一擊天下驚。奮起龍虎氣。  
尉佗昔帝粵。獨爲陸生折。寶劍千金裝。南來景前哲。

飲香江酒樓卽席作

首四

將之南洋、道出香海、二月八夕、友人邀飲於酒家之樓、羣花侑觴、徵歌竟夕、嗟乎、車雷夜走、是華夷雜遯之場、花雨春霏、極文酒雍容之樂、龍蛇起陸、倚劍問天、鶯燕昵人、持觴酌地、際茲盛集、難

已情言、首唱四章、以先諸子、

惘惘尊前喚奈何。春風楊柳客聞歌。誰知絲竹中年感。更比新亭涕淚多。  
未許華燈照箭瘢。當筵酒令莽如山。不妨帳下猶歌舞。射虎將軍已放閒。  
浮海將爲萬里游。情禪夢俠小勾留。好春十日九風雨。人醉杏花深處樓。  
勞送天河使客槎。華妝圍坐燦雲霞。英雄兒女平生願。要看維多利亞花。

# 九龍有感

羣峯疊翠倚樓間。一角顏雲夕照殷。忽憶去年春色裏。九龍還是漢家山。

# 西貢雜詩

十首  
選一

力遣虜王懾虎威。殘疆何止割南圻。雲山北向空揮淚。孤負遺民望黑旂。南圻  
六省

西貢爲嘉定省南圻  
最早黑旂所駐在北圻

# 星洲喜晤容純甫副使閱卽送西行首三

吾國有爹亞。將爲歐美遊。艱危天下局。慷慨老成謀。新運開三世。雄心遍五洲。  
南華樓上話。一夕定千秋。

七十尙如此。吾徒愧壯年。排雲叩閭闔。救日出虞淵。異域扶公義。神州復主權。  
東之原未老。終仗力回天。  
廿載知名久。相逢瘴海春。亞洲數先達。嶺表有奇人。南出終張楚。西行更哭秦。  
風雲看勃鬱。萬里送飛輪。

### 病中贈王桂山

所須藥物是當歸。有客天南歎式微。未報國讎心未了。枕戈重與賦無衣。

### 自題南洋行教圖

首二

莽莽羣山海氣青。華風遠被到南溟。萬人圍坐齊傾耳。椰子林中說聖經。四月

在開其別墅衍說聞者以爲得未曾有

二千五百餘年後。浮海居然道可行。獨倚斗南樓上望。春風迴處紫瀾生。斗南樓門

人王生所居予爲畧額

### 留別曉滄

次韻行教圖韻

南風吹大海。日軌走南陸。我行君尙留。慷慨念時局。神方置不用。誰起國病篤。同抱救世心。栖栖行海曲。空言要何補。長身祇食粟。此來已三月。共惜流光速。羣山送我行。海氣清而肅。眷念君平生。抱道過王蠋。臨歧爲我歌。高響振林木。林中雙異鳥。飛鳴正相逐。勉哉保令名。何必愧異服。曉滄時改南洋商入設

客樓夕感

海色天容入望遙。凭欄心事湧如潮。茫茫泥雪征鴻急。隱隱車雷虜馬驕。萬疊蠻雲開熱帶。一輪娥月送涼宵。好風不爲吹愁去。銀燭清樽伴寂寥。

南還抵汕頭埠聞琰兒球兒殤耗哀感書此

六首

頻年痛哭爲哀時。誰料今朝更哭兒。擬遣靈龜向天問。挑燈和淚讀韓詩。扁舟劫外侍東還。投劫安知在此間。阿弟六齡兄十六。九泉風雨念家山。望爾成人竟不成。中原哀感倍傷神。青山何處埋兒骨。黯黯愁雲隔鳳城。全家避地古霖州。獨客南歸尙滯留。夜夜離魂夢中見。寒潮嗚咽浪西樓。食厲偏難恃女媀。便非英物也悽然。欲呼羣力新中國。已失人間兩少年。弧矢男兒志四方。河山北望戰雲黃。可憐竟背爺娘去。不共汪錡作國殤。

時八國聯軍陷北京

南漢敬州修慧寺千佛鐵塔歌

有序

庚子秋游梅口鎮。溫柳介同年示以黃公度京卿所寄南漢敬州修慧寺千佛鐵塔銘榻本。於爲劍獲。及冬抵州。謁京卿。得見塔殘鐵。其第七層一方卽銘文。三方缺。故不知鑄者銘者姓名。四層及六七層之半。俱佛像。以所得約之。知塔有千佛。惜缺者無從覓。不能見其全矣。塔蓋南漢劉鋹時州民募建以祝福者。與光孝寺東西鐵塔奉勅造者。先後同時。計大寶八年乙丑歲建。而始毀於同治四年乙丑。閱歲乙丑者已十有五。銘文詞近爾雅。書亦具體顏平原。州中之金此爲最古。惜省誌州誌俱未載。吳石華先生南漢金石志。搜羅甚廣。亦失之眉睫。致久鬱而不顯。浸至殘毀無過問者。今京卿得焉。不可謂非此塔此鐵之遭也。塔址在一小山上。梅江繞其下。去人境廬不半里。登璇樓可望見。惟修慧寺今不知何所。或云康熙間塔自齊州寺移建今址。然無可考證。亦第故老相傳云爾。京卿已屬柳介載入今州志。復作歌屬予和焉。弔古慨今。遂有斯作。

五金之用鐵爲廣。惜或竟付降王長。上供鑄柱下鑄床。更鑄貪癡佞佛想。有鐵不遺鑄五兵。又不鑄器資民生。峩峩兩塔奉勅造。民間觀者如風傾。梅水東來避災地。上有先朝修慧寺。眼中突兀峯堵波。不惜烏金鑄文字。誰歟銘者工祝詞。賢劫千佛森威儀。皇圖欲仗佛力固。安知天降香孩兒。一鐵山圍一世界。劫

火中燒萬法壞。巍然此塔九百年。相輪夜轉罡風快。豈惟牛角難長延。眼看宋  
蹶元明顛。敬州遺事共誰說。塔端鈴語缺不圓。塔鑄何時歲乙丑。大有力者負  
以走。十五乙丑塔乃傾。敢信佛緣能不朽。自從象教嗟中衰。中分淨土參耶回。  
競假天堂地獄說。乘虛與佛爭東來。東來明星張國燄。礮雨槍雲鐵飛艦。天經  
哮罷萬靈噤。海旂颯處干官諂。與之抗者談真空。白蓮萬朵開魔風。誰云此獠  
有佛性。妖騰怪蹕巾何紅。此亦當今一張角。滿地黃花亂曾作。國成誰秉邪召  
邪。聚鐵羣驚鑄此錯。黃金臺邊鐵血殷。六龍西幸趨函關。蕨鞋何日見天子。小  
臣足繭哀荒山。梅山蒼蒼梅水碧。雄心陶寫付金石。眼賊殘鐵南漢年。古鏽斑  
爛鐵花積。當時鑄者知何人。寺荒塔壞朝屢新。小南強花空供養。卽今諸佛無  
完身。鐵不得用鐵之辱。海風夜嘯蛟涎濁。神州莽莽將陸沉。諸天應下金仙哭。  
謂佛不靈佛儻靈。睡獅一吼獅而醒。破敵神兵退六甲。開山力士驅五丁。五嶺  
雄奇積煤鐵。廿政未修民曷殖。地不愛寶資中興。會須富國兼強國。吾國平等

存佛心。紛紛種教休交侵。行看手鑄新世界。采山有詔需南金。人天同慶迴末劫。王氣寧容霸氣雜。神力永鎮閻浮提。何須四萬八千塔。

時清廷信拳匪排外八國聯軍入京兩宮逃西安

### 重晤梁輯五光祿話舊

二首

銅狄重摩定惘然。春明舊夢歲周天。與君共話滄桑劫。已抵仙人五百年。風雅都從變後奇。古來詞客慣哀時。可憐倒海傾河淚。獨立蒼茫但詠詩。

梁輯五名國瑞嘉應州人

### 答人境廬主見和之作

二首用前韻

無物消愁且舉觴。自拚千日醉程鄉。誰張仙樂迎金母。漫詫神兵下玉皇。竭井難醫狂國病。剪燈空弔女宮殤。白蓮飄盡黃蓮死。惆悵尊前說酒王。義和拳謂玉皇遣天

兵八百萬紅燈照黎山老母為首者自稱黃蓮聖母見近人撰天津一月記義和拳出於白蓮教見近人撰義和拳源流考某邸父嗜酒俗有酒玉號

百二山河未定都。金鼇戴主識原誣。日迴舊馭長安遠。月送殘更太白孤。鈞黨



重翻十常侍。璽書新款五單于。羣公休守偏安局。推背猶存一統圖。

人境廬主卽黃公度京卿名遵憲嘉應州城外下市人時因戊戌變政案解職里居 此詩指義

和團亂八國聯軍入京兩宮西狩北京議和事

### 再答人境廬主

二首十  
用前韻

一笑當時果滅洋。紅巾白帽滿朝堂。花門首出中興將。米賊兼封異姓王。銅版  
令嚴誅異教。鐵牌制毀奉權璫。可憐刻木牽絲拙。袍笏空登傀儡場。  
竟難赤黑辨狐烏。眼底雲成萬變圖。名士窮搜呼作賊。王孫苦道乞爲奴。荳蘭  
沈慟留湘水。禾黍餘哀戀亳都。涕淚新亭果何益。有人江左薄夷吾。

### 再答人境廬主

二首十一  
用前韻

不須復古但尊王。一旅終興夏少康。菜葉西風今冷落。茄花滿地舊披猖。傳書  
漫遣三青鳥。貢品休徵四白狼。馬上黃塵猶眯目。早教簾撤聖神皇。  
河山北戒鬱盤紆。天險關門盡備胡。九廟未遷先世鼎。兩京誰掃故宮蕪。悲歌

易水無豪俠。買骨金臺有鈍鴛。往事休談元代史。曾收西域略忻都。

時慈禧太后仍垂簾聽政德宗不能展志

重游清涼洞呈鍾藕華二首

五年夢繞清涼洞。猿鶴青山待我來。添得兩行家國淚。西風吹上會仙臺。  
繽紛花雨散瑤林。持帚仙童倚樹吟。莫掃天香落人世。中原逐鹿劫塵深。

鍾藕華一字子華名穎陽鎮平竊嶺人 清涼洞會仙臺在鎮平縣藍坊鄉

寄懷黃公度二首時十二月立春前三日

梅花消息最分明。已報山中歲欲更。野草初蘇呼鹿友。江波微長受鷗盟。高門盤菜神京夢。伏枕鱸香畫省情。一卷公羊宜起疾。先春重與訂王正。  
北風吹雪晝紛紛。盼得微晴日未曛。掃血故巢歸蜀帝。招魂香草待湘君。驚回夜豹寒中吠。喚起春牛夢裏文。無限登高賦詩意。況因八表悵停雲。

以上庚子作

第五 辛丑壬寅癸卯甲辰集 (嶺東建校期)

晨起書所見

晨陰盼庭樹。有雀拳高枝。老鴉爾何來。欲攫充朝飢。雀驚飛且噪。乞救聲何悲。一雀噪未已。百雀噪而隨。雀亦有俠腸。不忍同類危。羣雀禦獨鴉。力小心則齊。竟令遠引避。不敢復來窺。惟獨力無大。惟羣力無小。嗟哉不能羣。人而不如鳥。

述哀

答伯瑤

四千年中中國史。咄咄怪事寧有此。與君不見一年耳。去年此時事方始。謂之曰戰仍互市。曰和而既攻其使。同一國民教異。昨日義民今日匪。同一國臣南北異。或而矯旨或抗旨。惟俄德法英日美。其軍更聯意奧比。以其槍礮禦弓矢。民間尙自傳勝仗。豈料神兵竟難恃。守城何人無張許。收京何人無郭李。此

時中國論人才。但得秦檜亦可喜。拒割地議反賴商。定保皇罪乃殺士。紛紛構黨互生死。言新言舊徒爲爾。西來日月猶雙懸。北去山河枉萬里。儀鸞殿卓諸國旗。博物院陳歷朝璽。留都扈蹕方爭功。遷都返蹕相警訾。伺人怒喜爲怒喜。不知國讎況國恥。素衣豆粥哀痛詔。可惜人心呼不起。嗟哉臣民四萬萬。誰竟一心奉天子。晏坐東南望西北。九廟尙在煙塵裏。韓江東走大海水。江頭一老哀未已。昨寄我詩淚滿紙。止一年耳事且然。眼中況復流年駛。安得同作上界仙。下視羣雄如螻蟻。任他爭戰數千年。洞中一局碁未已。

哀八國聯軍入京德宗西巡事

汕頭海關歌

寄伯瑤

風雷驅鱷出海地。通商口開遠人至。黃沙幻作錦繡場。白日騰上金銀氣。峨峨新舊兩海關。舊關尙屬旂官治。先生在關非關吏。我欲從之問關事。新關主者伊何人。短衣戴笠胡羊鼻。新關稅贏舊關絀。關吏持籌歲能記。新關稅入餘百

萬中朝取之償國債。日日洋輪出入口。紅頭舊船十九廢。土貨稅重洋貨輕。此法已難相抵制。況持歲價兩相較。出口貨惟十之二。入口歲贏二千萬。曷怪民財日窮匱。惟潮出口糖大宗。頗聞近亦鮮益利。西人嗜糖嗜其白。賤買赤砂改機製。年來仿製土貨多。各口華商商務墜。如何我不製洋貨。老生抵死仇機器。或言官實掣商肘。機廠欲開預防累。此語或真吾不信。抵怪華商少雄志。坐令洋貨日報關。萬巧千奇無不備。以其貨來以人往。大艙迫窄不能位。歲十萬人出此關。僕指來歸十無四。十萬人中人彘半。載往作工仰喂飼。可憐生死落人手。不信造物人爲貴。中朝屢詔言保商。惜無人陳保工議。我工我商皆可憐。衰弱豈非隨國勢。不然十丈黃龍旗。何嘗我國無公使。彼來待以至優禮。我往竟成反比例。且看西人領事權。雷厲風行來照會。大官小吏咸臃縮。左華右洋日張示。華商半懸他國旗。報關但用橫行字。其中大駟尤狡猾。播弄商權遽橫恣。商誇洋籍民洋教。時事年來多怪異。先生在關雖見慣。思之應下哀時淚。閩粵

中間此片土。商務蒸蒸歲逾歲。瓜分之圖日見報。定有旁人思攘臂。關前關後十萬家。利窟沈酣如夢寐。先生古訓言先醒。可能呼通國睡起。出門莽莽多風塵。無奈天公亦沈醉。

天地

天地道方否。人才散于野。遭時乃雲合。豈有平生雅。英雄造世宙。其才自天假。書或僅上口。名或不能寫。古來真英雄。屈指幾儒者。文人習日論。動歎人才寡。我自不英雄。奈何責天下。

王曉滄將之官閩中賦別

六之二  
五兩首

有人圖寫閩山去。着色爭誇勢力圈。淚灑君家故王墓。蕭蕭松柏鎖寒煙。鼓山東望龍渡處。海雨曾飄開國旗。從古英雄論成敗。不堪重話共和時。

時日人畫閩歸其勢力範圍有不許割讓他國之約 臺灣山脈堪輿家言謂由福州鼓山之龍

渡海而成

再答賓南兼寄陳伯嚴

四之一  
次韻

放鄉投足向何門。丁水南來遶古村。華表鶴歸山月暗。神州鰲駕海濤喧。競爭世界憐天演。寥落中原愴國魂。手把英雄傳閒讀。眼中多少可兒存。

與頌臣話臺事

萬三千尺出海面。島國諸山無此高。誰遣黃圖易他色。空傳赤制屬吾曹。夢中雄鬼哀相弔。劫後頑仙笑獨逃。收拾磨厓紀功筆。東南風急送春濤。

送謝四東歸

故人訪我東海來。春風萬里心顏開。故人別我東海去。臨歧各短英雄氣。七年不見今再見。滄海桑田事萬變。中間不變故人心。袖手海天看龍戰。君來一月無停車。訪我更訪山中廬。老親喜君送君出。來此十日相同居。七年乃有此十日。但覺日行比常疾。此日不爲君我留。南風日日催行舟。舟行既速況有輪。輪轉四海揚胡塵。送君此去作胡語。樂府休唱胡無人。我年方強君未老。惜君投

身隱海島。亞洲大陸。局日新。時勢逕待英雄造。海山之高一萬三千尺。當年棄去良可惜。橫來不王復不侯。爲我歸言島中客。包胥存楚約可尋。廉頗用趙原初心。相期亞陸風雲再相見。騎鯨東海來挽神州沈。

題陳擷芬女士女學報

喚起同胞一半人。女雄先出唱維新。要修陰教強黃種。休把平權笑白民。拾翠盡除閒著作。煒彤兼復古精神。大江東望文明水。遙祝飛行比電輪。

答維卿師

韻次

流落天南今八載。接天海氣晝昏昏。錦袍銀燭追前夢。夜半濤聲倍斷魂。空存扶漢分章手。無計能開日月昏。獨立蒼茫發遐想。自由鐘起國民魂。

題蘭史羅浮紀游圖

我閱世界大地圖。羅浮一點乃在南嶺之南隅。神禹伯益導焚所未到。發見乃始漢家使者中大夫。二千餘年在世界。爲山主者仙之儒。洞天福地收不盡。許



容黃面瞿曇徒。霸者之宮賊巢穴。仙山時亦遭點汙。游人遷客更多事。往往鐫刻傷山膚。沈迷詩酒發幻想。或突神女搪仙姑。梅花無言翠羽笑。夢中彼美顏何姝。天公應悔蓬萊割左股。墮落慾界非仙都。邇來仙人所治地益窄。塹山跨海來羣胡。各思圈地逞勢力。此邦多寶尤覬覦。此時儻有豪傑出。豈能揖讓無征誅。此時若作厭世想。縱成仙去胡爲乎。潘生昔游半球萬里路。海山看盡呼歸桴。中間錫蘭島上逢佛睡。一任釋種爲人奴。佛猶如此仙可想。但有沈醉醪何酥。仙人醉生佛夢死。世間學者寧非愚。留名山石且枯。豈有丹青能不逾。人生若作千秋萬歲想。固應自立昂藏軀。黃河揚子珠江判流域。文明之運方南趨。天道由來後起勝。以中證外原非誣。但須世界有豪傑。太極雖倒人能扶。南界之山走百粵。如羅浮者雄非羸。奇峯四百瀑九百。慎勿但作詩人娛。上有神桂下有湖。洞中仙蝶不可呼。題君此圖正風雨。想見羅浮離合雲模糊。

以上辛丑壬寅作

答友人

次韻  
四首

天遣諸夷不亂華。自應驃騎不爲家。獨憐已似騎驢將。閒看西湖十里花。  
儻容儒術濟時艱。老抱遺經豈聽閒。河鎮未歸金世界。大師猶解薦龜山。  
庾信江南早賦哀。平生蕭瑟漫論才。百王道盡焚書日。誰遣窺江虜馬來。  
遣日將詩也自宜。故鄉猶幸有新知。吟成自漉鱸頭酒。權當黃龍痛飲時。

題蘭史香海填詞圖

首二

南宋國衰詞自盛。各抱心力鬥清新。零丁洋畔行吟地。又見江山坐付人。  
此是本朝初割地。年來見慣已相忘。重吟整頓乾坤句。誰更雄心似鄂王。

香港爲清朝最初戰敗割讓之地 以上癸卯甲辰作

第六 乙巳丙午丁未戊申集 (掌教廣州期)

陳伯潛學士以路事來粵相晤感賦

二首

三十年來萬事非。天涯淪落識公遲。橫流滄海無安處。故國青山有夢思。鑄鐵  
屢聞成錯字。造車此是出門時。他鄉同縱登高日。斜日黃龍上大旗。  
臺嶺岩巒海氣昏。貞元朝士幾人存。秋江漠漠魚龍夜。上界沈沈虎豹尊。分野  
直疑連鬼宿。買山何處覓公墩。乾坤整頓關吾輩。先遣南車走越門。

陳伯潛名寶琛清宣統帝師

題滄海遺民臺陽詩話

如此江山竟付人。干戈留得苦吟身。亂雲殘島開詩境。落日荒原泣鬼燐。埋碧  
可憐黃帝裔。殺青誰作素王臣。請將風雅傳忠義。班管重回故國春。

送夏同甫還浙兼訊湯蟄仙

玉帶河邊折柳條。送君歸看浙江潮。九秋鷓鴣詩心健。萬變魚龍海氣驕。吾輩尙謀文字樂。何人解向國魂招。歸舟儻見山陰客。爲道雄心鬱未消。

湯蟄仙名壽潛浙江山陰人已丑進士公同年也

秋懷

八首次草  
孝方韻

萬里風雲願竟酬。軍前歌舞作中秋。黃金鑄闕開藩部。碧玉通江建節樓。十道分封諸將爵。五湖歸老美人舟。年來此意成蕭瑟。匹馬西風莽浪游。崑崙山勢走中華。赴海南如落萬鴉。縮地有人工幻術。通天何處覓靈槎。沈寃鳥口空銜石。酣夢人心久散沙。彈指光陰秋又老。長繩難繫夕陽斜。中原王氣黯東遷。歎鳳嗟麟意惘然。人物真成一邱貉。文章更噪六朝蟬。繞籬晚菊寒誰采。補屋秋蘿冷自牽。消盡美人遲暮感。素書一卷獨編年。斜陽圍聽說場詞。我亦曾驅十萬師。破碎河山開國史。飄零風雨出軍詩。海中

故部沈蒼兕。雲裏殘旌失素蜺。歲自周天天自醉。紅墻銀漢隔秋思。  
山南山北枉張羅。雲路冥冥鳥去多。四海論交幾投契。千秋自命未蹉跎。中原  
麟鳳陳陶歎。大漠牛羊斛律歌。老我秋風無一事。十年雄劍不曾磨。  
名駒未悔困羈鞍。鷺鳥何曾惜羽翰。人到窮愁思著述。天留豪傑濟艱難。衣冠  
文武浮雲變。雷雨蛟龍大海寬。不信平生飛動意。但將文字救飢寒。  
明明如月撥愁開。欲取黃金更築臺。朱鳥莫將歌當哭。紅羊休信劫留灰。著書  
覃子原仙骨。顧曲周郎有將才。收拾雄心且行樂。五雲多處覓蓬萊。  
酒迫桓溫走老兵。詩看秦系破長城。英雄失路羣兒笑。獨客逢秋百感生。滄海  
桑沈栽後影。鈞天樂斷夢時聲。尉佗臺上西風急。來寫登高送遠情。

覃孝方名壽壘湖北人時在兩廣學務公所任職

秋懷

八之六一首  
再疊前韻

年年鄉夢阻歸鞍。恨不隨風化羽翰。捲土重來心未已。移山自信事非難。雨餘

璿瑁潮初落。月下珊瑚島漸寬。地老天荒留此誓。義旂東指戰雲寒。

### 短歌贈陳伯瀾

終南大華遙相望。從天東下黃河黃。千年王氣久消歇。秋陵思哭秦漢唐。三原陳生胸有史。東隨黃河觀海水。茫茫海水揚胡塵。嗟哉何止秦無人。

陳伯瀾名濤時爲兩廣工業學堂監督 以上乙巳丙午丁未作

### 席上作

兒女英雄海上緣。東風吹散化春煙。相逢欲灑青衫淚。已割蓬萊十四年。

### 題崧甫弟遺像

三歲識四聲。七歲能文章。十三冠童軍。英聲震文場。平生性沉鬱。雅不樂襮彰。

宅躬已高潔。治事尤精詳。奮起佐義師。大節何慨慷。

中日專起弟奉繳辦  
理全臺義軍營務處

先

憂後樂志未遂。眼看海化田栽桑。眇眇一秀才。詔令僑海陽。

歸粵爲海陽學廩  
生由許中丞奏奉

旨 蘆中之人信窮士。國仇家憤何能忘。吹簫不爲吳市乞。卜鄰石戶同農忙。

山中千樹桐。澤中千足羊。無聊聊讀貨殖傳。更用陶朱公策施之商。弟在臺以

受知唐中丞以貨殖傳書後文受知劉中丞其先憂后樂賦組織全以宋史事尤為願方伯激賞傳誦一時歸潮則以擬范蠡致文種書受知張尙書自丁酉

後弟往來潮嘉 人生患難思骨肉。況乃兄弟非尋常。少為失母雛。出入相扶將。

問兼非農商 以父為之師。讀書同一堂。未予更他師皆 雙峯之山何峩峩。大甲

先母陳恭人見背 之。水何湯湯。瑞蓮王子池。古柏大部莊。何須風雨夕。始復思聯床。雙峯在苗栗

予與弟皆生其地大甲溪逕東勢閣而出祖宅在焉蓮瑞堂在王子社 此情此

舊居乙酉丁亥間池蓮歷有並帶者柏莊在大部處新居皆臺灣縣地 境曾幾日。君年且壯。予且強。渡江忠義人。俗口誚日儉。方同籌畫宇宙分內事。

將飛斂翼聊徜徉。三豕渡河歲云暮。送君韓江江上風帆張。誰知此別遂永訣。

至今每過淚灑江亭旁。春風吹客忽出海。豈復再覓扶餘王。臨行不得一握手。

心有萬緒誰度量。三書海外竟絕筆。語語真摯尤心傷。己亥冬同畫定嶺東同

山居予送之潮州上水門外庚子春予以學堂籌款 憂患焚如抑何亟。滿腔熱

事出南洋羣島待弟不來遂行在新洲得弟信者三 血冰難涼。丈夫死牖下。恨不為國殤。是時乾坤正翻覆。目不忍視能無盲。飄然

撒手不姑待。南溟有客方歸航。聞喪復聞亂。百感增茫茫。誰爲賦大招。返魂終無香。魂來夜黑曉得耗。信知夢寐非荒唐。登墳一哭千古慟。空山轉眼今幾霜。渡臺船鉞指辰巽。山中墳向如其方。化爲黃鵠有羽翼。東南飛定還吾鄉。黃鵠能言反乎復。天荒地老此恨終須償。安能浪信人言已成佛。弟生有佛徵家人夢中亦見弟言已位還佛幻視世界無興亡。佛言我相卽非相。此圖何乃神揚揚。每見此圖在。不信其人亡。其才未展肆。其貌非老蒼。豐其智能嗇其壽。生才何意吾直疑彼蒼。神龜不可呼。安得叩九閭。吾家世忠孝。卜者言將昌。不于其身于其子。丹山已見雙鳳凰。益之一鳳雛。三鳳方翱翔。視此圖中人。前輝而後光。題圖者爲誰。乃兄義師故帥虞曹郎。

鎮海樓送王豹君方伯

人文

之蜀次壁間彭剛直韻

二十四首

衡陽一老此登樓。廿五年來迹未收。詩草偶鐫山畔石。畫梅同鎮海南州。千秋銅柱悲交趾。一疏金牌比岳侯。諒山告捷而總署電飭停戰彭疏以金牌召岳班師爲比語殊忠憤霄漢此心吾



亦有倚闌斜日不勝愁。五疊韻申彭及樓事

萬方多難此登樓。棋局長安劫未收。無地羅施非鬼國。有人平乘弔神州。指南

豈復遵黃帝。袒左安能屬絳侯。洗馬渡江憔悴甚。自愁原不爲人愁。十二疊韻感喟無端

寥落元龍百尺樓。祇餘湖海氣難收。雄心河曲三呼渡。殘夢天門八督州。嵩室

白衣歸李泌。穀城黃石瘞留侯。劉郎已悔神仙誤。天上何曾可寄愁。十八疊韻答玉臣詩意

走馬旋看建節樓。中原王氣未容收。同扶日月尊皇極。再拓河山畫禹州。能識

此時爲俊傑。安知吾輩不公侯。羅浮風雨峨眉月。聊寫天涯小別愁。二十四疊韻結送豹

君未盡意

王豹君又字豹隱。名人文時爲粵布政使。滇人。鎮海樓在廣州城北粵秀山上。明洪武初朱亮

祖建樓五層。高八丈許。一名望海。在越王臺故址觀音閣之北。

### 戊申廣州五月五日作

南風吹沙何烈烈。搏搏大地瓦解裂。如山火雲勢巋巖。欲雨不雨天益熱。照眼

榴花作午節。江上水嬉武可閱。打鼓鳴鉦角優劣。使船如馬馬化龍。飛龍回頭笑跛鼈。百里橫江渡纜警。嗟爾健兒好身手。慎勿思起爲梟桀。年來民窮盜益多。羣盜如毛不可櫛。小猶鄉落事攻剽。大且據城謀篡竊。此方告平彼旋起。一歲之間四五發。東南已無乾淨土。半壁江山半腥血。民言官苛迫民變。官言革命黨爲孽。彼哉革命黨曷言。下言政酷上種別。假大復仇作檠揭。橫從海外灌海內。已似洪流不可絕。益之民窮變易煽。魚帛狐篝競潛結。事敗黨人輒跳免。東鄰西鄰相窟穴。可憐惟爾愚民愚。身罹兵誅家立滅。年來招兵兵益多。東征西防未容撤。飢困兵言月餉少。羅掘官言庫儲絀。嗟哉民變猶可說。祇憂兵變不可說。此事邇來已芽蘖。民猶可煽況煽兵。龐勛之徒何代蔑。尤難言者東西鄰。公庇羣兇嗾內鬻。鷹瞵狼睨謀我缺。彼謀我者原多途。旣山取金路敷鐵。更乘內亂肆厥毒。坐恐吾民靡有子。我今內治方無人。何力能俾外謀折。官惟露布誇賊平。功狀張皇某某列。愁來且進菖蒲觴。有荔如丹藕如雪。龍舟歸去夜

微雨。仰視江天黯空闊。

此詩咏當時政壞民亂兵變外侮諸情

### 寄贈國學保存會諸子

文明古國五千載。中經秦火詩書在。漢興諸儒功最多。不有守先後何待。西海潮流猛秦火。東風復助爲妖禍。障川挽瀾今無人。後生小子忘丘軻。崑崙山高東海深。百王千聖知此心。終看吾道益光大。日月行天無古今。

### 重陽夕作

蕭蕭風葉轉迴廊。耿耿星河夜未央。十載龍吟雙劍隱。五更蟲語一燈涼。愁邊澤國飛鴻雁。夢裏家山臥犬羊。遙憶黃花吾負汝。故園今日是重陽。

### 濟良所

都門著述  
吟社題

濟良所。濟幾何。長安落花日日多。不忍落花付流水。欲落不落扶之起。今日園中桃。昨日道旁李。還汝自由自今始。噫戲乎嗟哉。犧軒子孫奴隸矣。更復漂流

海外作人豕。可哀豈獨兒女子。濟良所。奈何許。

蟲豸詩

八之二  
五兩首

蠹

朋起作民賊。有何文可名。人皆防利喙。更莫震虛聲。

蜂

與君同死生。義不殊貴賤。由來香國中。不立貳臣傳。

擬杜諸將五首

用原韻著  
澗吟社題

金甌無缺舊河山。難效前皇復閉關。萬里邊塵來海外。九天兵法出人間。中樞  
龍虎神符祕。上將旌旂夕照殷。三十六軍齊忭舞。登壇封拜屬那顏。  
留守東都擁百城。春風燕寢動簾旌。全收朔雪天王地。重起漁陽曠騎兵。芒碭  
片雲應未散。蓬萊弱水幾曾清。于今射虎誰飛將。胡馬縱橫右北平。  
甘泉夜半屢傳烽。大息陳書動九重。未許天山三箭定。空聞函谷一丸封。鬼神

奇祕虛前席。狼虎追呼急上供。籌罷軍儲籌歲幣。年年仰屋大司農。  
新軍成鎮復成標。兵氣東南鬱未消。黃口小兒何咄咄。白頭諸將已寥寥。支離  
殘骨千金駿。照耀雄軍七葉貂。橫海樓船勞悵望。幾時征討復天朝。  
汾水秋風雁復來。百年人事不勝哀。收兵自衛元戎府。教子誰登上將臺。西極  
傳書青鳥使。南山上壽紫霞杯。禁中早已儲頗牧。不用焦桐爨下材。

晴皋以平蠻三將題名及元祐黨籍碑。搨見贈。並先以詩賦

### 此答謝

龍隱巖砌北宋碑。勞君遠揚費氈椎。邊功一代歸樞密。黨禍千秋怨太師。將相  
由來關大局。是非原不限當時。眼前無盡興亡史。落日悲歌瘴海湄。

況晴皋名仕任廣西人時在兩廣學務公所任職

### 秋興

八首選六次  
張六士韻

芒碭雲開大漢年。眼看楚蹶復羸顛。收兵先下三秦地。奉使遙通百粵天。照盡

古人珠海月。飄殘霸氣玉山煙。英雄祇剩前朝史。懷古悲秋意惘然。

黃河東下走龍門。難起中原古帝魂。天上斗牛沈劍氣。人間鸞鳳掃巢痕。狄泉故壤雙鵝出。甌脫窮邊萬馬屯。不信開元天寶事。但留詩史浣花邨。

坐看桑從海上栽。羣鷗見慣不相猜。生毛有地供秦笑。呵壁無天慰郢哀。兩帝中央謀混沌。三山左股割蓬萊。故鄉遊釣今何處。空憶漁人讓曲隈。

衣冠文武眼中新。晏坐空山笑此身。割地奇功酬鐵券。週天殘燄轉金輪。後庭玉樹仍歌舞。前席蒼生付鬼神。細柳新蒲非復昔。更無人哭曲江濱。

遼東華表鶴西飛。但作神仙願已違。故國河山殘照盡。秋風城郭舊人稀。四郊戎馬邊聲急。七葉金貂世譜微。休向哀鴻談往事。江湖滿地稻粱肥。

五嶺南來勢糾紛。百年邊事漫重論。月中潮汐爭消長。天外風雷駭見聞。上國地理龍虎氣。中原人雜犬羊羣。山飛海立今何世。閒就安期話白雲。

# 白馬鄉有懷明義士賴若夫先生

有序

先生名其肖、字若夫、鎮平白馬鄉人、明諸生、明亡起兵、奉先朝正朔、守縣境者數年、屢敗清兵、及勢不支、遂去不知所終、乃明之完節士也、先生童年嬉游、塾師責之曰、若夫爲不善、卽答曰、若夫豪傑之士、其自命如此、白馬鄉今猶分忠孝節義四旂、傳爲先生遺制、明稗史皆作潮陽人、而通鑑輯覽從之、鎮平時猶屬潮州、當因此誤云、

萬山之中小縣耳。乃有鬚眉之男子。山是大明山。水是大明水。明亡六年猶守此。豈有若夫爲不善。人自不識若夫豪傑士。若先生者乃能真不死。忠孝節義名四旂。白馬之鄉良足紀。先生之風今未已。噫嘻乎嗟哉。當時乃已神龍見首不見尾。

以上戊申作

## 附 丁未詩餘

### 滿江紅詞

越王臺次  
伯管韻

逐鹿中原。問何故。閉關自域。思舊事。登高弔古。五羊城北。椎結雄稱南武帝。抱  
孫左纛朝儀赫。笑此臺高瞰百蠻。天何因設。甘心受。新王職。彈指頃。千年隔。  
訪霸圖。一片夕陽無極。殘缺不完南越國。老夫心事何人識。祇江山雄繞古臺  
基。今猶昔。

廖伯魯南海人清貢生時爲廣府中學教習 越王臺在廣州城北粵秀山上越井岡爲南越王

趙佗登高處



第七 己酉庚戌辛亥集 (政教兼預期)

以攝影心太平草廬圖移寫紙本 六之一首

天下萬山祖。其名曰崑崙。崑崙有南支。萬里趨越門。人生亦有祖。誰非黃炎孫。  
歸鳥思故林。落葉戀本根。我從海上來。卜廬淡定村。東望徵君山。吾祖祠墓存。  
明夷兆誰筮。參軍墓誰題。呀呀朱鳥味。鬱鬱冬青枝。夜半雪壓廬。重撰銅絃詞。

心太平草廬乃公山居名

題張生所編東莞英雄遺集 熊飛何真袁崇煥蘇觀生張家玉家珍皆東莞人

榴花村人義旗起。梅蔚山下行朝峙。桓桓仗鉞熊將軍。落日光迴海雲紫。時先  
從祖判韶石。心共將軍表忠赤。嗟哉天水不復碧。熱血射天天為白。先從祖諱必明韶府  
食判與熊飛同殉韶由來胡運無百年。此鄉復出東莞伯。東莞山水天下奇。英

雄屢見生于斯。天生英雄付劫運。尤傷心者袁督師。敵方用間朝不知。長城自壞甘人欺。朱明亡局決于此。何待粵中爭立時。北都破敗南都棄。三閩四廣成何事。君臣遺冢空殘碑。流花橋畔啼鵲淚。爾伯爾侯蘇與張。張家兄弟不可當。蒼黃百戰野塘死。一死何止流螢光。用張文烈詩語人言東莞古間邑。有人弔古編遺集。六百年來戰血涼。夜半靈旗鬼雄泣。鬼雄末造殊可哀。破碎河山莫收拾。圓頭山人爾何幸。東南保障功名立。我愛英雄尤愛鄉。英雄況并能文章。手持鄉土英雄史。倚劍長歌南斗旁。

熊飛東莞榴花村人南宋末舉兵勤王殲元軍於榴花村復廣州韶州後殉難韶州 何真字邦

佳元末大亂舉兵廣東後歸明太祖封東莞伯 袁崇煥萬歷進士監軍關外拒清有功崇禎初

爲兵部尙書督師寧遠入援都城以反間被戮 蘇觀生字字霖以薦進起官南京陷擁立唐王

於閩爲大學士敗逃廣州又擁立唐王弟清兵至自縊死君臣稿葬流花橋 張家玉字元子崇

禎進士唐王敗後舉兵東莞隨桂王轉戰各屬家族盡滅兵敗增城投野塘死 張家珍家玉仲

弟年十七隨家玉舉兵勤王轉戰數勝家玉沒鬱鬱以詩畫終

秋懷

次覃孝方韻  
八之一首

蓬山淪沒阻東歸。看慣年年海水飛。剩有壺公教地縮。更無萇叔與天違。簌簌  
落日神猿哭。苜蓿秋風虜馬肥。今日秦庭非復昔。休將九頓拜無衣。

以上己酉作

與楚僖千仞聞歌作

春雲不雨晝陰陰。有客南來作越吟。衣上黃塵飄熱淚。鏡中白髮迫雄心。懶呵  
鬼壁勞天問。拚共神州付陸沈。漫笑箏琶娛俗耳。未妨聊當海潮音。

楚僖葉姓江蘇吳縣人 千仞梁姓梅縣人

清明日游白雲山

二之一

披雲來訪鄭安期。卓錫兼尋景泰師。名士無聊托仙佛。神州有淚混華夷。濛濛  
海色聞邊角。莽莽春愁上酒旗。斜日下山謀一醉。紅棉開徧越王祠。

白雲山在廣州城東北十五里。上多白雲。高三百餘丈。盤踞百餘里。有九龍泉。鶴舒臺。菖蒲澗。鄭仙巖。諸勝。乃安期生飛昇處。其連亘有棲霞。真武。諸山。棲霞有景泰寺。乃景泰禪師卓錫得泉處。

再柬蟄仙一之二

蒼涼喜見日方東。未死安能萬事空。災異頻聞成亂象。雲霄何處托冥鴻。百年  
觀祭知夷禮。四海論詩入變風。碩果尙留吾輩在。莫教陽九數終窮。

湯壽潛字蟄仙。己丑進士。公同年。

自題三十登壇照片

十六年前莽少年。當時赤手欲回天。誓師雷雨窮荒外。開國河山落照邊。往事  
已憐成過電。雄姿未稱畫凌煙。于今不作登壇夢。漁鼓聲中號散仙。

枚伯以長句題羅浮游草次韻答之

我有故人子王子。其居乃在天台山。天台四萬八千丈。石樑橫空不可攀。桃花  
流水空人間。仙山縹緲吾情牽。惜未來賦赤城篇。故人出山到南海。一官絳帳

兼高懸。相逢但說道可道。坐令仙山冷落天池蓮。神州尙未陸沉盡。山仍吾山  
川吾川。我生不辰處東海。中有玉山高拂天。幾年坐嘯玉山下。長蛇薦食來蜿  
蜒。斬之不得避而去。恨滿東海何能填。人生萬事一夢耳。當時枉作如雷顛。四  
海無家一身客。十年潦倒秋風前。羅浮之山鎮南海。一筇逕往開秋煙。海上蓬  
萊此左股。五色雀蝶何翩翩。神仙白日來雲輶。雲中鸞鶴同蹁躚。長爪麻姑定  
識我。共話滄海成桑田。人間尙有未了事。仙丹雖熟無能仙。沈沈天風引迴船。  
滿山靈草何芊芊。朱明洞天遲吾主。空看日出娛雲泉。天下大洞天者十。金銀  
宮闕名山巔。天台第六羅浮七。洞中閣道原交連。君雖未到羅浮去。天台飽享  
雲霞妍。丈夫不作神仙亦當作豪傑。莫但留名萬古將詩傳。

王枚伯名舟瑤浙江人時爲兩廣優級師範監督

新寧劉小芸將爲大江南北之游介孝方索詩壯行爲賦四

絕句

劉名  
汝霖

滾滾黃塵起馬前。書生仗劍出南天。秋風萬里中原路。一髮青山落照邊。  
大江北去是黃河。飢旱頻年菜色多。淚盡伯鸞心尙熱。西風自唱五噫歌。  
中華天啓帝王都。其奈曾經亂五胡。南戒走完行北戒。河山還屬漢家無。  
眼中煙點小齊州。老我看人作壯游。斜日佗臺謀一醉。蕭蕭落葉滿城秋。

以上庚戌作

謁明孝陵

四首  
之一

鬱鬱鐘山紫氣騰。中華民族此重興。江山一統都新定。大纛鳴笳謁孝陵。

時革命軍初定南京正整兵北伐故公謁明孝陵而作此詩 以上辛亥作

# 附錄

一	傳	一〇一
二	墓誌銘	一一三
三	行狀	一二七
四	年譜	一二一
五	帖懷錄	一五三

## 丘逢甲傳

江山淵作

清政不綱。仁人志士。揭櫫民主之義。播厥聲於寰宇。辛亥倡義。若疾風滌塵垢。不半載而奠共和之局。數千年之帝制。於焉以熄。故言共和之紀元。必推端辛亥焉。然竊謂共和之制。辛亥之前已有行之者。不徒見諸空言。且徵諸實行。建總統。開議會。定國旗。更官制。遠挹唐虞之遺風。近掇歐美之良制。共和之規模。遂巍定。其時固在辛亥以前十餘年也。不過兵威不足。國力未充。外無援兵。民無固志。朝廷已棄珠厓。鄰省亦視同秦越。登高而嘯。應者無人。遂不旋踵而霧解煙消。等於曇花一現。大好山河。拱手而授於異族。其中之志士仁人。血欲化碧。志已成灰。歸去無家。惟效杞人之大去其國。如臺灣之丘逢甲者。其事足憫。其志尤可哀。雖其地限於一隅。其事不逾數月。然實爲辛亥倡義之先聲。而海外孤臣血淚之所聚也。又詎可聽其靈湮汨沒而無傳乎。作丘逢甲傳。

逢甲姓丘氏。臺灣產也。中國舊制。尊親有諱。往往因一字之諱。舉國不得用其字。甚至祖父相傳。百代不變之姓氏而亦易之。如漢之奭氏。避元帝諱易爲盛氏。莊氏避明帝諱。易爲嚴氏。自古旣然。丘氏爲



避孔子諱。清雍正禁民間不能用。故臺灣之丘氏。自鄭氏滅後。卽與中原同。盡加邑旁而爲邱。其實固與明以前之丘氏爲同族也。丘氏者臺灣之望族也。其民族雖非繁賾。然咸能自樹立。不與尋常庸夫相儔伍。故能爲臺民所瞻仰。入臺而訪其邦之士大夫。無論識與不識者。必舉丘氏以對。逢甲之祖父。均以詩書起其家。至逢甲而益顯。逢甲字仙根。號倉海。軀幹魁梧。高十尺以外。廣額豐耳。兩目奕奕。生奇光。言論風生。往往一語驚四座。聲震屋宇。幼負大志。於書無所不讀。老師宿儒。咸遜其淵博。所爲詞章。凌厲雄邁。不愧古之作者。尤善詩。恆寢饋於李杜蘇黃諸家。去其皮而得其骨。弱冠弄柔翰。卽嶄然露頭角。父兄見其詩。卽擊節嘆賞曰。此異才也。爲秀才時。毅然以天下爲己任。恆爲大吏陳國家大計。朗然若視指紋。自此名動公卿間。王公大臣爭欲羅致之入幕府。逢甲則岸然掉頭去不顧也。未幾舉於鄉。旋捷進士。殿試點主事。是時聞見彌廣。閱歷愈深。既有地位。亟思展其夙所抱負以爲國家用。而臺灣之禍作矣。

臺灣在大海中。位於福建之南端。地形如彎弓。北高南下。周寰幾三千餘里。東繞高山。西薄巨海。島中一望平原者。六百餘里。遠峯聳翠。嘉樹青葱。茂林脩竹。相望於道。北至淡水洋雞籠城。與福建相近。東面則琉球也。島之外復有沙隄。起伏相生。環抱若龍。此外則鹿耳門者。島之門戶也。澎湖嶼者。島之屏

障也。澎湖在島之西北共三十六嶼。惟西嶼最高。餘皆平垣。自廈門至澎湖。水色青黛。深不可測。舟行甚險。由澎湖東南行。一日可抵鹿耳門。誠天然良好之軍港也。其地土廣人稀。土番復巢穴於中央。罕與人民相交接。元明以前。除漁舟外。鮮通於中國。明末爲紅夷所據。鄭成功逐紅夷而有其地。復移民以殖之。荊榛頓闢。鄭氏據地形之險要。與清相持且三十餘年。以稍延明室一線之正朔。子孫不競。宏業莫纂。康熙甲子。遂滅於清。而明之正朔絕。清已得其地。闢爲郡縣。稱臺灣府。隸於福建。後設臺灣道。光緒乙酉。始建行省。分爲臺南臺北臺中三府。升淡水廳爲臺北府。設巡撫駐焉。而閩浙總督實兼領之。初爲臺灣巡撫者。爲劉銘傳。繼之者爲邵友濂。兵事將起。友濂求樞府內調。清廷乃令臺灣藩司唐景崧署巡撫。以廖德勝爲提督。景崧令總兵劉永福移軍守臺南。而自守臺北。方欲有所設施。日籌防禦之策。而其時中東之戰。我軍大潰。朝廷已割臺灣全省之地。拱手而贈於日本矣。先是同治末年。有琉球船遇颶風。漂抵臺灣。死於生番者五十四人。日本商民四。亦漂至遇禍。是時適日本遣副島種臣。柳原前光等。來中國訂通商之約。約已成。前光至總署。言生番事。總署大臣毛昶熙董徇。答之曰。番民皆化外。不服王化。猶貴國之蝦夷也。前光曰。生番殺人。貴國捨而不治。敝國將問罪於生番。昶熙曰。生番既我之化外。伐與不伐。惟貴國自裁之。日本夙未有敢欺中國之心。此言一出。遂

知中國不足畏矣。同治十三年。日本以西鄉從道爲都督。征臺灣生番。先致書於閩浙總督李鶴年。鶴年覆書拒之。不聽。日軍登陸。熟番迎降。熟番與生番爲世讎。導日軍擊生番。敗之。進焚村落。深入至社丹社。生番殊犷悍。不畏死。伏叢莽間。時起狙擊。日軍不敢進。屯田於龜山。爲久駐計。鶴年聞於朝。舉朝大震。急詔海疆戒嚴。令沈葆禎督福建水師赴臺嚴守備。別遣潘爵。夏獻綸。就西鄉從道議。久不決。將決戰。閩撫王凱泰。率兵二萬五千將渡臺。時日兵不服水土。受暑瘴。多死亡。聞大兵至。遂議和。要償兵費三百萬元。葆禎力爭之。清廷懼起釁。乃卒償金五十萬。日軍遂奏凱歸國。自是益輕中國矣。逮因朝鮮事。而起中東之戰爭。日軍更默出師。攻取臺灣之文良港。襲據澎湖。海道中梗。臺灣已成孤懸之勢。及我軍之敗績。兵艦盡沒。大連旅順相繼淪陷。九邊烽火。夜達甘泉。舉國驚惶。涕泣無措。清廷乃命李鴻章向日本議和。將奉天南部。從鴨綠江抵遼河口。鳳凰城海城營口諸要鎮。以及臺灣澎湖。暨所屬諸島嶼。盡割讓與日本。是役戰爭。僅在中國北部。而割地乃及於南部臺灣。殊出於意料之外。此約一成。無可挽回。臺灣數千里之地。遂歷萬劫而不復矣。臺灣者。逢甲父母之鄉也。休戚與共。較他人爲尤甚。朝廷於土地之割棄。雖不足介意。所難堪者。臺灣之遺民耳。方兵事之初起也。逢甲已竊竊憂之。太息曰。天下自此多事矣。日人野心勃勃。久垂涎此地。彼詎能忽然置之乎。於是日集鄉民而訓練之。以

備戰守。復以大義相鼓勵。涕泣而語之曰。吾臺孤懸海外。去朝廷遠。不啻甌脫。朝廷之愛吾臺。曷若吾臺民之自愛。官兵又不盡足恃。脫一旦變生不測。朝廷遑復能顧吾臺。惟吾臺人自爲戰。家自爲守耳。否則。禍至無日。祖宗廬墓之地。擲諸無何有之鄉。吾儕其何以爲家耶。逢甲斯語。一字一淚。言未已。已哽咽不能成聲。聽者咸痛哭。願惟命是聽。時兩軍初戰。割臺之議未起。逢甲已慮及之。可謂有先見之明矣。及景崧與永福交惡。分兵而守。逢甲又引以爲憂。景崧者。古所謂處士虛聲者也。初爲吏部主事。喜談兵。有知兵之名。越南戰事將起。景崧自請赴越南招撫永福。永福爲廣西思州人。端慤敢戰。咸豐間廣西亂。永福率三百人出鎮南關。時粵人何均昌據保勝。永福逐而去之。遂據保勝。所部皆黑旗軍。所向無敵。屢殲法兵。黑旗之名震越南。越王授爲三宣提督。加一等男爵。洵當時一健將。亞於馮子材者也。景崧已招永福。中法和議成。張之洞薦永福於朝。授欽州總兵。旋移駐臺灣。景崧亦以功授臺灣道。旋擢藩司。兵事將起。清廷以景崧知兵。特命代友濂爲巡撫。然景崧旣與永福共事於越南。意見不同。怨讎日深。旣爲臺撫。遂自守臺北。移永福軍於臺南。逢甲以景崧雖號知兵。而防禦敵寇。遠不逮永福。全臺形勢。盡集於臺北。臺南非其比。臺北失足以牽動臺南。臺南失未足以牽動臺北。景崧一人守臺北。無永福以佐之。恐守之非易。臺北一破。臺南將孤守無能爲矣。乃急詣二人許。爲之調停意見。思

所以阻永福之軍使勿行。焦唇敵舌。繼之以泣。景崧終堅持不爲動。二軍遂分。逢甲出而嘆曰。其殆天乎。厥後景崧坐誤事機。臺北失守。永福孤守臺南。相持數月。卒無以救臺灣之亡。一如逢甲之言。不爽銖黍。倘景崧能捐私怨而急公義。俯就逢甲之請。則臺灣未必終亡。卽亡亦未必若是之速。可敢決也。逢甲之智。可謂燭照而數計矣。

割地之議既起。舉國大譁。羣冒鴻章爲賣國。憂國之士。數千人上書力爭之。詞頗激昂。中外諸臣奏章。凡百十上。臺灣臣民爭尤力。清廷意頗動。欲改約。而約不可改。時俄德法出而抗日。日頗懼。許還遼東。臺灣終不肯還。夜半換約於煙臺。適臺灣舉人以會試在都。伏闕上書。涕泣而爭。清廷不顧。特命景崧率軍民內渡。又命李經方爲交割臺灣使。舉數千里之土地。數千萬之人民。草草交割於日艦中。逢甲哭曰。余早知有今日矣。雖然。臺灣者。吾臺人之所自有。何得任人之私相授受。清廷雖棄我。我豈可復自棄耶。乃首倡臺灣自主之說。呼號於國中。登高一呼。全臺皆應。其間忠義之士。尤慷慨憤激。痛詈清廷之負臺民。而力贊逢甲之議。乃羣推逢甲爲起草。逢甲遂草草定臨時之憲法。議建臺灣爲民主國。選總統副總統各一人。開議院爲立法機關。定官制。分內部外部軍部等之名稱。製藍地黃虎國旗。以爲國徵。羣皆贊成。次乃議總統爲何人。衆意屬景崧。逢甲知景崧之不足以有爲也。遲疑而未決。然景

崧負時望。爲臺民所歸。且景崧外亦無他人足以當斯位者。永福雖善戰。然居末秩。未爲民所重。不獲已卒從衆議。某日乃集紳民數千人。鼓吹前導。詣撫署。上臺灣民主國總統印綬於景崧。景崧朝服出。望闕九叩首。旋北面受任。大哭而入。卽撫署爲總統府。電告自主於清廷。言遙奉正朔。永作屏藩。云云。清廷已棄臺如遺。無所顧惜。此電不足以動其憐。適爲所嗤笑耳。且旣曰屏藩。卽不能謂之自主。此實景崧一人之私電。臺民所未知也。副總統羣以屬逢甲。逢甲不獲辭。乃爲副總統兼大將軍。大權仍景崧操之。於是乎臺灣遂爲自主國矣。

臺灣自主。設官分職。部署略定。省官不願留者。聽其內渡。有留者。亦有去者。是時日本命樺山資紀爲臺灣總督。兵艦將大集。臺中兵力薄弱。餉又不繼。乃乞兵乞餉於沿海各省督撫。無有應者。又命陳季同介法人求各國承認自主。皆不答。景崧復不善治軍。軍中時有變志。軍士多外省人。非土著。於臺灣之得失。漠然無所關心。日以嬉戲爲事。自什長李文奎殺方副將於撫署。景崧不能正文奎之罪。反令充營官以安之。軍士遂欺景崧之無力。浸驕不可制。至是益紊亂無紀律矣。逢甲深以爲憂。時進策於景崧。又請嚴肅軍紀。雷厲風行。殺一以儆百。景崧均不從。逢甲不獲已。乃訓練鄉團義兵以備變。傾家財以爲兵餉。不足則乞諸義士以助之。孳孳矻矻。昕夕不敢懈。然一念及國步之艱難。未嘗不終夕磅

徨。泣涕如雨也。

未幾日艦大集。先發兵攻基隆。景崧命吳國華守三貂嶺。復命營官包幹臣馳往助之。幹臣爲人畏敵而喜功。逢甲知之稔。阻景崧不可用。景崧不聽。卒以僨事。方吳國華之守三貂嶺也。防守頗嚴。偶與日軍偵探隊遇於途。奮勇擊之。斃日兵官某。日軍大潰。幹臣適馳至。不發一矢。遽奪日兵官首級歸。冒爲己功。以報大捷。吏民皆賀。國華方追逐日軍。忽聞幹臣奪己功。憤怒不可遏。遽舍日軍回兵追幹臣。日軍瞰之。亟返旆。遂奪三貂嶺矣。是時基隆危急。分統李文忠等會師援之。日軍已密佈。文忠等屢戰皆敗北。景崧復命黃義德屯八堵爲後援。義德性怯而多詐。方之幹臣爲尤甚。逢甲復請於景崧。更遣他人代之。景崧亦弗許。義德至八堵。聞日軍勢盛。胆幾喪。遽舍八堵馳歸。詭言獅球嶺已爲日據。八堵迫近敵營。不能駐兵。日人懸金六十萬購總統頭。故亟馳歸以防內亂。逢甲知其詐。面斥之。景崧默然。莫敢詰。其實獅球嶺尙未失。自義德馳歸。其地空無一兵。翌晨日軍遂拱手而得之矣。

是夕。義德所部軍索餉大譁。逢甲請斬義德以謝臺民。并嚴懲一二亂兵爲首者。以厲其餘。景崧不敢從。逢甲嘆曰。禍患之來。迫於眉睫。尙不能整飭軍紀。徒畏蕙游移。坐令其譁變。天下事尙可爲乎。次日城中聞日軍將至。互相驚擾。老幼紛紛逃竄。軍兵蠢蠢有變志。景崧束手無一策。傍晚潰兵爭入城。沿

戶淫掠。客勇士勇互相鬪。積尸遍地。中軍護勇爲內應。總統府火發。光燄燭天。景崧大駭。捨壽逃外無他術。亟微服挈一子而逃。妾易男服隨之。雜難民中。竄出城。疾附英輪至廈門。置台灣事於不顧矣。逢甲聞之。哭曰。吾臺其去矣。誤我臺民一至此極。景崧之肉其足食乎。時游兵淫掠無厭。全城無主。居民遷避一空。逢甲急舉義兵。剿游兵於城內。冀死灰復燃。或可再振。然府庫軍械。盡入游兵手。義兵勢不支。遂大敗。逢甲孤身遁鄉間。游兵大掠三日。日軍尙未至。德商畢狄蘭以書告。日軍乃從容以兵來取城。逢甲收集散亡。義師復集。聞日軍至。伏於途而擊之。顧日軍勢張甚。逢甲敗亡之餘。軍容不振。無殊以螳螂之斧而禦隆車之隧。故又大敗。全軍盡喪。逢甲僅以身遁。復匿於鄉。臺北遂爲日有。是時永福尙堅守臺南。日軍攻之數月不能下。逢甲思往依之。道中梗。不能行。而臺北已陷諸城邑。聞臺南義聲。咸躍躍思奮。逢甲復與之約。定期起兵圖恢復。爲日軍所偵知。防備周密。無隙可乘。日軍復以臺灣自主事爲逢甲所首倡。嫉之甚。嚴索之。逢甲竄身深菁窮谷間。幸脫於禍。而恢復之志不稍替。未幾永福力不支。臺南亦失守。逢甲知大勢去。無可挽回。乃亦痛哭辭故國而行。臺灣遂亡矣。

逢甲旣內渡。遂入廣東。家於嘉應州。買屋居焉。杜門不出。謝絕親友。自署爲臺灣之遺民。日以賦詩爲事。而故國之思。以及鬱伊無聊之氣。盡託於詩。詩本其夙昔所長。數十年來復顛頓於人事世故。家國



滄桑之餘。皆足以鍛鍊而淬礪之。其所爲詩。益蒼涼慷慨。有漁陽三疊之聲。又如飛兔驟裏。絕足犇放。平日執干戈衛社稷之氣概。皆騰躍紙上。故詩人之名。震動一時。又往往側身南望。故鄉故國。掩映於蒼煙暮靄中。迷漫不可見。念一身之無屬。獨愴然而涕下。又有時酒酣耳熱。與二三知己。談故國軼事。輒虬鬚橫張。怒髮直豎。鬚眉噓噓欲動。氣盈涌而不可遏。識者莫不哀之。是時大吏聞其賢。屢招之。逢甲均婉謝不肯出。祇願擔任教育事宜。大吏遂聘之爲廣州府中學校校長。旋又任兩廣方言學校校長。學生出其門者千餘人。咸端志勵學。克承厥緒。光緒末年。各省盡成諮議局。逢甲爲粵人士所推轂。選爲議員。旋舉爲副議長。高談雄辯。四座皆驚。於地方積病。尤日思所以推陷而廓清之。如禁賭一案。其最著者也。

是時種族革命之說。騰播於全國。逢甲喜曰。是吾志也。吾欲行民主於臺灣。不幸而不成。今倘能成於中國。余能及身見之。九死所無恨也。逢甲斯言。竟成讖語。革命之功方成。逢甲果憂勞成病矣。清命旣革。逢甲以楚國之望。推爲教育司長。不惜勞困。黽勉從公。復登廣告於報端。復其原姓爲丘氏。未幾南京代表團成立。粵中推逢甲爲代表。及臨時參議院告成。復選逢甲爲參議院議員。忽忽就道。兼程而行。及抵南京。而伏疾遂發。自知不起。亟倉皇返粵。遂卒於嘉應州鎮平山居。卒之日。遺言葬須南嚮。曰。

吾不忘臺灣也。及葬。執拂而哭者數千人。臺灣遺民之在廣州者。哭之尤慟。既哭而後輓之曰。憶當年禍水滔天。空拚九死餘生。隻手難支新。建國。痛今日大星墜地。祇贖二三遺老。北而同哭故將軍。

山淵曰。臺灣一荒島耳。成功開拓之於前。銘傳經營之於後。今日人皆本成功銘傳之舊而潢張之耳。臺灣舊不通於中國。鄭氏筆路藍縷。拓其地以延明祚之一線。清廷謁數十年之兵力。必欲降其衆而有之。既有之不能以自守。復以資於日本。是清廷不特負臺民。且無以對鄭氏矣。逢甲以臺灣孤臣。首倡自主。崎嶇艱苦。卒以無成。寄意於詩以自哀其志。死之日。猶不忘故國。其心之苦。奚讓宋明末祚諸遺民。世徒以詩人目之。奚足以知逢甲之志耶。然當日握全臺之權者。惟景崧。景崧優游養禍。不戰自潰。使稍聽逢甲言。或不致此。是亡臺灣者景崧也。景崧既遁。知兵之名掃地以盡。卒客死於廣州。無人過問。逢甲之死。人盡哀之。嗚呼。臺灣雖亡。逢甲不死矣。

江山淵先生名璩高州人民國初曾爲國會議員其本人或親族必曾隨宦或遊歷至臺故能詳悉臺事若目覩耳聞非他傳記所能及也惟於唐公景崧責備未免過重是或者江先生愛國之殷遂言之切亦春秋責備賢者之意爾傳文原有時地錯誤處已加修正原文曾載民國四年商務印書館小說月報琮誌



# 倉海先生墓誌銘

丘復作

倉海君。丘姓。先世由上杭遷鎮平。逮君曾祖。始遷臺灣。父潛齋先生。碩德耆儒。爲世模楷。予嘗次其行狀。君其次子也。自幼聰穎絕人。書過目輒成誦。時有丘才子之名。軀幹魁梧。見者疑爲武人。君亦樂以武俠自任。乙未。清廷割臺灣畀日本。君帥義師自保。屢電抗爭。且嚙指血爲書。上之清廷。終不省。曰。是與臺民恩義斷矣。建議立臺灣民主國。奉臺撫唐景崧爲主。臺民推唐爲總統。君爲副。當是時中國閉關久。泰西民主之說未流衍中土。士民蟄伏專制淫威之下。乍聞君議。皆蝮口結舌不敢贊一語。甚且以危言相悚。建國海上。孤立無援。應君毅然行之不顧。事雖不成。然獨倡義於民國紀年十七載前。不可謂非豪傑人也。已內渡。歸潮。寄籍海陽。復於鎮平故鄉。經營草廬。奉親居焉。因念欲開民智。張民權。非主張精神教育不爲功。故君初居潮。主講韓山東山兩書院。皆以實學訓士。猶以書院舊制。新智識灌輸有所未盡。倡辦嶺東同文學堂。時值戊戌改變後。清廷方復科舉舊制。使民疲精於八股。君艱難締造。不辭勞怨。躬往南洋募款。十餘年來嶺東民氣。蓬勃奮發。國民軍起。凡光復郡縣。莫不有嶺東人

參與其間。皆此校倡導之力也。興學議起。首辦鎮平東山員山兩族學。於鄰邑勸辦學校以百數。在粵連任廣州中學。兩廣方言。及商業學校監督。兼爲學務處議紳。諮議局副議長。關於民事。皆力任艱鉅。平居需需若無能。遇大利害所在。臨機決斷。大聲振屋瓦。廣東受賭害數十年。一旦湔滌。非君莫任。清廷官吏。屢以革命嫌疑逮捕士類。君居間調護。保全實多。去秋武漢倡義。旬日之間。全國響應。君言內渡十七年。無若今日快心者。乃出指癥示予。曰。予固未常一日忘此痛也。粵省光復。舉君爲教育部長。學子莘莘均慶得人。會南京組織臨時政府。君任粵代表。挈予同往。一時豪傑雅推重之。嘗冒雪謁孝陵。有詩紀遊。意氣豪甚。因言南京光復。臨時政府又在茲地。民國當有三大文字。祭告孝陵。延平。洪王也。機務倥偬。卒未果作。及臨時政府告成。亟南歸。舟次廈門。時福建省議會未成立。徇廈商之請。特電閩都督速行召集。大旨以革命掃除滿清稅政。若一切仍舊。安用鐵血爲。并言民國新造。斷非一二人專制可以成功。君本勇於任事。舊籍又隸閩。故不嫌越俎如是。至潮。始接參議院議員之電。而君已病矣。京粵函電交馳。且以粵督相推舉。時病益劇。君嘗言願居監督政府地位。卽不病亦不任受也。返山居半月。新紀元二月二十五日子時。卒於員山里第。享年四十有九。曾登己丑甲科。自民國起義。并將舊名逢甲棄置不道。倉海君者。君之別號也。因以爲名。在南京遇衛戍總督徐紹楨。見君名刺。待以恆

流。詢知前名。重握手示敬。歡好若平生。蓋君名震鑠中外。別號人或未知。今僅稱別號。不復稱君諱者。從君志也。君之詩文。久雄視海內。然君雅不欲以詩文人傳。故所爲文皆不繕稿。詩則舊歲始輯。內渡後所作。編爲嶺雲海日樓詩彙。而庚戌羅浮游草。則已付印單行矣。德配林。先君卒。繼配廖。妾氏呂。有丈夫子七人。琮字念台。鎮平中學畢業。琳肄業中學。璟出後三弟。瓊出後六弟。女子二人。一配平遠林震。今爲粵北伐軍師團長。一未字。孫一人。將以四月二號吉時。葬於印山故居之原。令弟輯甫時甫以復從君遊。知君最悉。囑爲彰幽之文。因撮其大略。並爲銘曰。

天生偉人爲民國。民國成立完天職。槃槃公才與公德。萬古不滅視此刻。

中華民國二年四月

宗人丘復敬撰



# 倉海家兄行狀

丘瑞甲作

先兄諱倉海。字仙根。號蟄仙。以逢甲子生。故舊又諱逢甲。生於臺灣苗栗縣銅鑼灣。先考設教處。長移居於彰化縣。後臺改省。分治爲臺灣縣者也。性聰穎異人。六歲能詩。七歲能文。十三冠童軍。受知清巡撫丁

日昌唐景崧

十四補廩膳。十六以院試第一人陪拔。

臺粵籍人士多窮學雖優固不得拔士竟相沿成例

二十四飲鹿鳴。旋捷

己丑科南宮。滿清科舉沿明舊制。當時種族思想未萌。凡得科舉者。雖異族衣冠亦無人不尊榮歆羨。先兄以時勢如此。不得不藉此爲說法之具。實非其本意也。故終身不仕滿廷。歸養之後。諸弟皆幼。家計未充。上體親志成家。下教諸弟成學。其掌教全臺各書院也。課文以外。兼講內外史。及勸人閱報。臺人士之有種族思想。及知民主政體之樂者。皆先兄之教也。臺俗多土豪。霸田佔產。習以爲常。先兄竭力驅除。此風以殺。所居百里內外無欠糧無詞訟者。亦先兄秉先考之教有以成之也。甲午中日事起。捐家資編全臺壯民爲義軍。計成幕者三十五營。乙未春。滿廷割臺於日。先兄電爭。繼以電罵。卒不得挽。遂集臺人倡獨立爲民主國。舉清撫唐景崧爲大總統。守臺北。劉永福爲幫辦。守臺南。先兄爲大將。



軍守臺中。防守嚴。日人不得登陸。未幾臺北告急。先兄率所部往援。至中途。而臺北破。唐已先去。日兵乃由鐵道南下。直至新竹縣。義軍力禦。經二十餘晝夜。初戰皆捷。因槍彈少不支。先後殉難者丘國霖。姜少祖。吳湯興。徐驥。皆先兄前營部將。只因地淪異族。其烈不彰。至今思之。猶令人悲傷不已也。先兄知事無可爲。乃回臺中。與先考妣倉卒內渡。時已六月初旬矣。彼時家仍留臺中。不數日日人搜求急。住家被焚淨盡。幸田谷未收。地產尙存。舉家卒得全回原籍者。實賴有此耳。六月以後全家暫集於泉州。始回鎮平原籍。築室員山。今文福鄉淡定村。買田而耕。乃稍得安居。先兄以縣地山僻。事不足爲。留諸弟治家。而自經營潮汕。自後住潮日多。主講韓山景韓東山各書院。以科舉必廢。課文外兼課科學。當時風氣未開。未免駭俗。每以此受當道忌。復以中國危機日迫。非開民智養人才。莫能挽救。庚子秋不避時忌。倡辦同文學堂於汕頭。以嶺東門戶在汕。易以萃會才智。籌款闢地。竭力擔任。其造就人士更不限嶺東。各省一體收攬。嶺東新學實以此爲先導。功成告退。遂由汕進省。仍專注意振興學務。任全省教育會長。兩廣學務所議紳公。兼廣州府中學堂及兩廣方言學堂監督。及廣東省諮議局成立。復被舉爲議長。在局首倡禁賭。卒達目的。其餘全省興利除害之議。賴以成者。實不少。當時風氣日開。出洋留學者衆。凡有革新思想者莫不趨之若鶩。無奈滿官權勢尙熾。少年志士歸國。稍一不慎。必罹其害。

卽國內學界亦多受其阻壓。所以凡事仍不能不假周旋之力。以達其目的。十數年來先兄所以暗護志士保持新學者。用心亦良苦矣。惟聲望日重。忌者愈甚。滿大員胡湘林王秉恩等。明防暗察。無所不至。甚至革命黨魁之名目。公然列之公牘。登諸報章。先兄處之自若。仍力振學務。養人才而已。及廣東辛亥三月二十九日之役。可報館。盜業公司。被封。旅港商學公會被查。不獨滿官忌。而一般依官勢之狐輩。且有藉之以密控於當道者。武漢事起。滿將軍鳳山。密奏廣東革命大紳先兄爲首。先兄行爲如故。未幾。張鳴岐許布獨立而遁。知者無不謂先兄之有暗力存焉。獨立後軍政府以先兄熟於教育。卽公舉爲教育部長。并參謀各部要務。及南京克復。將組織中央政府。被舉爲廣東全省代表。北上參與組織。政府成立。再被舉爲參議院參議員。先兄以民國存亡之機。全在南北和與不和。乃力主和議。和議一成。大局遂定。計數月以來。國事繁劇。因之積勞成病。口吐鮮血。始由南京告假而歸。自病至易簣。遺言所言。皆民國大局安危之計。并未言及家事。其一心爲國有如此者。嗚呼。抵家僅十餘日。竟至不起。痛哉。竊謂中國共和政體起於臺灣。成於中華民國。數十年來先兄之苦心苦力。一旦得達其目的。原極大幸之事。而天竟不假之年。終身鬱屈於專制之下。百事阻壓。不能大舒其才。僅見民國成立。忽爾長逝。有心人無不同悲。實大不幸也。古語曰。才人命短。先兄幼有神童之目。長有才子之名。詩文才

學。早已傳知當世。今享年不久。其此之謂乎。當先考妣在日。先兄每出門半載必歸省。數十年如一日。愛兄弟之情篤重。諸弟雖維持家計未得出外遊學。而教訓則不懈。待姪猶子。愛育無異。子五人。畢業中小學者二。餘皆就學。悲痛之餘。願子姪輩皆不愚魯。是大不幸之幸。所得藉以聊自解慰者此耳。

民國元年三月初一日 期服弟丘輯輔拭淚謹述。

# 倉海先生丘公逢甲年譜

## 前誌

公初諱逢甲。以逢甲子年生也。字仙根。號蟄仙。又號仲闕。以詩文常署倉海君。及民國成立。思去舊更新。卽以倉海爲名。故學者稱倉海先生。詩文又別署南武山人。

先世由河南遷福建上杭。宋季二世祖創兆公。參文信國公軍事。始奉父夢龍公遷居廣東梅州之員山。卽今蕉嶺之文福鄉也。

十八傳至曾祖仕俊公。以鄭氏關臺。始由粵僑居臺灣彰化縣。曾起義佐平林爽文之亂。祖學祥公。鄉居鋤強扶弱。有任俠風。

父龍章公。字誥臣。學者稱潛齋先生。清咸豐初年補臺灣府學生員。嗣補廩貢生。德行純厚。講學卜居之處皆化。戴萬生之亂。與學祥公冒萬險。棄家財。救粵壯丁二千人於刀斧之下。而不自爇也。

母陳氏。龍章公之繼配。精明仁厚。有古賢婦風。

公兄弟十人。姊妹四人。成人者九人。公行二。長兄名先甲。字達甫。曾佐興臺灣義軍。後公六年歿。三

弟樹甲。字崧甫。臺灣廩生。有文武才。乙未抗倭有功。先公歿。四弟瑞甲。字輯甫。鎮平廩生。五弟兆甲。字時甫。皆入民國有所建樹方未艾者也。

公之實歷如次。

實 歷

紀元	歲次	國家民族大事	年 齡	行	誼	詩 篇 著 作
黃帝紀元四千五百六十一年 清 同 治 三 年	甲子	六月。洪秀全歿於金陵。太平天國亡。	一 歲	是年十一月二十八日公誕生於臺灣府苗栗縣銅鑼灣李氏家塾。潛齋公設教處也。		
清 同 治 四 年	乙丑	是年美國總統一。林肯歿。	二 歲			
清 同 治 五 年	丙寅	五月。新疆回亂。是年普奧戰。	三 歲			
清 同 治 六 年	丁卯		四 歲	是歲即就塾。由潛齋公自教讀。聰穎異常。有神童之目。		
清 同 治 七 年	戊辰	六月。捻匪悉平。是年。日本明治即位。維新銳意。	五 歲			

清同治八年	己巳	十一月·陝甘回 亂平·是年普 法戰爭	六 歲	能屬對吟詩。
清同治九年	庚午	十月·俄占我 伊犁·十一月 伊丹社·蕃殺 琉球難民·意 帝是年德意志 國成立	七 歲	能爲文。
清同治十年	辛未	三月·貴州苗 亂平	八 歲	
清同治十一年	壬申	正月·雲南回 亂悉平·二月 丹社蕃殺日本 難民·五月·日 來抗議·日大 難抗議·日大 來抗議·日大 難抗議·日大 以化外事·清 蕃事·日本爲 社丹社	九 歲	學祥公捐館·隨 縣東勢角奔喪· 是年濟齋公在 設教·公亦隨往 是處讀書·魏家
清同治十二年	癸酉		十 歲	
清同治十三年	甲戌		十一 歲	

倉海先生丘公逢甲年譜

<p>黃帝紀元四千五百七十二年 清光緒元二年</p>	<p>乙亥</p>	<p>三月出兵侵 塞不利 八月索清賠 款而退</p>	<p>德宗沖齡立 慈禧太后訓政 秋瑾球王受 日迫來告急 清廷不理 是年法理國重 定共和</p>	<p>十二歲</p>	<p>清光緒二年</p>	<p>丙子</p>	<p>十三歲</p>	<p>仍隨潛齋公讀書於新伯公劉家 問佐課蒙童</p>	<p>潛齋公在新伯公劉氏家塾設教 公仍隨讀</p>
<p>清光緒三年</p>	<p>丁丑</p>	<p>十四歲</p>	<p>是年與西班牙 訂古巴華工條 約</p>	<p>是年應童子試 受知於蓬撫 兼學使丁日昌 補弟子員赴 試時沿途須 潛齋公背負 試卷全蠶第 一以公年最 幼送卷最早 丁中丞待命 作全蠶竹枝 詞百首日未 晚已成驚為 才子甚期許 贈東寧才子 一方</p>					
<p>清光緒四年</p>	<p>戊寅</p>	<p>十五歲</p>	<p>新疆亂平</p>	<p>是年遭祖母羅夫人喪</p>					
<p>清光緒五年</p>	<p>己卯</p>	<p>十六歲</p>	<p>日本發艦取琉 球改爲沖繩 縣</p>	<p>是年公生母陳夫人遽爾薨逝 公哀痛甚</p>					

清光緒六年	庚辰	與美訂華工條約	十七歲	隨潛齋公至彰化縣王子社邱氏家塾佐教兼讀書家亦遷是
清光緒七年	辛巳	正月。伊犁條約成。收回伊犁	十八歲	
清光緒八年	壬午	春。置新疆省。三月。法兵據我屬國安南。七月。朝鮮內亂。主排日。我定之。而許日駐兵。	十九歲	本年補廩餼。
清光緒九年	癸未	八月。我國遣兵安南拒法。	二十歲	是年迎娶夫人廖氏。廖賢芳先生之長女也。
清光緒十年	甲申	閏五月。法兵陷臺灣之基隆。劉銘傳却之。七月。攻福州。八月。又據澎湖。冬十月。朝鮮金玉均聯日作亂。我軍平之。	二十一歲	自公童年。邊警日急。中法事變。臺島直當其衝。尤感國家民族之患。由是益留心中外事。故四方文化。慨然有維新之志。
清光緒十一年	乙酉	春二月。我軍敗法軍於諒山等處。中法媾和。四月。	二十二歲	秋。赴福州應試未售。



清光緒十六年	庚寅	與英訂藏印條約。認哲孟雄為英保護國。	二十七歲	主講臺中府衙文書院。臺南府羅山書院。嘉義縣崇文書院。年中往來各書院間。概括帖之
清光緒十五年	己丑	二月。慈禧太后歸政。英占我屬國哲孟雄。	二十六歲	是年正月。首途赴北京會試。五月揭榜。中式八十一名進士。殿試。欽點工部主事。虞衡司。公無意仕途。引見後即告假。回里省親。七月。乃抵家。是科總裁為廖壽恆。及宗室崑岡。
清光緒十四年	戊子	西藏與英起釁。我不能止。藏敗。	二十五歲	仍隨潛齋公在王子社教讀。是年秋。復赴福州應癸試。中式三十一名舉人。主考黃體芳。呂佩芬。廖夫人生女。名淡。
清光緒十三年	丁亥		二十四歲	是年秋。臺灣巡撫唐景崧招公於幕府佐治。公因師事唐中丞。攻舉子業。由是管接海內學子。見聞日廣。在臺南撫署住至冬至。乃歸省。是年。啟育螟蛉子瑛。
清光緒十二年	丙戌	春。英併我屬國緬甸。	二十三歲	仍隨潛齋公佐教兼讀書。本年廖夫人生女名順。旋不育。
		和。許安南屬法。九月。改臺灣為行省。		



黃帝紀元四千五百九十二年  
臺灣民主國永清元年  
清光緒二十一年

乙未

正月。倭軍陷山東威海衛。我北洋海軍全滅。二月。牛莊營口陷。我陸軍主力亦全潰。二月。倭軍占澎湖羣島。三月。西歷四月十七日。李鴻章伊藤博文簽訂中日和約。馬關。割臺灣澎湖立。割臺灣澎湖列島及遠東

軍於牙山豐島。七月一日。中日宣戰。八月。我陸軍大敗於平壤。海軍大敗於大東溝。朝鮮遂無我軍蹤跡。十一月。遼東倭地全陷於

三十二歲

清廷不顧民命。割臺之議起。公無任憤慨。聯合臺紳電籲電爭。悲憤激。乃首倡自主之說。呼號國中。登高一呼。全臺皆應。爰集全臺人士。倡立臺灣民主國。羣推公起草憲法。擇法美之長。制定法度。開議院。立政府。以藍地黃虎為國旗。永清為年號。於是亞洲之第一共和國成立。總統於五月一日公佈就職。當時以唐景崧為臺灣巡撫。易以號召內外。故衆舉為大總統。統原有官軍。守臺北。總兵劉永福為幫辦。統黑旗舊部官軍。守臺南。公為義軍大將軍。統臺民新編義軍。守臺中。時全臺形勢在臺北。物質精華。政令大權。

奔走呼號。以守土拒倭。號召鄉里。均命入營。全臺編册有一百六十餘營。特別編練者三十二營。以誠信壯靖等十六字名營。每字五營。成曉以大義。動以利害。勤加訓練。成軍不久。卓著成績。初稱團練。是年十月。改稱義軍。公益憂勤。惕勵不敢稍懈。是年呂夫人生子。名琮。

乙未內渡後。詩篇始有存稿。皆為七月以後之作。其離臺詩六首。始乃民國十四年。丙申。兩年之集。是為辭臺歸粵。期。詩多新。亡家破。不黍新亭。悲涼哀壯之

二歲至二十六歲。為應試期。詩多適於應世。考之作。二十一歲。至三十一歲。為自期。表現志較能自由。期之篇什。此諸期之篇什。均無存者。而所捷與瞻高。雅。敏。發。為。世。所。周。知。



清光緒二十三年	臺灣民主國二年 清光緒二十二年	
丁酉	丙申	
十月。德強佔膠州灣。	臺灣義軍自去夏以來。至本百餘戰。至北年二月。義軍完宜。蘭。暴。動。之。謀。失。敗。義。軍。完。全。消。滅。名。實。俱。亡。矣。俄。在。朝。鮮。春。除。日。軍。勢。驅。除。俄。軍。勢。力。握。有。韓。主。權。夏。中。俄。喀。西。尼。密。約。成。許。俄。在。東。北。地。勢。俄。在。東。北。劃。勢。力。範圍。	
三十四歲	三十三歲	
本年為潮州知府李士彬敦請主講韓山書院。專以新思潮及有	夏。淡。定。村。山。居。草。創。額。其。廬。曰。心。泰。平。草。廬。名。其。堂。曰。培。遠。堂。五。月。赴。廣。州。圖。與。粵。東。名。流。接。洽。兼。以。邑。有。劣。紳。土。豪。朋。比。欺。凌。不。得。已。上。訴。奔。波。也。廣。東。巡。撫。許。振。燁。佩。公。義。烈。相。遇。甚。得。約。尚。書。廖。壽。恆。會。奏。經。過。奉。旨。命。回。粵。歸。籍。海。陽。本。年。廖。夫。人。生。子。名。琳。	汕頭。時。家。口。幸。先。後。齊。會。故。部。亦。有。來。相。隨。者。即。回。廣。東。鎮。平。祖。籍。以。印。山。村。祖。宅。已。壞。乃。卜。居。淡。定。村。焉。至。蜜。海。柏。莊。故。宅。則。後。軍。入。壘。後。書。為。所。焚。毀。矣。以。部。將。吳。湯。興。姜。紹。祖。抵。粵。後。以。徐。驥。等。戰。死。甚。烈。丘。國。霖。江。督。張。之。洞。請。轉。奏。撫。為。具。文。江。督。張。之。洞。請。轉。奏。撫。是。年。呂。夫。人。舉。一。子。名。球。
丁酉戊戌兩年之作。可編為第二		

	十一月。俄強佔旅順口。	用之學課土。被目為異端。遣當道忌。歲終辭去。是歲寄寓潮州城。	集。是為潮州。課士期。憤憤。變。瞻念祖國。於。內政外交。感憤。期許。寓意深遠。
清光緒二十四年	二月。膠州灣九十九年。勢力範圍。三。俄訂。三。大連。三。旅順。五。年。順。大。五。年。島。為。勢。方。半。島。為。勢。方。同。月。法。訂。租。廣。州。灣。九。十。九。年。為。勢。力。範。圍。南。為。勢。力。範。圍。又。認。日。以。福。建。為。勢。力。範。圍。五。月。英。訂。租。威。海。衛。九。十。五。年。九。龍。九。子。江。為。勢。力。範。圍。五。月。德。宗。用。康。有。為。梁。啓。超。等。有。銳。意。變。法。維。新。銳。意。變。法。八。月。慈。禧。后。	本年主講潮陽縣東山書院。仍不變其講學立教之旨。公自內渡。亟思培本榮枝。日維新立憲。故對於光緒帝。極為期許。對於太后慈禧之。干政。極為厭惡。與梁維新。大同。諸說表同情。是歲聞變。大敗。德宗被囚。甚為傷感。失。年。廖。夫。人。生。女。名。呂。感。人。本。年。名。廉。人。生。女。名。呂。感。人。生。女。名。廉。人。生。女。名。呂。感。人。家。仍。寄。寓。潮。州。城。	
戊戌	三十五歲		

	清光緒二十五年	清光緒二十六年
	己亥	庚子
<p>囚德宗。復訓。政。六君子。追。捕。年。美。西。交。戰。年。美。西。交。得。古。巴。呂。宋。</p>	<p>五月。法。強。佔。廣州。灣。始。定。租。約。阿。哥。慈。禧。后。立。大。阿。哥。慈。禧。謀。廢。立。</p>	<p>春。列。強。承。認。美。國。門。戶。開。放。機。會。均。暫。免。言。分。中。國。暫。免。瓜。分。慈。禧。后。信。任。義。和。團。在。京。內。外。焚。教。堂。終。與。各。國。宣。戰。東。南。各。省。宣。言。自。保。不。奉。詔。入。國。聯。軍。陷。天。津。七。月。慈。禧。后。挾。德。宗。</p>
	三十六歲	三十七歲
<p>仍講學潮陽東山。兼主講澄海縣。京。韓。書。院。冬。創。辦。東。文。學。堂。於。潮。州。聘。日。人。熊。澤。為。教。授。欲。使。學。者。窺。識。維。新。學。術。也。</p>	<p>是年春。本仍為潮陽縣令。裝景。福。政。府。派。往。南。洋。調。查。僑。民。兼。事。聯。絡。歷。英。法。荷。等。屬。講。教。義。頭。立。校。心。翕。然。因。並。籌。款。謀。在。汕。頭。會。立。保。皇。會。與。中。會。諸。志。士。接。洽。在。港。會。與。康。有。為。梁。啟。超。唐。才。常。陳。鳳。諸。先。生。合。編。持。刀。並。立。小。照。及。南。遊。事。畢。回。湖。則。立。流。行。及。欠。男。球。四。男。球。均。遭。疫。天。折。及。過。返。鎮。平。則。三。鎮。平。里。居。及。過。返。鎮。平。則。三。弟。樹。甲。又。嬰。疾。而。歿。避。地。歸。來。謀。恢。復。家。業。蓋。公。極。傷。心。時。也。</p>	<p>乃。憂。遭。家。變。蓋。公。極。傷。心。時。也。</p>
<p>己亥之作。可編為第三集。是為倡導新學期。表揚古代忠義。振起民族精神。懷昔感。今。舒。寫。抱。負。</p>	<p>庚子之作。可編為第四集。是為南遊策進期。哀詩多感慨。異邦哀。慮時事。為籌思之取也。</p>	

清光緒二十八年	清光緒二十七年	
壬寅	辛丑	
慈禧后德宗由西安回京	<p>三月。復詔籌變法。惟無誠意。七月。北京議和條約成。賠款四萬萬兩。毀京津炮台。許外兵駐要地。</p>	<p>西逃到西安。閏八月。東三省因奉詔排外。各要地全為俄佔。十一月。與十一國公使在北。京議和。保皇會。唐才常等。圖在武漢舉義。事發被殺。百餘人。與漢會孫文。鄭弼臣。史堅如等。起兵惠州。及謀炸廣州。亦敗。</p>
三十九歲	三十八歲	
仍任嶺東同文學堂監督	<p>春。開辦嶺東同文學堂於汕頭。為粵東民立學校之嚆矢。公自為監督。而溫仲和。何壽朋。溫丹銘。諸先生。分掌教務。以歐西新法教育青年。以革命維新鼓勵士氣。有志者趨之若鶩。辛亥革命。嶺東義士多孕育於是。人生一子。名瓊。以嗣樹甲公。</p>	
	<p>辛丑壬寅癸卯甲辰四年之作。可編為第五集。是為嶺東建校期。因一意教務。吟咏自少。即所作亦多感懷時變之期。許將來奮進之意。</p>	



清光緒三十年	清光緒二十九年	
甲辰	癸卯	
<p>正月。朝鮮變 為日本保護 國。俄軍在滿 海陸軍連敗。 日軍進占遼陽 旅順各要地。 六月。英軍入 西藏。達賴逃 青海。興華會 十月。</p>	<p>五月。俄不遵 約撤滿洲兵。 日本出而干 涉。十二月。日 絕交。宣戰。我 宣言。局部中 立。以遼河以 東。任人交戰。 十一月。英軍 侵西藏。英軍 革命思潮漸盛。 是年有封蘇報 案。</p>	<p>正月。日英同 盟。共防俄。 三月。俄宣言 交選滿洲。</p>
四十一歲	四十歲	
<p>三月。由粵垣回鎮平里居。以 內憂外患日急。益積極興學。 在德設自強社。以指導族中 向學子弟。在縣城倡辦初級師 範學堂。旋即開學。冬在榕鏡 辦員山城兩家族學堂。以始 祖諱創兆名校。</p>	<p>雖東同文學堂成立以來。嶺東 門戶已見新文化之曙光。是年 旋即鎮定。公乃告退。謀向省 垣。發展新教育。至廣州接洽奔 走。勾留數月。連年井力勤有 志。青年赴東。遊學。力勤有 人。當時嶺東留學日本者。達 數十人。</p>	

清光緒三十二年		
丙午		乙巳
黃興等起革命 軍於劉、萍 七月、下詔預 備立憲	二月、日俄大 戰於奉天、俄 又敗、日擊殲 俄波羅的海艦 隊、七月、日俄訂 和約於美國、內 俄將奉天境內 權利讓日、我 亦訂約承認 之、同月、詔廢科 舉、八月、派載澤 等五大臣出洋 考察憲政、將 出京、為革命 黨、吳懋所炸、命 秋、吳懋所炸、命 組、吳懋所炸、命 盟、吳懋所炸、命 排、吳懋所炸、命	黃興等謀占長 沙、失敗
四十三歲		四十二歲
公所倡辦之鎮平初級師範傳習 所畢業、改辦縣立中學堂、在 邑為猶族提倡種植果木、經營 商店、並革除奢侈祭祀陋習	在鄉所辦兩族學、皆於本年春 開學、子弟前赴武平、上杭、 宗人子弟、遠往興寧、等邑、 鄰及異姓、籌辦族學、皆得先 宗立、異姓、籌辦族學、皆得先 成、立、異姓、籌辦族學、皆得先 學、立、異姓、籌辦族學、皆得先 踵、立、異姓、籌辦族學、皆得先 教育、立、異姓、籌辦族學、皆得先 公與、立、異姓、籌辦族學、皆得先 子、立、異姓、籌辦族學、皆得先 日、立、異姓、籌辦族學、皆得先 故、立、異姓、籌辦族學、皆得先 本年、立、異姓、籌辦族學、皆得先 以、立、異姓、籌辦族學、皆得先	
	乙巳丙午丁未戊 申四年之作、可 編為第六集、是 為掌教廣州期、 以置身公職、所 作雖憂傷而怨憤 不露、感懷今古 瞻慮中外、拯濟民 復宗邦、拯濟民 族之意、秋懷詩、 次覃孝方韻者、 有粵、秋唱單行 本、粵、秋唱單行 戊申、王豹君之 蜀詩、次彭剛直 韻者、亦有單行 本、蜀詩、次彭剛直 唱和之作、友應酬 時之盛、極一	

	清光緒三十三年	清光緒三十四年
	丁未	戊申
<p>是年。革命黨 疊舉。義於黃 岡。七女湖。防 城。鎮南關。 均敗。五月且有光復 會。徐錫麟刺殺 皖撫。恩銘案。殺 九月。命各省 設諮議局。</p>	<p>是年。雲南河 口有黃興。安 徽新軍有熊成 基。舉革命。 均敗。八月。詔定期 九年。開國會。 十月。德宗及 慈禧。后。先後 卒。</p>	
	四十四歲	四十五歲
<p>又於員山創光學堂附設師範傳 習所。專養成閩贛地方小學教 師。人才。夏。受兩廣總督岑春 煊。聘。任兩廣學務處視學。及 廣州府 中學堂監督。</p>	<p>是年仍任學務處視學。及廣州 府中學堂監督。年暑假則回里 省親。居匝月即復出。自後數 年。在廣州任職時均如此。</p>	<p>被舉為廣東教育總會會長。並 受聘為兩廣學務公所議紳。仍 兼廣府中學監督。 次女淡。於本年秋病故。原已 許字林震。辛亥革命北伐軍勇 將。字公之門生也。 是年。中國革命同盟會。推公 為嶺東盟主。連年勸黨如保皇。 革命。極力拉公。如袁世凱等。均派 人極力拉公。作幕中主幹。惟公 重實際。作事不驚。虛聲。於各 黨有利於國家民族之計劃。則贊 助之。而不驟從。同其形式。</p>

<p>黃帝紀元四千六百零 清宣統元年</p>	<p>清宣統二年</p>
<p>己酉</p>	<p>庚戌</p>
<p>四十六歲</p>	<p>四十七歲</p>
<p>三月。繼母楊太夫人卒。丁憂 回家。滿百日復之廣州。被選 九月。廣東諮議局成立。被選 為議長。廣學堂監督。惟 是年受聘為兩廣總督公署議 紳及兩廣方言學堂監督。惟 學務公所職仍舊。</p>	<p>正月。廣州新 軍倪映典受革 命黨趙聲之運 動。譚我征藏 是月。薩達 軍入拉薩。達 賴逃印度。汪 三刺攝政王被 捕。六月。日 俄訂</p>
<p>己酉庚戌辛亥三 年之集。是為政 教兼預期。以職 位時勢關係。多 事描寫山川。少 寫情感。而有所 寫。則列華夷之 倡忠義。多揭民 族國家精神之 作。庚戌漫遊羅 州西樵。有羅浮 遊草專刊。別具 雅格。飄逸。別具 風格。遊南京三 辛亥。則為最後絕 筆矣。</p>	<p>任職仍去歲。在諮議局首倡禁 賭。一時。霹靂手段。通過斯案。名 震一時。提議為民興利除弊之 案甚多。暇遊羅浮西樵等地。 秋。得暇遊羅浮西樵等地。 近年。新軍及陸軍各校陸續成 立。公極注意於其人物之聯絡 及養成。以為興國革新。有賴 於是。革命同盟會趙聲等與公 深相結納。</p>

黃帝紀元四千六百零  
 清宣統三年  
 (是年革命軍初起) 皆用黃帝紀元  
 而稱四六〇九然  
 據近年中華商務  
 印局出版紀元通  
 考歷代年表等詳  
 八為正應以四六〇

辛亥

協約認日韓合  
 併及滿蒙勢  
 力範圍日併朝  
 鮮八月資政院  
 開院以各省代  
 表疊次請願宣  
 統五年開國會  
 雖有清廷於政  
 親貴用更政而  
 措多失民心舉

正月俄強訂  
 在蒙回得特殊  
 利益約溫生  
 三月初廣東將  
 才刺殺廣東將  
 軍李琦  
 三月二十九  
 日黃興等舉  
 革命軍於廣  
 州人死七  
 十二月成立新  
 內閣皇族占  
 大半外蒙受  
 俄煽獨立稱

四十八歲

連年革命排滿風潮益急。黨人  
 到處暗殺舉兵不擇地。自  
 牲甚大。其失陷者。公輒以自  
 己政治社會地位為調護保  
 全。曰義勇青年國之元氣也。  
 本年三女錦。九弟新宏。先後  
 公父潛齋公。體本強健。連年  
 因親屬屢有喪亡。至愛傷體弱。  
 本年正月七日。公適歸省。在  
 年七十有九。潛齋公素以德化  
 悲痛欲絕。葬祭者幾及萬人。舉  
 喪百日。後因時局緊急。當局  
 屢電催促。公以義不容辭。乃  
 於七月節哀晉省。重理各職。  
 公在粵為提倡民主之首領。內  
 渡後則專以興學作育革新志  
 才。並以政治地位暗護海內志  
 士。至是聲望益隆。忌者愈甚。  
 至有公然以革命黨魁名目列之  
 公。廣登諸報章者。公處之自若。  
 武漢事起。新任廣東將軍鳳山。

帝七月，川民爭路，事益激。朝命剿辦，遂激變。八月十九日，革命軍舉事。武昌推黎元洪為都督。湖南、江西、陝西、雲南、江蘇、廣西、安徽、福建等省，相繼宣布獨立。九月四日，廣東將軍鳳山被炸。九月十九日，廣東宣布獨立。九月初，清廷起用袁世凱，督攻湖北。軍大捷。幸十月十二日，蘇浙聯軍克南京。革命軍之類勢始一振。廣東組織北伐軍。由

密奏廣東革命大帥以公為首。擬就職後嚴厲捕治。公亦行為如故。蓋早置生死於度外也。乃鳳山登岸，即被刺殺。而廣東革命勢力益固。及九月中旬，公暗事開導，使兩廣總督張鳴岐、水師提督李準及諸文武，亦贊成獨立。兵不血刃，而復廣州。及中華民國軍政府成立。被舉為教育部部長。旋被舉為組織中央政府代表。於十月北伐軍前進江北。及南京臨時中央政府成立。復被舉為參議院參議員。公以為革命軍從此推翻清室，建立共和，賢能在此。誠意振刷，則洗雪國恥。恢復故土，可指日計。故數十年胸中塊壘，幾然若失。惟公因數月繁劇憂勞，遂得吐血疾。臘月上旬，抑鬱南歸。將休養。抵廈門。聞閩局未安，以己昔聞藉對閩當局，猶力為策劃。抵汕頭，則粵垣將佐來電促駕。將公推為廣東都督。時已病甚。及臘月下旬，抵鎮平山居。則言動已難。譚延闓時或清醒。則詢大局安危事。未言及私。聞清帝退位。南北統一。則色然喜。聞袁就職。孫解職。則曰：哀之為人。孫之意志。吾

海道北上 協攻南  
 月中北一 月收  
 復江至 境逐  
 清兵二 境逐  
 十月一 十八  
 日南 議和於  
 代表 議和於  
 上海 議和於  
 十一月 十日  
 十七省 代表開  
 臨時大 總統選  
 舉會於 南京  
 孫文當 選為大  
 總統 黎元洪  
 為副 黎元洪  
 十三日 孫文  
 至南京 就職  
 定國號 為中華  
 民國 改用  
 歷國定 日為  
 民國元 年元月  
 元日 元月  
 十二月初 八  
 日段祺 瑞率  
 北方將 領四  
 六人電 迫清  
 退位二 帝  
 日清宣 統下  
 詔退位 於  
 五族共 和之勢  
 成

知之矣。前途未可樂觀也。其  
 為國情體。先機識見。有如此  
 者。

<p>黃帝紀元四千六百零九年 中華民國元年</p>	
<p>壬子</p>	
<p>正月二十一日(新歷三月十日)袁世凱受第二期臨時大總統任於北京 二月十三日(新歷三月十一日)參議院議決中華民國臨時約法由孫</p>	<p>二十八日參議院選袁世凱為第二期臨時大總統黎元洪副之</p>
<p>四十九歲</p>	
<p>是年正月八日(新歷二月二十五日)丑時公在家薨逝享年僅四十九耳民國未固享</p>	
<p>歿。嗚呼痛哉。天不假年。癡志而</p>	



## 後誌

### 一 著作

公之著述。在乙未以前者。以遭臺灣兵燹。詩文均無存。即在乙未以後。亦僅詩有輯稿。而文則無之。其他楹聯小品。則更無論矣。蓋公幼即喜詩。故於詩稿常自編存。於文稿函稿則散置不輯。實則其散文函札。筆力雄健。胎息韓蘇。而意識超卓。足匡時俗。其可傳不亞於詩也。他日當輯錄另刊。然只乙未後之詩篇。其隨時咏作。亦尙有散軼者。

其楹聯小品之膾炙人口者。如潮州金山書院酒樓聯。曰。憑欄望韓夫子祠。如此江山。已讓前賢留姓

氏。

金山對面  
有韓山也

把酒弔馬將軍墓。奈何天地。竟將殘局付英雄。

南宋殉國勇將馬  
發墓在金山也

題金山書院藏書

樓聯。曰。西北揭陽嶺。東南太平洋。此樓萃山海奇觀。望遠登高。頓起八表經營想。刺史韓昌黎。銜官趙天水。所學得聖賢宗旨。讀書論世。莫負千秋尙友心。在臺灣傳頌者。如題鄭成功廟聯。云。由秀才封王。爲天下讀書人。別開生面。驅異族出境。語中國有志者。再鼓雄風。

公之字。自謂不甚得意。然雄奇豪爽。一似其人。晚年有南海神廟碑記。勒石南海波羅。世多摹榻稱道。

## 二 軼事

公才思敏捷。幼有神童之目。十四歲由臺中赴臺南應歲試。道遠體弱不勝步履。潛齋公背負而行。有士人哂之。故命對曰。以父作馬。公隨應曰。望子成龍。及入考場。學臺丁日昌以其年幼。詢其名。曰逢甲。卽以命對。曰甲年逢甲子。公隨曰。丁歲遇丁公。以是歲爲丁丑也。丁中丞大奇之。

公在臺灣民主國之職名。現頗難確定。因民主國正式政府成立時期甚短。始則單事準備。編制一仍清廷。繼則日事兵戰。名位不重。稱道時變。而現與民主國有關人物。多已謝世。公之至親骨肉。現存者。在當時又皆年少。詢考殊難矣。據日本參謀本部所編日清戰史。第七卷臺灣賊徒行動篇。稱臺灣民主國之建立。全由工部主事丘逢甲所主倡。又曰。工部主事丘逢甲統義軍守臺中。國內諸中東戰紀。及近人所編各近世史。亦僅稱工部主事丘逢甲。倡議自主。登臺誓衆於新竹。是皆仍清廷名位之舊。無道及其在民主國之職位者。甲午秋。公辦全臺團練。人皆稱曰丘總辦。割臺後亦有仍此稱謂者。亦猶現在臺人稱唐景崧曰唐撫臺。而不曰唐總統。是以時間久暫爲準者也。惟丘輯甫先生所作行狀。稱民主國成。衆舉公爲大將軍。丘荷公先生所作墓誌銘。稱推公爲副總統。江山淵先生所

作傳稱推。公爲副總統兼大將軍。則又皆不一致。以公平日未自稱副總統。而所用私章則有刻義軍舊帥者。故本刊以臺灣民主國義軍大將軍爲署簽。他請留俟後考矣。

公自殿試欽點工部主事後。直至清亡。未有任實缺官職。乙未內渡。曾由粵撫許振燾呈奏。奉旨回籍海陽。丁未。曾由粵督岑春煊呈奏。奉旨留粵辦學。其在粵任事。歷嶺東同文廣府中學兩廣方言等校監督。學務公所總督公署等處議紳。廣東諮議局教育會等機關首長。皆由民衆所推舉。官廳所禮聘者也。地位清高。爲衆士所欽仰。多願拜其門牆。及入民國。則以嶺海碩望。民主先進。代表革命策源之廣東民衆而北上組織政府焉。

推倒滿清。建立民國。爲公之素志。惟公雅不欲曝彰。辛亥以前。於革命事業陰行培植庇護。厥功甚大。而人多不知。蓋其恬淡名利有如此者。今中山大學校長鄒先生魯。常謂公翊助革命。有三事爲其所最感念者。一。爲聘朱執信（當時名大符）爲兩廣方言學堂監學。以作育革命思想事。二。爲庚戌新軍起義。公向巡警道力保鄒先生及陳炯明生命事。三。爲辛亥三月二十九以後。促同志速進行革命事。鄒先生公之門弟子。當時熱心革命。而今日國民黨之先進也。

### 三 身後事蹟

壬子春。公逝世後。南北哀悼。以爲失民族導師。臺灣志士尤悲痛。中央政府及粵政府均致弔唁。并致賻卹千金。

關於公爲國家民族致忠竭義之史蹟。以臺灣獨立拒倭一事爲最彰著。在公生時凡編清史及近世史者。已略有述及。迨入民國。公去世後。則各史冊益加闡揚。惟詳述臺灣獨立情形之著作。則在公生前身後均甚少。在生前有上海廣學會刊中東戰紀本末。及姚錫光東方兵事紀略。雖於民主國成立經過。及其文件較爲詳述。而於其政制策劃亦缺焉不詳。日本參謀部編日清戰史。則於義軍將領轉戰實情頗詳。而於統馭之機關方略。亦不備載。至公歿後所出各史冊。則更無較詳者。不過於公倡議臺灣自主。對於民族祖國之真價值。較能認識。不致有加以譏評者耳。

景仰公之志行。而爲之作專傳者。有國會議員江山淵先生。名璩。高州人也。載於民國四年商務印書

館小說月報。於公之忠憤智慮。甚能表現。惟於唐總統景崧。未免責備過甚。或者江先生愛護臺灣自主之振發漢族精神。遂期之切耳。此傳述臺北失陷情形。敘人敘地。均奕奕有生氣。江先生或其親友。必於當時臺灣。有目親耳聞者也。民國二十年廣州越華報。二十二年廣州國華報。亦曾載公專傳。其敘事略同江傳。本年南京教育部編教育年鑑及廣東中山大學出版文。史月刊第五期其預告目錄均載公專傳內容惜未見。

公之詩詞常爲海內所稱道。梁啓超先生飲冰室詩話贊爲詩界革命鉅子。與黃公度先生同致景仰。其他聞人詩話稱述者不勝枚舉。

自九一八事變三省淪倭。公之行誼。忽甚爲人所思慕。因思其人。遂及其著作。連年南北來索詩集及請代刊印者不絕。民國二十二年五月。天津大公報且爲公出專刊。由清華大學教授吳宓陝西人主稿。至各處紀述乙未臺灣自主抗倭之事蹟者。連年尤不勝舉。所謂疾風知勁草。世亂識忠臣。公之精神其與漢族同不朽矣。

#### 四 業師知遇

公自蒙童而至科第。其最主要業師。厥爲公父潛齋公。學宗程朱。所至薰化。臺南北門弟子甚衆也。

在家庭之外。公親炙之業師而兼知遇之長官。厥爲唐公景崧。字維卿。廣西灌陽縣人。清翰林。其文章事業。世所周知。

至科第受知之宗師。臺灣童子試。爲丁公日昌。廣東豐順人。爲當時臺灣巡撫兼提督學政。公初步成名。全受其吹噓。福州鄉試受知之主考。爲黃體芳。呂佩芬。北京會試受知之總裁。爲廖壽恆及宗室

崑岡。又鄉試房師劉幼丹。湖南人。甚相知。公內渡後。劉公時爲江西布政使。有招公統練常備軍之議。

歸國後初受知遇之長官。爲許振煒。字仙屏。光緒乙未丙申時爲廣東巡撫。嘉公志行。曾與尙書廖壽恆聯銜會奏。公守臺義烈。請旨特允回籍廣東海陽者也。

其後在粵受知之長官。爲岑春煊。字雲階。廣西西林人。光緒丙午丁未時爲兩廣總督。勤奮新政。以公在嶺東辦學有成。聘公到廣州協辦兩廣學務。因爲具奏。請旨留粵辦學者也。

### 五 至友

公之友識雖甚廣。而至友則寡。雖老成凋謝。查考難周。茲但舉其所知者如下。其不知者則缺焉。

在臺有謝道隆先生。字頌臣。行四。彰化縣人。清廩生。秉性忠義。乙未助公舉義抗倭。事敗主歸國謀恢復。隨公內渡者也。其孫善飛行術。現爲中央空軍長官。

在潮梅講學時之至友。有溫仲和。字慕柳。一字清翰。林同辦嶺東同文學堂。黃遵憲字公度。別號人清。

湖南布政使。梁居實。字詩五。別字仲途。清德比日諸國使館參贊。陳庭鳳。字鶴雲。清孝廉。皆道義交。有共濟時

艱之志。溫黃梁三公皆嘉應人。陳公則鎮平人。

在廣州掌教時之至友。則有劉士驥。字銘伯。廣東龍門人。況士任。字晴臯。廣西人。皆兩廣學務公所同事。湯壽潛。字蛰仙。浙江山陰人。是皆常聞。公稱道其才識志操者。劉公爲保皇黨所刺殺。況公亦早歿。惟湯公辛亥革命會出任浙江都督。

其爲公作墓誌銘之同宗丘馥。亦公之至好。號荷公。一字果園。福建上杭人。會隨公赴南京組織臨時政府。並曾爲公編次詩稿者也。公作粵代表赴南京組織臨時政府時隨行者除荷公外尚有林魯傳李柏存黃慕松丘心容丘香晴等多爲公門生

### 六 門弟子

公以講學多年。門弟子之衆。難以舉數。有舊書院課藝弟子。有新學校訓育弟子。有執古禮投拜弟子。有自行賞識收羅弟子。有單請教文藝詩詞弟子。有仰慕德學隨侍執務弟子。有問道私淑弟子。惟籍貫以廣東爲獨多。則以講學所在地故也。雖以考查維艱。難免不盡不實。亦略舉世現知名者數人於次。以見一斑。未詳者缺焉。

鄒魯 字海濱。現廣東中山大學校長。中央執行委員。

黃慕松 現參謀本部次長。中央執行委員。

姚雨平 現中央監察委員。辛亥革命北伐軍總司令。

林震 字叔慧。辛亥革命廣東北伐軍第二師師長。收復江北有功。

林修明 黃花崗七十二烈士之一。

饒景華 字希野。前虎門要塞司令。將軍府將軍。

李次溫 現中央監察委員。

又聞前粵軍第一師師長鄧鏗。前臨時大總統府政務廳廳長謝良牧。前廣東省省長陳炯明。均曾拜公門牆。現廣東省政府主席林雲陔。則爲兩廣方言學堂之門生云。尙俟再考。一時未能備舉矣。

### 七 後人

公初訂婚臺中林氏。未成婚而歿。後迎娶廖夫人。次娶呂夫人。共有子八人。女五人。子名琰。斌。琮。球。琳。瓊。瓚。女名順。淡。錦。廉。廣。其成長者子五人。女二人。依年齡順列於次。

次女 淡 許字平遠。門人林震。戊申年二十一歲。將成婚而歿。

三男 琮 字念臺。留學日本。得東京帝國大學工學士學位。

五男 琳 字鎮侯。留學日本。在國立東京高等師範學校文科畢業。



五女 庶 許字興寧饒肇樞。字伯丹。北京中國大學法律科畢業。

六男 璟 字小宋。留學日本。因苦學染病。民國十一年壬戌。二十二歲夭歿。

七男 瓚 字偉侯。現在廣州習法政學。

八男 瑯 字公範。留學日本。在東京文理科大學習理科。

至公諸孫。年尚幼。不備列。

### 八 譜跋

研究史學。欲知先賢之行誼思想著作。如何進展。年譜尙矣。但從來作年譜者多數百年後之學子。若爲人子孫而爲其先人作年譜者。則甚少。然年湮代遠之學子。則材料不易充足真確。近親子孫。則措辭稱謂難。不免主觀溢美。雖然。公去世不過二十餘年耳。而老成凋謝。時亂年荒。事蹟之湮亂。著作之遺訛。日甚一日。琮兄弟懼負先人德業。誤後世觀聽。因由舍弟琳先作 公傳家年譜。其哀集材料。編次年月。頗費苦心。今春琮應國人之渴仰。編選 公遺詩中之鼓舞民族國家精神者。以成一集。遂根據琳弟所作傳家年譜。稍事刪訂。加入國家民族大事。及詩篇著作。兩欄。使 公行動之社會背景。著作之思感根源。躍然紙上。並增刪其譜前敘述。作前誌。另補入其生前身後周圍各情。作後誌。是

爲傳世年譜。將附刊於詩篇之後。使讀者益以明。公之志行著作也。然措辭稱謂。務作百年後修史者客觀立言。不敢過事忌諱舖張。蓋此年譜所述。亦猶公遺詩之在民族國家之地位也。特處處尙感覺材料缺乏。事蹟模糊。諸多錯漏。噫。身後不三十年。其子孫尙如此。則數百年後。讀公遺著。欲爲作年譜之學子。將何如耶。是則茲譜之作。或不爲識者所譏歟。惟幸先進大雅。多所見教。以資他日補正耳。中華民國二十三年甲戌四月。公之不肖子丘琮。作譜已竟。謹述經過。而爲之跋。



## 帖懷錄

琮當年幼。吾父倉海公。卽在外奔走國事。琮童年多就學家庭鄉邑。畢業中學。將隨侍廣州。則吾父歿矣。時琮年僅十八耳。故於先父言行事蹟。知之甚鮮。甲戌春。琮已以客觀。輯先父傳世年譜。竟猶有未盡所懷。因再以主觀。紀述親自聞見於先父生前者。作帖懷錄。詩云。陟彼帖兮。瞻望父兮。亦人子行役。南北。愴懷家國之意爾。

### 一 事蹟追懷

追述先父之事功德業。特印於吾心。而爲世所罕知者也。

出身貧困。聞先祖潛齋公以教讀爲生。往來臺南北。家無常處。生計困苦。斷炊常虞。先祖母陳夫人。亦躬勞作。先父長此環境。故幼卽刻苦自勵。恃其天資聰穎。庭訓嚴格。以得早日成名。

割臺遺痛。琮年約十五時。曾聞先父與家叔論臺事。先父謂臺灣自主。固發於民族之忠忱義憤。然亦非絕無把握者。當民主國籌建之初。駐臺法領已約安南總督。同認向法政府建議助成自主。蓋法

之於臺。早懷野心。特鑑於甲申之敗。自知國力未充。是時已隨俄德干涉還遼。再插口。恐與日啓釁耳。然設臺灣建國。能支六個月。使倭不得上岸。則外交必有變化。蓋當時法以外。俄英對臺。亦非無野心者。惜甲午事起。臺撫唐公。誤聽幕友。募淮勇守中樞。致一旦朝議割臺。敵兵壓境。即驕縱生變。若聽先父言。專編練臺勇。則割臺後。鄉土念重。戰守必強。雖明知孤島無援。軍政革創。斷難拒一國新勝之師。然臺島周圍。非可隨意登岸者。倭自二月陷澎湖。曾屢次來窺。不得逞。至五月有嚮導。始得登。倘拒守得法。自易遷延時日至六七個月。使列強生心。外交得計。則獨立之局可成矣。

先父復謂臺灣。自劉銘傳任巡撫。鐵路電線等新政。漸次興舉。故士紳思想較新。民主國自籌備而成。立而敗亡。雖爲時不久。然憲法。議院。郵政。幣制。均具。其政制有足多者。惜人民仍乏教育。不知國族關係。當時民主國迭申大義。請援於閩粵商民沿海督撫。迄無應者。即島中紳民。聞朝旨已許割讓。倭軍又海陸並臨。亦漸多不願輸餉械。不願作犧牲者。使當時民智已如光宣之際。則倭之吞臺。寧能如是之易。故內渡後。銳意於興學啓民智也。

又謂甲午戰啓。清廷對臺初亦未重視。陸軍祇劉永福一軍稍堪戰守外。餘皆不足恃。故割臺議成。皆紛散去。所留淮勇廣勇。亦無鬥志。至海軍則初派二砲艦來。而一爲壞艦。不能遠航。一則艦長暈海。不

敢遠航。和議成。則並此二艦亦撤去。幸沿岸各砲壘尙堅備。故日軍不能驟進耳。

余年約十七時。曾見國朝史略一書。中述臺灣自主之敗。由於唐景崧之不知兵。余舉以詢先父。答曰。遼東黃海。官軍數十萬。艘艦數十艘。且喪敗於倭。唐公縱知兵。豈能以無援無備之孤島。與新興一國抗乎。臺灣自主。自有其價值。自有其主旨。非普通史家所能知也。又常請詳述臺灣民主國經過。先父曰。汝年尙少。成年終當爲兒詳告。今說徒傷父心而已。

又常聞先父與四五家叔瑞甲兆甲談離臺諸情。謂當臺北陷新竹敗。先祖已決志於臺中失陷時。全家殉臺。具備毒品枕箱中。爲四家叔所搜獲。時先父亦值新竹敗餘。更遭部將呂某謀叛降敵。決東退叢山中。聯土番死守。與臺共存亡。壯字營統帶謝道隆適南來會議。諫曰。臺雖淪倭。苟祖國能強盛。終當驅仇復土。今非足下爲國爲民犧牲之時。足下對臺。目前之義責已盡。此後當以其才智內渡圖遠大。始爲上着。入山決死。雖成義名。無補恢復也。於是始決相將內渡之策。將義軍部衆交吳湯與徐慶等部勒。自爲戰守。但期稍懲創倭寇。聊示漢族之忠義云爾。

竊意乙未事變後。譏先父者。或稱其挾巨餉逃。或稱其不死臺事。挾餉之謠。實由叛將呂某爲倭捏倡之。而懷族籍之偏見者和之。惟先父生平衣食簡樸。身後家世清貧。潮梅人士多知之。無待辯釋。卽不

死之真意。粵人身見其興學革命之熱誠者。自當知其苦心。無待於追述內渡諸情。昔伍奢諫楚王死。伍尚從。而伍員逃吳復仇。蓋忠孝有經權。不有行者。無以圖將來。不有死者。無以召後起。先父之內渡。其一生之痛苦。蓋不亞於吳湯與徐驥等之殉臺。豈臨難苟免者比哉。

余年十八。先父爲命字。因訓曰。臺灣同胞四百萬。尙奴於倭。吾家兄弟子孫當永念仇恥。勿忘恢復。後輩而年最長。應努力爲率也。嗟夫。今臺亡已四十年。余無毫末以補興復。而東北四省三千萬同胞。又淪倭寇。傷哉。將何以語逝者。

居潮感化。先父自丁酉以後。六七年間均居潮屬。歷講學海陽。潮陽。澄海。汕頭各地。屢爲排難解紛。與利除弊。潮人甚爲愛戴。潮屬與嘉屬商民時有土客之爭。先父祖籍雖嘉屬。而生長臺灣。其土語與潮州同爲福老系統。言語已無隔閡。又奉旨歸籍海陽。每爲地方盡力。故土客有爭。輒得先父一言爲解。壬子潮州土客械鬥時。先父已歿。潮父老猶思念曰。使丘公在。必不至此也。近年編潮安縣誌。即前海陽縣者。且欲將先父事續編入云。

興學致力。辛丑。先父創辦嶺東同文學堂。實親自草定章程。親赴南洋募校款。親在汕頭佈置校舍。乙巳。創辦員山城東兩家族學堂。亦定章程。募款項。招員生。一一親自爲力。及丙午以後。助理兩廣學

務。其巡勸處辦。亦務自負責抑制頑阻。庇護新進。故凡所經辦。學無不興。猶憶其曾因此護嘉應學紳被州牧鄉某拘禁致過家門而不入席不暇暖即出省垣奔走又粵督張人駿因松口學案欲具摺奏請停辦全梅學校先父以華僑利害說之一言而解

教誨後進。先父於後進自行束修以上未常無誨。間爲族戚鄉鄰。且純盡義務。因其不避勞怨。諄諄善誘。成績每極可觀。猶憶甲辰在鄉設自強社課。爲族中子弟筆削課藝。常雞鳴不寐。不一載而社中子弟在縣科各考均嶄然露頭角。丁未以後。作廣府中學監督。則管教整肅嚴明。學部徐視學。評爲廣東第一。謂是以兵法管教者。又憶己酉暑假。先父返鄉。道經鎮平中學駐宿。聞學生喧囂。卽召集嚴切訓誨。校風爲之肅然。又先父門生李次溫先生謂當時鄉先輩教導後進多務壓抑而使就範惟先父務提起後進意志使之自重自奮樂而向上

疾惡煙賭。先父厭惡鴉片。遇吸者輒勸戒絕。家中來客吸鴉片者。不招待。於賭博亦疾視。除元旦許子弟玩樂外。平時不許觀玩。粵人本嗜賭成癖。迨清吏視作餉源。風氣益壞。鄉邑子弟常以傾家蕩產。並爲盜門之源。先父深痛之。故庚戌粵諮議局立。卽倡禁賭。重賄不動。與贊賭之多數議員辯爭。時稱可否兩派議員。幸以輿論得直。先祖聞其義行。甚喜。

去民痛苦。先父於鄉邑之劣紳土豪。民間之陋風壞習。官廳之惡政苛稅。不遇則已。遇則輒視力之所及而剷除之。辛丑以後。在潮梅各地。因私人辦學或公務視學。裁抑惡劣尤多。



庇護志士。光宣之際。青年志士憤國勢凌夷。政府庸劣。或奔走革命。或從事維新。每觸刑網犯官威。先父輒不避犧牲以己之名位庇護之。猶憶黃岡革命。松口劫案。曾盡力防止株連。庚戌新軍之役。辛亥三月二十九日之役。曾保救民黨要員。促在案者逃難。皆屢行不餒者也。

建國宣勞。辛亥八月武昌起義後。各省相繼獨立。先父聲望素爲粵中文武所重。因一面鼓勵後進。使團結勇進。勿惟怯渙散。一面陰以大義大勢啓說將吏。使皆贊成獨立。故粵垣兵不血刃。於九月十九日成立軍政府。然人情功成則驕恣。驕恣則爭鬥。於是新進意見百出。暗潮迭起。省垣如是。潮梅各地亦如是。先父極力調停。使新舊土客黨派等成見消泯。雖其身亦在嫉忌是非場中。則以寬讓恬淡應之。固爲粵代表北上組織政府。則對粵北伐軍。調護備至。爲之請砲械請增援。爲之向前途各軍接洽。對於臨時總統府。則爲向上海廣、肇、潮、嘉各幫殷商奔走。借助經費。是皆非檢所遺來往函電世鮮知之者矣。

## 二 言行追懷

追述先父之容言意行。爲吾所尙能憶起者。以微見其立身垂訓者也。

容態。先父身軀魁偉。如齊魯壯士。面紫聲宏。目有威稜。神清而旺。氣度嚴肅剛正。而寬和雍容。言笑

整暇豪爽。應接誠敬有禮。故後進見者無不畏敬。而終則愛慕焉。

舉止 作事勤奮懇切。躬行實踐。平居好學。手不釋卷。新刊舊著。瞬即讀破。報章譯述。亦涉獵廣博。每年冬夏假期。必回里休養。晨興挹清氣。夜坐玩山月。日間則侍先祖登高山。涉田野。意甚暇逸。喜花木。凡遠歸必攜數種歸植園庭。性嗜茶。小盞坭壺。若潮漳人士。四十以後習旱煙。用四尺長粗之墨竹烟桿吸之。並以代杖。不嗜酒。不好聲色。故屢有欲以女色誘陷者。均得免禍。

處世 對親長。則致養禮敬。勤篤不懈。對兄弟。則手足而兼師友。嚴教篤愛。對子姪。則慈撫懇誨。對宗族。則教養關懷。對鄰里。則寬和親睦。洗盡官氣。鄉村異姓父老。皆稱之曰二哥。以先父行二也。

庭訓 先父於子弟童年教育。特注意於良好環境。吾家三世讀書。皆親兼師。先祖教先父。先三叔。先父先三叔教四五家叔。四五家叔教琮與從弟珉。而九家叔新宏。胞弟琳。從弟琦。遠堂叔文馨。亦同受教於四五家叔。惟昔年較幼耳。吾家新宅孤處山村。僅兄弟叔姪同學。不令與鄰里兒童往還。以爲易染惡習。琮等在家讀書至十二歲。始許離家入新式小學中學。先父猶曰。吾家教本勝於外傳。但爲提倡新學。不能不使子弟入校耳。故年暑假歸家。輒另編課自教。直至琮等成年不改。然小學猶令就族學。中學猶令就縣學。不令隨侍至粵垣。謂未成年者。山鄉讀書爲佳。大都市耳目繁侈。多外誘。易失純

樸之性也。故琮等啓蒙於四五家叔。而處世立心則多受先祖之薰化。至勵其意志。樹其文章。則先父也。此種教育方針。固有長短。然琮自憶童年品性之養成。而至有今日之心境。得力於家庭教育者。獨多。

琮與從弟琨年十歲時。在家讀書。日間讀五經及新科學。夜間則讀唐詩。先父爲之講解。琮等因久讀詩。感於隱士生涯之清逸。一夜讀罷。先父詢曰。而二人年長。思作何等人。余等皆曰。作隱士。先父曰。汝等因多讀詩。乃思作隱士。夫隱士乃獨善其身者耳。不足爲法。詩亦爲舒寫胸懷陶冶性靈之文藝耳。無關大旨。大丈夫當建業立名。爲國爲民犧牲。不可但圖自了也。又常命題作詩文。若有悲感之語句。先父必指摘之。謂少年人宜志行奮勵。不可頹唐。及琮與從弟琨入縣立中學。勤奮求進。成績優良。先父聞之。則戒曰。少年讀書不可用腦過度。學而致用。不是讀死書。況當茲國危民困。我望汝輩樹捍衛國家民族之勳業耳。並不望汝輩只作博士也。

余兄弟每逢年暑假。由中小學歸。先父必命助家人耕耘植穫。曰。少年人當習勞作。且以知稼穡艱難。民間疾苦也。又家庭雜作賓客應接。余等如在家。必命躬爲。不命婢僕。曰。在得意當念失意。居富貴當知貧賤。然後能屈能伸也。

愛才。聞先父在粵垣。喜接納文武各校有志青年。每逢假日。必有來拜謁者。或鼓舞之。或指引之。無不感深興足而去。中山大學校長鄒海濱先生。常謂先父有兩特長。最足感人者。一曰。善知人。遇才俊。輒迅予提拔。二曰。善用人。任後進以事。常推心置腹。

論政。先父夙主革新國政。臺灣獨立。爲期雖短。而政制新穎。爲國人所稱道。光宣之際。言革新國政者。有主革命之同盟會。有主保皇之政聞社。有主陰篡之袁氏派。戊申冬。琮曾聞先父與家叔論時事。謂此三派近各遣人來拉攏。但吾輩以國家民族爲主體。今未明各派真意及其本質。故只贊助其大義偉略。暫不從同其形式組織。又曾語其弟子李次溫先生等。曰。依袁氏官僚。不能成革命事業。革命須汝輩青年自己奮起耳。又庚戌聞其論國政。曰。革故鼎新。固今日要圖。但宜慎重將事。不可徒驚秦西皮毛。而棄己國之精粹。又曰。革命能和平成功最佳。不得已而有破壞屠殺。亦不可過當。蓋我國今日大患。不在滿清。乃在東西列強。若因破壞屠殺。而毀傷國脈元氣。將益啓列強侵略。於辛亥三月二十九日之役。留學志士多數殉難。聞之甚爲惋惜。

先見。先父慮事明審。常有先幾之見。其臨終喜共和之成。而致慮於袁氏之立心。民國之變亂。其言吾雖未親聞。惟丙午冬。琮隨先父至嘉應務本學堂監考。曾親聆其答該校吳監督黃監學詢時事前

途。曰。清室不出十載必亡。但非革命軍攻陷北京。而爲各省獨立使之自倒。孫文雖有志革新。而及身必不能統治全國。並處安國事。至保皇黨之說。非不穩健。但時機已過。人心已去清室。康有爲等無能爲矣。辛亥以後。琮回憶前言。洵不禁嗟嘆也。

恬淡 先父常謂自聯捷成進士。卽絕意仕進。曾屢受保舉及招聘。多不就。以清末朝廷昏瞶。仕途污濁。政不易爲。不若居鄉奉親。專意養士講學。或爲民間仗義興革。反有意義也。辛亥廣東獨立。被舉爲廣東教育部長。實爲就行政官職之始。然頗受新進嫉忌。及爲粵代表爲參議員之南京。亦受其作弄。先父均不與較。泰然往來。粵新軍將領推爲粵督。則固辭。且新進之間。嫉忌爭競。反爲暗中調處。務令新國少糾紛。多建樹。其用心蓋亦苦矣。

忠懷 臺灣島國受外夷侵凌甚早。先父生長是邦。故幼卽知懷念國族。及乙未事變內渡。則尤忠義耿耿。視國家民族爲己任。聞家母言。丁酉德俄強佔膠澳旅大。戊戌政變失敗。德宗被囚。己亥法強佔廣州灣。先父與先三叔聞之。均曾相對悲泣討論云。庚子以後。外出多不與家人偕。其平居情態不詳。然諒知其每年寒暑假回里。必多購報章雜誌。遇有國內外不佳消息。輒蹙額長吁。心志不寧也。

以上所述皆爲先父言行事績。琮親自聞見者。歲月推遷。世俗煩擾。卽此區區聞見。亦多遺忘。因速編

此以爲之基。以俟異日之修補。庶幾先德不泯。後史有藉。稍伸不孝之哀思於萬一耳。

民國二十三年四月十七日割臺四十週年紀念日

不肖子丘琮謹述



## 倉海公詩選跋


倉海公。懷才勵德。欲立興漢。強華。驅胡。復土之勳。以傳後世。乃時會乖舛。所志不達。什一。其身後風傳者。乃爲詩。是豈公之本意哉。辛未以來。東倭煽毒。遼海沈淪。掌兵柄政者。一意賂秦和金。舉三千萬同胞。爲人臣奴。而不惜。加四千載祖德。以戮辱而不顧。其禍之酷。有甚於馬關。媾和。故海內志士。或平原興兵。或新亭對泣。感今懷昔。遂追慕乙未臺灣抗義之遺烈。思公之行。遂及公之詩。南北有心人。疊來催促翻刻。咸欲得一誦爲快。國事益壞。而公詩乃益傳。是又豈公之本意哉。嗚不肖。不能稍繼先志。因輯遺詩中。鼓舞民族精神。闡發國家思想者。一百五十題。都三百首。並附以譜。誌。傳。錄。圖像。以應世需。而振民志。公生平所作詩。至少當有七千首。蓋自乙未至辛亥十七年間。共有詩二千首。前刊嶺雲海日樓詩鈔。卽選此中之一千四百首。由庚午能吟詩。至甲午起義師。二十五年間。所作雖盡散失。以此推彼。並估入。應試練習諸作。則至少當有五千首。是合乙未後作。當有七千首也。今所選實不及全作二十分之一。況以琮羹陋不學。遺珠漏玉。又惡能免。雖然。詩所以言志者耳。公立



志興漢。強華驅胡。復土。未能達志。故表之以詩。其詩之傳也。實不在詞藻之豐美。而在意志之偉大。縱多讀。公詩不能繼。公志不足以言知。公本意。所選雖區區三百篇。而皆啓發忠義。警惕興亡之作。有心人亦足以知。公而繼其志矣。嗟夫。方今東藩已撤。北疆復失。赤焰四瀾。白氛遍地。國族危虞。有甚。公時。吾願炎黃華胄。禹域明良。殷憂啓聖。多難興邦。從茲讀。公之詩。行。公之志。勵文信國。鄭延平之操。樹班定遠李世民之業。建牙鯤身。飲馬鴨綠。敵江戶城下之盟。洗春帆樓上之辱。亞東協和。世界輯睦。則中華民族千秋萬歲。而。公之詩亦千秋萬歲矣。

黃帝紀元四千六百三十一年甲戌。時民國二十三年四月二十六日

丘琮謹跋



中華民國二十四年五月初版

(55525)

前臺灣民主國 義軍大將軍 倉海先生 丘公逢甲詩選 一冊

每冊定價大洋肆角伍分

外埠酌加運費匯費

\*\*\*\*\*  
版 翻  
權 印  
所 必  
有 究  
\*\*\*\*\*

著 作 者 丘 逢 甲

選 輯 者 丘 琮

發 行 人 王 雲 五  
上海河南路

印 刷 所 商 務 印 書 館  
上海河南路

發 行 所 商 務 印 書 館  
上海及各埠

張

中央宣傳委員會圖書雜誌審查委員會第一五一號審查證

#82

721036

721036

